

Литература Дагъистан

16+

Гьалмагъдеш

ЛИТЕРАТУРНО-ХУДОЖЕСТВЕННЫЙ И ОБЩЕСТВЕННО-ПОЛИТИЧЕСКИЙ ЖУРНАЛ

Гялибек Тахо-Годис - 130 дус



5/2022

сентябрь - октябрь





Гьалмагъдеш



ЛИТЕРАТУРНО-ХУДОЖЕСТВЕННЫЙ
И ОБЩЕСТВЕННО-ПОЛИТИЧЕСКИЙ ЖУРНАЛ

Учредитель: Агентство информации и печати Республики Дагестан

РУКОВОДИТЕЛЬ - БЕКИ РЕДАКТОР
Мурад МяхИяммадович ГИЯХИМАДОВ

РЕДАКЦИЯЛА КОЛЛЕГИЯ

Кь. ГИялисултIанов (*журналла редактор*)

Т. СягИдов

Кь. Мигърабов

ЖАМИГИЯТЛА СОВЕТ

А. ГИябдулманапова

И. Ибрагъимов

Х. ХИябибова

Х. Юсупов

И. МяхИяммадов

М. Къаратов

М. МутIалимов

М. БяхИяммадов

5

2022

сентябрь - октябрь

КIел бази гьачам
дурабулхъан

Журнал основан в 1952 году

Выходит один раз в два месяца

1952 ибил дуслизиб
акIахъубси саби

Государственное бюджетное учреждение
Республики Дагестан “Редакция республиканских литературных
журналов “Соколенок” и “Литературный Дагестан”.

ЖУРНАЛЛИЗИР ЛЕР:

ПРОЗА

Сарат ГЯЛИЕВА. Батирайла рурси ПатГима.....	3
Гябдуразакъ МУРТАЗАГЯЛИЕВ. Дудеш.....	15
Гяйша КЪУРБАНОВА. Целда.....	23

ПОЭЗИЯ

МяхАммад ТАХСУРМАНОВ. Макка Мадина чедидяхъбси.....	30
ПатГимат ГЯЛЛАЕВА. Уршилис, Ахъмабурцида къаркъа.....	34
Тавсултан СЯГИДОВ. Гябидла хухура гурдара.....	36
Ильяс ИДЗИЕВ. Умут.....	40

УЧИТЕЛЬЛА ГЯМЗИ

Земфира ЮСУПОВА. Дурсрачир дидактикала хЯнчурби дузахъни.....	43
Хадижат МУТАЛИМОВА. Нешла мез мяхАкамдарни.....	48

ПРОЗА

Аминат ГЯБДУЛМАНАПОВА. Литература фестивалъ. Баракатла някъби.....	54
Къади ГЯЛИСУЛТАНОВ. Салимат ХИЯЖИЕВА. ГяхАгъабза дубурлан.....	57
Наида ГЪУРУЕВА. Машгъурси адамти усахъан.....	59
МяхАммад КЪАРАТОВ. Бисаличир дукелци гьаларри.....	62

ПОЭЗИЯ

Мисей ГЯБДУСАЛАМОВА. Назмурти.....	66
Зубайдат ГЯМАРОВА. Назмурти.....	70
ПатГимат КЪУРБАНОВА. Дила жан. Дудешлис.....	74
БяхАмуд БУЛАТОВ. Бурхъни, нешлис.....	77
СягИдулла ГЯБДУЛАБЕКОВ. «Анкъила» мугЯллимтас.....	80

ХАБУРТИ

МяхАммад СЯГИДОВ. Гъачамра.....	83
Хадижат ГЯМАРОВА. БархАхъла балга.....	87
Къистаман ГЯЛИЕВА. Талипли секъяйда нуси асиба?.....	90
ПатГимат ГяхАмадова. Пикрила цакъ.....	91

КРИТИКА

Къади ГЯЛИСУЛТАНОВ. Хънул адамтала образуну сипатдирни.....	93
---	----

ФОЛЬКЛОР

Гяйша КЪУРБАНОВА. Буралаби.....	95
---------------------------------	----

Регистрационный номер: серия ПИ №ТУ05-00416
выдан Управлением Роскомнадзора по Республике Дагестан от 22.04. 2019 г.

Типография: ООО «Издательство «Феникс - пресс»
Адрес типографии: 367018, РД, г. Махачкала, пр. Петра I, 61

ГЪАЛМАГЪДЕШ №5 2022 г.

На даргинском языке

Выход в свет 2.10. 2022 г. Тираж 439 экз.

Заказ №1291 Цена свободная.

Печать офсетная.

Бумага офсетная. Формат 70x108 1/16.

Усл. печ. л. 8,4. Усл. изд. л. 8,7.

Редакция и издатель: Государственное бюджетное учреждение Республики Дагестан "Редакция республиканских литературных журналов "Соколенок" и "Литературный Дагестан".

Адрес редакции и издателя: 367000, РД, г. Махачкала, ул. Даниялова, д. 55.

Электронный адрес редакции:

litdag@mail.ru

Сарат ГЯЛИЕВА



БАТИРАЙЛА РУРСИ ПАТИМА

Батирай – ил даргала халкъли хъумхІертуси у саби. Батирайличила илала гІямруличила, яшавличила чумра адамли белкІун ва хабурти дуриб. Амма гъанналауб чилипра бурили ахІен илала дурхІначила, илини илди сен-сен халабаахъибал, илдачил илала сегъуна бархбас бирил. Ил секІал хъулчилибуцили, иш камси хабарлизиб наб бурес дигулра Батирайла хІябалра рурсилизибад цаличила, ХІурхъила хъар шилизир хІеррирули калунси, нуни сари гІяхІил ралуси, мурталра нушачи рашуси ПатІимачила.

ПатІима дила нешла гъамси сарри, илис сарри нуни гъар бархІи чериусири. Дила халаси игъбар сабри илала къугъати дугъби ва пасихІти хабурти аргъес бикни. Амма дила уркІилизир илала цакамти ахІенти далуйти кали ахІен. Лер, бехІбихъудла школализир ручІухІели нуни, ПатІимала далуйти ва дезни делкІунти ца чумал тетрадь.

ПатІимачила калунти баянти, дила гъанбикли, адамтас баянти дагъес дигахъу. Батирайла рурси сегъуна ририбал багъес дигахъу.

Батирайла рурси ПатІима акІубси сари ГІяя-Махъилизир 1867 ибил дуслизир. РебкІибсири 1936 ибил дуслизир. ПатІима бихъибси саби сунела неш Аминатла аба, Къапила ПатІимала хІурматлис, Аминатла неш ребкІили гІергъи акІубси рурсилис.

РиштІали рирухІелил лебилра хъалибарглизиб илис «аба» бикІутири. Ил у муртлисалра калун. ПатІимас ХІурхъила шилизиб ГІябдул-Вагъабла аба бикІутири. Батирайла шел дурхІя лебтири – хІябал рурси ва кІел урши. Илдазирад ца – ПатІима Батирайлис лергІер ригусири. ПатІимани бурусири, сари авал-шел дус риубхІели, къукъубачи каратурли, Батирайли сунела къугъаси тІамали ишгъуна далай бучІусири или:

**Ва дила базла шала,
Шалавакъаба;
Ва дила ванал бархІи,
Ванавакъаба;**

**Ва дила шалал урѝ,
Диши хІардикІин.**

ПатІима дебали сарехурси рурси руили сари, мурталра дудешличил рархрасунси. Сунени бурули рири, ада сунези мурталра вики или: «Урши хІериадлира, адала мер бурцуд». ПатІима дудешличил хІябкубта ручІусири ва далайрикІусири. Рурсила къугъаси тІамаличи ва жагадешличи Батирайли пахрубирусири. Ил секІал марбарес вирар Батирайли ПатІимас барибси иш биштІаси деза гъанбушалли:

**Издагуни хІербикІул
ЦІуб арцла дяхІимцІала,
Талхъунти держли бужул
ХІинтІин мургъе пигъала,
Азила къугъал Аба**

Нушани балули къяйда, ит замана, хаслира бусурман халкълис рурси акІни балагълизи хІясиббурсири, амма дунъяличира, илала халкъличира хасси пикриличил хІерикІуси Батирайлис сунела рурси гІямрула разидеш, жагадеш ва игъбар сарри. Нушани балехІегу, сен ахъруцили, илала адамдеш халадарили, учІусирил Батирай хъунул адамтлис.

Халабиулри Батирайла дурхІни, илдачил рарх Батирайлис лергІер ригуси ПатІимара. ПатІимали ил замазир чедиули сари гІямрула гъамадли ахІенти щуртІри. Илис гъалар сунес дигуси къяйда далайрикІуси рурсилизи неш рикІули сари: «Гъанна хІу халараилри, далаймарикиуд, дезна мариркъуд, дила рурси».

Сунени бурни хІясибли, ПатІима уркІрухъун ва хІяйранриуб, амма абазии селра эс хІериуб. Гъачам сунела неш Аминатли ил раргибсири дурхъир цІябси гІямзила кариили далайрикІули. Далай каберхайчи лехІахъили руили, гІур Аминатли рурси тІалабрариб ва ишгъуна хабар буриб, сен рурсилис ит замана далайрикІес асухІебирусил, хаслира Батирайла рурсилис. Рурси пикрумази рикиб, рамкъур, лехІкахъиб. Батирайли ил секІал багъур ва рурсилизи ишкъяйда иб: «Рурсбира тІабигІятли акІахъубти саби, ил багъандан илдир адамти саби, хІела уркІилис дигули биалли, хІу далайрикІен, дезна риркъен, дила рурси».

Амма ПатІима лехІкахъиб, сунела уркІилис дигуси хІебарили. Ил рикІули сари: «Нуни пикрибарилра, нушала къяянни бетаруси яшав, мурталра хІебиуси напакъа. Дила адас мискин или бихъибси у... Дила уркІилизи атІунсири – дила рузи Гулжанат сари ригуси дурхІялизи кахІериахъни: илала дудешли, гушси далайчила рурси кариили сен нушала жинс цІахбирида или. Нуни дила дурхІядешла разити гІямру хъумартес къайгъибарра».

Или биалра, ПатІимала пагъ халкъли балули саби. Сунела дудешлагъуна халаси пасихІдеш чебиули саби адаттала сегъуна-биалра зугІяла биубси мерличиб. Ил гІячихъбирули саби ПатІима 16 дус риубхІели. Ишди гъай делкІунтири нуни сунезирад аргъили:

Ца алгъурум, ца айгъир
Тевлалиши дигъунил:
Алгъурум – дуцлис хъярхыл,
Айгъир – багъали дурхъал.
Ца хорасан, ца къармукъ
Биклиши кадибил:
Хорасан – шибиклала,
Къармукъ – багъали дурхъал.

Ца истамбур ца къирим
Къярдалиши ахъибил:
Истамбулла – къаш мургъе,
Къиримра – хананела
Ца – издаги, ца – уздан
Янаша хъабатурил:
Издаги – бекли дурхъал,
Уздан – исмули жагал.

Мурхъси пикри бухнаси саби иш дезара. Пикрибарая гъари, сен жагали сипатдирулил Патимани урчи, улибхъа:

Ху мурдеръани урчи
Къара Шихла гузнела,
Урчилишир улибхъа
Абалула Жамавла;
Вайълиурил мисри тур
Азалу маллубела;
Къикъялиур тапанжа

Гялихан Уцумила.
Жамав талхъа тавхайзир
Къиргъулицад аш дукул,
Къийин дибил мусанир
Къаплайцад гъунар дикъул,
Ахетхъили чардедав,
Ахваргили дакладав,
Ва Гямарла Сулайбан?

ИкI деа лебилра гъанбушес дигула:

Тази дилгъул тевленир
Сайтаб хурхъбайла дурхъини
Шилалла ахдилгъихъис,
Ва Гямарла Сулайбан.
Ярагъ айхъул къярдуби
Даклаб тегенекуна –
Царилла ахгийихъис,
Ва Гямарла Сулайбан.
Гъиш дунъяла дуб дургул
Къаш журга урчела вагI,
Урхънела лутIи умцул
Алмас дархил тулла вагI,
Ца ивгъиби кIел дихъял
Ца дархил мажарла вагI.
Урхъи ихъул ахъ таллан,
Урхъе хIяхъибтирера,
Урхъни умцул шин далан,
УрхънехIумцуртирера,
Ху Терклиини хъагIяс?
Дирив биъна ваибил,
Заб хъадилзна хъайзурил.
Ху Терклиин арухис
Сигъуна белла къалла,
Ва Гямарла Сулайбан.

Шимаши шиди вашул
Духълуби шанда шункъар,
Ше дубли хъураирул
Къашми архIяйла лачин:
Вавайлаон вайъ гъварца.
Вайъла камал мургъила,
Барткеон хъарум ахыл,
ХъуцIалла яракъ арцла,
СаркIути палтар архIя,
Ва Гямарла Сулайбан.
Арау – диркъалиши
Хибарела ХинтIина
Хула урканбахъяли,
Арцла хIябдирхъалиши
Мургъе яракъ хъахъили,
Гур ху шехIиайдесли,
Сукъурдес узе рурси.
Ва Гямарла Сулайбан.
Ху агорил багъали,
Къяммира къугъадисго.
Къяммазив къугъал къиргъу
ГъунуцIазир гIяйир лачин,
Ху хIябли уцарали
ГъунуцIра азатдулхъан,
Ва Гямарла Сулайбан.

Гямарла Сулайбан Батирайла халал узи сай. Илини Батирайлис ва илала кулпетлис халаси кумек бирусире. Сулайбан левалли Батирайла унци лугъути ахIенри, я сегъуналра цархIил бекIмахухъеси левси ахIенри. Сунела замана Сулайбан гIяхIил секIал балуси, багъуди лебси адам уили сай. ХIурхъила ва цархIилти шимазир дахъал дусмазир къадидеш дариб. Ил багъандан илис Сулайбан-Къади бикIутири. Сулайбан урчиличи мурдали гъаман архIяличив вирусире. Илини шантази бурибсири мегъла гъуни лебниличила, илабад паровоз башниличила, сунесра «милгъла бугъа» бикIуси. Сулайбан-къадини хабар бурибхIели, цIуба напли алкунси шишала чирагъ чебаира или, шила адамти бирхауди хIебихъили бикIути саби: «Ягъари, ирххIеэсил секIал бурулригу, Сулайбан». ИлхIели илини халкъелизичебаахъибси шишала чирагъ нунира чебаибсири. Ил тяхIярли илини ХIурхъила шилизи чайник, чай ва улкъайла шишни хибти дуили сари. Сунела гIеларти ГIямрулизив Сулайбан шилизив судъяли узули кали сай. Ил замайзиб ХIурхъилара унраличибси МулебкIила шилара ургабикибси дубура ХIурхъила шилис кабизахъес жамигIятли арцра дучили, тамай дурусли хIебалулра, Петербурглизи саял Владикавказлизи саял вархъибси сай. Илавад чариубли лявкъуси замана ил 1883 ибил дуслизив шуцIали дусла гIямруличив Терек хIеркIли арухибси сай, кIачIдарили дурабулхъуси, урчи къаркъаличи агили, илав къягIибси сай. ГIямарла Сулайба гIямру мардирул нушачи баили калунси Батирайла абала ца биштIаси далай гъанбурушулра, сабира гъаннара халкъелизиб калунси.

**ХIу шавад дуравхъунна,
Диши дакIиб-дикъанти
Нуни хIузи дурасли –
Шандангъон дибъал уркIи
Гъургъашингъон пашбирхъур,
ХIула угай аба дибкI,
Ва ГIямарла Сулайбан.**

ИкI чула урgab бетаурси халаси ва декIси анцIбукъ сабри, ил багъандан сари 15 дус риубси рурсили сунела адала узила гIямру сегъунти дирибал, сай сегъуна адам ирибал дезализир чедетаахъили дурибти.

Сунела адала ва абала разидешличил ПатIимали сунела гIямрула талихI палабахъиб ГIяя-Махъилизивадси ХIятам-Муртузали бикIуси адамличил. Замана дикили гIергъи, ПатIимани балули сари дунгъяличирти бегIлара халати разидешлумала ца – ил уршила неш ретарули сари. Амма ПатIимани, урши акIубли цакамси замана бикибхIели, халаси пашмандешра балули сари, селра биубси агарли бехъуб илала хъали. ХIела ада далайикIули, шила халатас хIейгукъира духуирули ахIен или, мурул илизивад декIариркули сай, виштIаси уршира сарира ПатIима бегIтала хъули чаррирули сари. Рурсила талихI буъниличи Батирай разихIейкибсири ва рурсиличи ишгъуна далайличил дугъаилзули сай:

**Хъибхъя дикъул ахъ дубри
Хъубзарли хъу мадегIаб,
ХIугъуна игъбарагор
Абайлира мавакъаб.**

Батирайли балусири рурсилис сунела жагъти гІямруличир сарицун калес хайрихІебирни, ил гьаман виКІусири: «Урши нуни хІериркьис, хІу пикримарикІуд, дила рурси, хІела гІямрула талихІ ГІурра бургид».

ДекІарбикили гІергъи муруй пашманиубли чуйнара чаррухъахъес тиладибарибсири ПатІимази, амма ил хьулхІерухъун. ИлхІели ХІятам-Муртузали ПатІимази ишкъяйда виКІули сай:

**ХІябра къугъал ахІдедли,
МикІхІон къя хьулга къарга.
ПатІимани илис жаваб лугули сари:
ХІура къугъалехІедли,
Къажар милгъла къалиган.**

Дахъал тиладлумачи хІерхІеризурли, ПатІима чархІериубхІели, адамти бикІули саби; «Батирайли рурсилизи биганта риркъахъес ихтияр бедили сай».

Халаси декІар замана кахІели, ПатІимани сунела гІямрула талихІ кІинайс цалабирхъули сари, сунела къяйда гъалаб гІямрула талихІ буунси, кІел дурхІяра сайра хІериуси ХІурхъан ГІябдул-Вагъаб бикІуси адамличил. Ил гІяхІти хІял-тІабигІятла, сунела хъалибаргличи дебали халаси къайгъила вегІ ГІяхІси адам вирусире. Яшавла шуртІрира гІяхІти дуили сари. ГІябдул-Вагъаб ГІяхІси къисла уста вирусире ва къасабчире уили сай. Иличир ПатІиматла гІямру ункътили ва разитили детарули сари. ПатІима иличир хІеррирухІели, сунела пагъмучевсе адачи дигиличилара бурес чебиркур. Ит замана поэтла яшав декІсири. Ил ухънаваилри, хІянчи баресра хІейрулри. Илгъуна даражаличи ветикибси дудешличи ПатІимани рируси тахІярли уркІецибирули сари. ХІера, ПатІимани се тяхІяр бирули руилил, сунени бурни хІясибли. Чедибра бурили къяйда, Вагъаб къасабчи вирусире. Илини диъби дицили гІергъи, хІяйва дарг ва уркІи-хІяри чус кавлуте дуили сари. Илдазибад мурталра кумекбарес хІерирули, рикІи ПатІима, «муруйзирадра урухІули, нуни ванаси бурушра муръиси гъанкІра датурли, лебил дуги, хъалибарглизи тІама-гъама адхІергъахъес хІяйвантала дурхъи кариили, илди дарг, уркІи-хІяри къутІдирутири, ва бардала бяхІличиб калунси ГІявадеш къаркъала пяхъулизи бурчусири. ШаладиркухІейс ил хІянчи таманбарили, гІявадешли пяхъура бирци, савли нуни мура халараибси рурсилизи тиладибираси ил пяхъу дила адас бухахъес».

ГІябдул-Вагъабличил дархти гІямрула дусмазиб ПатІимала авал дурхІя акІубтири: кІел рурси ва кІел урши. Ил дигичебси паргъатли хІербируси хъалибаргла урга вайси балагъ лябкъули саби, 1902 ибил дусла март базличив Батирай вебКІиб. Халкъли ГІур хІергъиб дубурти зайдикІахъуси илала къугъаси тІама, паргъатдиуб сунела някъли къимдируте чугурла гиме. ПасихІси лезми муртлисалра тІашбизур. Ил анцІбукъли хІяйранрарибси ПатІимани дурибти дезначи халкъ хІяйранбиубтири, амма илдала цакамти ахІенти нушани далули ахІенра, илдира нуни сари ПатІимани дурутазираделкІунтири, аргъибти лерилра пикрилизира кали ахІен.

ХІера, сегъунси къимат бедиллил ПатІимани сунела машгъурси адас:

**ХинтІин мургъила байхъат,
Къумуллис къадин дирхъул,
Цуба арцла бехІ тІулби
Истакайс къадин дирицІул,
Гъиш-дунъя дуаллира –
АхІдулъул тІамала вагІ,
Дунъя хъадирхоллира –
АхІхъадурхул ула вагІ,
Ва хабарла Батирай.**

ПатІимани гъандуршули сари Батирайла жагъти гІямру, илала гІяхІси бекІахъ:

**Ца хІябсулла кІел киса
ДицІибил хІи мургъили,
Ца дицІибил дацІдикъул,
Дижлисра мукъаллисра,
Ва ГІямарла Батирай.**

ПатІимани гъандуршули сари сунела дудешла мискиндеш, чула яшав вайбикни, дудешли сунела лебдеш бигути гъалмагъунас мяштІхІебирни:

**ХІула дурашан гІяхІлас
Къярдалишир мукъара,
Къалабали дихъони
Дила намусла мискин,
Ва ГІямарла Батирай.**

Батирайла пагъму, устадеш ишдигъунти гъайличил иргъахъули сари:

**ХІяй чугур жагал чуллан,
Далай жагал хІибаран,
Ва хабарла Батирай.
Ахъил хъябливсад вашул,
Хъяб духъяна тамаша,
Хан уцмела Батирай.**

Дурибти гъайли нушази балахъули саби рурсила пагъ сунела дудешла пагъличи сен гІяхІли мешулил. ПатІиманира Батирайливан анцІбукъуни мурхъли пикридирули сари. Рурсила камти гъайлизибад аргъесли саби сегъунтирил Батирайла гІямрула шуртІри.

ПатІима дудешлис гІяхІли дигниличила бурули саби Батирай сунела гІеларти гІямрула бурхІназивра ригуси ПатІимачи сен хІерли кайили вирибал. Батирай викІули сай загІипси замана: «Ну гІяхІли вируси, яра вайли вируси замана, нуни Аллагълизи селра тиладихІебарра, гъанна тилади бирулра, ну ца хІябал бархІи дила ПатІимачил варх ватни». Тамашала сари бекІалис гъаларти Батирайла гъайра. Илди гъайлизиб рурсиличи Батирайла дуцІарти дигила лами леб:

**ХІал айсул хІалислама,
Адмайсудра дила хІал –
Аба садаараши.
ХІулби гІеркІул гІизраил,
Махъебцуд дила хІулби –
ПатІима дакІараши.**

Батирай агнила пашмандеш бара паргъатбиубси замана, хабарра агарли гІурра ПатІимачи халаси пашмандеш лябкъули саби, сунела шери редес хІядуррарибси халаси рурси Акай рахъхи зягІипли кали, ахирра гІяхІдеш хІебиубли, рубкІули сари. Рурсила арадешличила мурталра пикририкІуси нешли, рурсила гьалмагъ мягІни багъес гьавхІекІибхІели, урехиличил белчІунси дезализиб пакъир нешла уркІила дард, ил хІякъниличи сунела уркІила васвасдеш ва рурси сунезирад рурхнила дард лер.

**ХІинтІина тяхІмар гегуг
Шиниша машбакъшили,
БархІехъра жагІялалра
КІел бархІи хІекІилиго
Пайда агара или
Умут бихъили бисго.**

Ил урехи хъулчи агарсили убхІебухъун, камси заманала рухІнар рурси ребкІили, ПатІима язихъриуб. Гъайгъайра, сунела халаси рурси ребкІибхІели, ПатІимани дахъал дезни делчІун, амма илдазирад нушани далути камти сари. Гъандиркули сари ишдигъунти:

**Анкъани хІяб дуркъибил,
Хъулир гъангуз далгунил,
Кани хІардикІишара,
Шизи гъайдикІишара?**

Дурибти дугъбани бухІнабуцибси мягІна сегъуна сабив? Сен рикІусив ПатІима «анкъани хІяб дуркъибил, хъулир гъангуз далгунил» или? Илала рурсили гІямру цахІнар деркІес гІягІниси адамла хъулри ПатІимахъала хъулрала мякълар дуили сари, чула къапу илдачи хІердикІули, илис сари ил «кани хІардикІишара» рикІуси, калунси рурсила гьалмагъ чейис сунес къиянбулхъан ибси пикриличил.

Цачумал гъатІи секІал гъандуршехе нушани далути, ПатІимани сунела рурсилис делчІунтазирад:

**Цуба сирисла вацІа
Шинишли даргораша.
Шамахе даруйгазир
ХІяли арцла биркІанти
МаркІала дакІисвара?**

**Шахледяхъяб диркъурби
Гулвавна дакІараши,
Нахула харалиур
Манай улугъла хІулби
ДухІнадяхІ диисара?**

**Лакънар гулменде духІнар
Курела рурсбалаон
ХІула дягІути чутІми
Вацна мукърар дакъайши
ДибкІаб гъари хІуладай.
Гъиш дунела ирхІилиб
Цудар гІянжила цІяб хІяб –**

**Дунъя хъабирхораши
ХІу духІнаи буани,
ГІурра дунелархІилиб
ХъанцІа гІина декІ гъангуз –
Дунъя хъарахъараши
Мар чинайла чархлиши
ГІинисаили дуул.**

ПатІимала дезализиб динничил бархбасунси секІал, Аллагъличи дугъабиз агара, набчи сен ишгъуна балагъ бакІибсив ибси цІум иргъули ахІен. Илини бетаурси анцІбукъ тІабигІятлизиб биэс гІягІниси секІал къяйдали сунела бекІлизи кайсули сари. багъес къяянни ахІен ишаб рурсила хІял, пикри сунела дудешлайчи гІяхІил гъамли диъни.

Аркъули сари гъатІира дусми. Булъули саби ПатІимала гІямрула талихІ, хІябал дурхІя кали, гІямрулизивад декІариркули сай ГІябдул-Вагъаб. ПатІимани далайлизиб къугъали сипатдирули сари сунела мура гІямрула гъуни, илала бузери, хъалибарг хІербарес илала къайгъни:

**БархІи хІире баайши
Буридали арц дикъул,
ХІирергІи бархІахъайши
Зивали мургъи дикъул,
ХІяри сен ихъишера,
Ва дила ГІябдул-Вагъаб.
Унза гІилар Шамахи,
Хъар хъулир майдан базар,
КІавлиур вана нукъун,**

**Ляжилиур авруша –
ХІяри сен ихъишера,
Ва дила ГІябдул-Вагъаб?
Дура базар ша дихул,
Ша базар хъули дихул,
Шамахила базриган
ХІяри сен ихъишера,
Ва дила ГІябдул-Вагъаб?**

ГІябдул-Вагъаб агархІели ПатІимала хІеррирнила аги усалбиркес бехІбихъили саби.

ХІера, халал урши ГІябдул-Манап халаваиб. Нешлис кумек биран ветаур. Ил батагъализи узес арякъун, зягІипикили хъули чарухъун ва вебкІиб... ИлхІели ил хІяйранриънила хабар гъаннара ХІурхъила шила бухъна наслули гІяхІил бала ва буру.

Пикрибарая гъари, гъалабла дубурла шилизибси юрт, илала азбар, илар гІямру деркІибси хъунул адам, илала гІямал буи къугъали башуси тІама, гъаргиубси бекІ, чяхІдикІули дашути нургъби. Адамтани бурули къяйда, ил урца тІайчи хъарахъибсири, сунела хІял буи. Или биалра, дурути гъайличи, илдала мягІналичичи ва къугъаси тІамаличи халкъ хІяйранбиубтири. ИлхІели бикІули буибти саби адамти: «ХІябилла дагъалли хир Батирайла рурси риъни» или.

Нушаб илар дурибти секІал, гъайгъай, дагъес ахърихІебакІиб, амма нушани сунела мухІилизирад аргъили делкІунтира тамашадиэсти сари:

Къакъбайла михърлиши
ДурхІяйла муцІур-супил,
Ги-гили хъаргъараши,
ДибкІабго хІула адай.

РурсбагІир гІяйир дихул
Къаплан къиргъула хІулби,
ДухІнадяхІ диръораши,
Сукъур деб хІула адай:
ХІу агор шалал дуне
АхІдигихъира къалли,
Ва дила ГІябдул-Манап.

Диъли дугул лачеон
Ва дила уркІи къугъал,
Урхъназибил рузлаон
Ва дила хІулби жагол,
Закирил тІавузлаон
Нидла чІала дилсунил,
Ва дила ГІябдул-Манап.

Щуб дяхІяйла ахъ урхъи
ДацІалла пис агули,
Я хІула дацІмадацІаб
Чарх духІнар чакар уркІи:
Къияма садаили,
КІелла дархдихъибхІели,
ХІула пакъир адайзи
Дилбалли гъайикІихъис.

Ши алавла хъанцІ урхъу
Диолла кІантІ агули,

Гъар анцІбукъличи далдикибти гъай ПатІимани гъамадли пикридирутири ва дурутири. Гъандуршехе ПатІимани жагъил адам сипатвирути гъай:

ГІяй ахсинагла сирхІян,
СирхІян хъанцІа сукъба вагІ,
ГІяй багъдадла гъумикан,
Мукърела хІякала вагІ.
КІичІбуй чІумъвавакъибил
Дила чиркІайлан чІянкІа;
Булма дибъавакъибил,
Дила гъазигъумикан.
УрцІмазила рурсбела

ХІула бели мадиоб
Андайлер шараб хІулби:
Къияма садаили,
КІелла цугдикибхІели,
ХІула пакъир адайши
Ванали хІардикІахъис.
ХІуши кайути гІянжи
Агъаб мускулла биринж,
Арсуллеркъял гъунцІази
Гиг-гигли адалцІахъис,
ХІула дибъал адай дибкІ,
Ва дила ГІябдул-Манап.
ХІуши далгунти гъангуз,
Агъаб тавталла кІапІри.
ГІилму дилчІун гІялимти
Зияратли башихъис,
ХІула дибъал адай дибкІ,
Ва дила ГІябдул-Манап.
ЛягІлу-якъутла хІулби
ШихъадихъадихІани
Датулли арукъядли,
Нуни се бакъишара,
ХІуладайзи бутавбухъ
Алаха дубурацад,
Ва дила ГІябдул-Манап.
Ширхъад зубри урзули,
Убад гонза шинкІали,
Шини хІярихъишера
ХІула дибъал адай дибкІ,
Ва дила ГІябдул-Манап.

Уржиб хІябсуртела вагІ;
Бухарила гулбела
ГІясатин къапІнела вагІ.
Дила дарули дармай
Дарман дакъира къалли,
Дару къарчигъалиин
ХІяйран дакъира къалли,
Далавбухъ хІуладайзи,
Ва дила ГІябдул-Манап.

Сунела дигуси урши хІяриихъес хІядурварили кайхъибхІели, ПатІимани мурул ГІябдул-Вагъаб гъаникахъили дурибти гъай, ил уршиличи дугъарилзуси тяхІярли дурили сари. ГІябдул-Вагъаб левси замана тяхІярли сари хІерхІерирнила сабаб баянбирули саби, «агъулли гамъа хъунул» ибси гъайличил:

БархІи хІиребаайши
Шин куръали руржул шанг,
ХІула хІал абитІунна
БацІлехІи шехІабизур,
ДикІи ва дила адай,
ХІирергІи бархІехъайши

Цуб цІулхІнайли дуцІул ца,
ХІула хІал абитІунна
Мухъари-мучарехІи,
Цайналра ахІдирцІира –
ДикІиго гамъа хъунул,
Ва дила ГІябдул-Вагъаб.

Халал пагъмуличил ПатІимани сипатбирули сари хъубзар адамла сурат. Ишаб ца далай гъанбуршехІе:

Мургъила чуришили,
Чурмар хола хІяка вагІ,
Базла ави бухІналы,
Хатайла хІябсурла вагІ,
Гумайла бикІлишивил
ГІяндан диривла кІана.
ХІябкъыйла цугдайнвил
КІа мургъила ахътерек,
Адала лутІилишив
Назик чакалла галга.
Абала конилизив
Муръил шарабла гІиниз,
Адай мулъа дубкІулы,
Диади кІантІ агулы,
Дургъалагар хъумашив
Умцлагор гъили валгІул,
ХІялай узул хъубзара:
ХІялай узул хъубзалла
Дугъи-гъая мургъила,
ДукІ-дураз хІялы арцла,
Шини шишдякъисара –
Я хІула узегулы,
Уршира иштІалэллы?

Шихъла хъарахъла хъалшир
Хъараса бугІми лушул,
Цуб игІяйла къукъуби
ХІула тІутІухъадели,

ХІинтІби чили дикъая,
Я хІула узегулы,
Урши иштІалэллы?

Шин гадахІла ургІанир
ДахІцамла шалаличу
ДилкІо анкІи тІирхдикъул
ХІула къуватты някъби
ХІула кирхъадухъали,
АнкІи шини айхъая,
ХІула шолла ятимлис –
Я хІула узегулы.
Уршира иштІалэллы?
Ши-алавты хъумаши
ХІуны дагІун маранкІи,
Я Аллагъ, марай даргаб
Идбагліс дубураон,
Адай гаша дибкІахъис.
Си бакъиша, рузи дибкІ?

Балга къабул ахІбили,
Ши-алавла ургуба
Ругиртачу умхІялы,
ХІула сабиулыго
Дабгилы лугъай унцы,
Ши-алавты хъумашив
ХІяштархан гъили валгІул,
ХІялай узу хъубзара,
ГІур хІу шехІнайдедли
Сукъурдиъ хІула рузи.

ГярбукІан хъанца сукъбан
Сури гъалли шеркІили,
Хъяблиу хъадихъили,
ХІу авли авцибХели
ГІур гІилав чи хъавлуле?

ХІяй урцулла алаша,
ХІула авъалла тІяхІ дургІ,
Си бигули бакІаде –

Биибго арбухибти.
Гъишра хІуне архъадли,
ГІур гІилав ча валтулле
Сунна шелра ятимлис,
Урег-исил абасра
Дуразли хъат дилкунил,
Гъили сури дирдибил,
ХІялай узул хъубзара?

ИкІ далай цалабяхъибсири ишгъуна анцІбукъла гІергъи. 1911 ибил дусли май базлизив ХІурхъила шилизив жагъти гІямрула, сай ахІенси гІур хъалибарглизив чилра халаси адам агарси, шел биштІати дурхІяла ва рухъна абала вегІ хъубзар, сунечи гІяхІлад вакІибси адамлизибад хатІа кабикили, вебкІибсири. ВебкІибсила рузи ва халараибси рурси аги. Ил ПатІимала неш Аминатла рузила урши сайри, ва ПатІимала мякълав хІерирусири, сунесра «дила рузи» викІули. Ил секІал хъулчилибуцили сари ПатІима илцадра хІяйранни дезарикІуси. Узикъарла яшав гІяхІси бирусири, сенкІун сай давлачевси Къапила рурсила урши сайри. ИкІ дезализир гъандушили сари хъубзарла гІямрула шалуи.

Дезализир ишдигъунти дугъбира лер;

Дураз зугъали бели,
Унци авадай дели,
Сунин ахІагІали
АнкІи лиркъяхІлиркъяли,
Я сунна валэгъули,

Я хІула узегули,
Урши иштІалиэли,
Шелла ятимра хІура,
Уригисил абара
КанидяхІ дихъишера?

Илкъяйда дугъарилзули сари ПатІима шел ятимла нешличи. Пикрибарая гъари севан бурулил ПатІимани гІелабадси анцІбукъличила:

Сион валъихъадера
Унза агар тавхайзив,
Бахъли бакъибил хъулив
Убад хъярхІяйла чІябар,

Шибхъад сирисла бурха,
Янашаб хъанца гІина,
Далгъалла дихъибара
Мар чинайла чархлиши?

ПатІима гІурра дугъарилзули сари рухъна нешличи. Илала язихъдеш пикрибарили ишкъяйда рикІули сари:

Гъанна хІулаон гІямал
Дуаб шулла хъирхъайла.
ГІятІдили шурмира
БургІяли духъалара.

Гъанна хІулаон дарман
Буаб хъар ваца бицІла,
Ваца цІали бигили,
Биргала абирхулли.

Дезализиб нушани иргъула урчІемцІали дус риубси рухъна абас дунъя гІягІниси ахІен ибси, левсира ца сунела урши агариубхІели, сари дебали децІли риркъуси:

Гъай аман хІула адайс
БикІ мицІилли, цІябил хІяб
Къадар дикъулехІалли,

Гъай дарман хІула адайс
Чарх арали, дикІ гъангуз
ЛагдиталтулехІялли.

Ишаб иргъули саби къадарбиубси секІайчи ПатІимала халаси сабур ва таваккал. Ил секІал багъес вирули сай, сунела дезназиб гъачамалра гъимила гъай агниличибли, хатІа кабикибси адамлис хасбарибси яра илис сегъуналра диргала яра батІни агниличибли.

Салли сайтІун силлизир
Савли вахъяли къалли,
ЦІуб игІяйла анкъанив
ГІярадали хІвахъали,
Эски душман шулГили
ХІяйрай хІал абитІунил,
Адала лутІилишив
ДяхІнилис хІи хъартІибил,

Адайла унза гъала
Гъилис курцІа дагІунил,
ГІяй урхъу диржибил кІас,
ХІула адай ардухъа,
ГІусмалула уршегуну.
ГІяй урхъи диргунил пурс,

ХІулаадайра ардухъа,
ГІисала Мусалавла,
ГІур сунна чаллагуну.
АхІдубкІар сунна адай –
Алхолла гІялам шанти,
Миргъ шанда дакъибилну,
ХІула дибъал адай дибкІ.

Урдур дяхъибил къаплан,
Някъ дахъябил къарчигъа,
Ва хІула рузикъар дибкІ!
Гумайла бикІлишивил
ЗанкъардикІул гъайкІари,
ГІур хІушехІиайдесли,
Ардашус лагдяхІ шуни.


ПатІимала деза илкяйда таманбирули саби. ИкІдицун сари гъанналис нушани далути. ПатІима хабурта ругъусири гъар-ур диубли ардякъунти анцІбукъуначила. Бурули рири сунела бегІтачила ва узи-рузичила.

Хъарахъуд гІурла номерлизиб бирар





**Гябдуразакъ
МУРТАЗАГЯЛИЕВ**



ДУДЕШ

(Хабар)

Шагъарлизиб автобус тIашбизур. Иличивад някълизиб портфельличил жагъил адам кацIиб. Забли ургъулри. Хапли заб гъатIира цIакъдиуб. Чина виркусил хIебалули, ил тIашизур. Заблизивад дигIяникес мер баргес алавчар хIеризур. Пур гъамсигъуна шел дерхIла юртла подъездлизи ухIнайкиб, ганзила гъала тIашизур. Байхъала сягIятцад дикибхIели, подъездла ца унза гъаргбиуб, ва иларад жагъси хъунул адам дурарухъун. Илини тIашиси адам хIясибвариб.

– Элдар ахIенрив гъари? Се бирулри ишаб?

– Эльмира!

– Се бирулри ишаб? – гIурра хъарбаиб хъунул адамли.

– Заблизивад верцес дигIяникилра. Учителътала багъудлума ахъдурцуги курсаначи вакIилра. Дила, тухумтала юрт баргахъес забли валтули ахIенра.

– Ваши, ацIи хъули.

Илди кIелра хъули абацIиб.

Яхши-хуш даимдариб.

– Хъайчикайилрив?

– АхIенра. ХIу шери рякъирив? АкIубти лебу?

– Шери рякъунра. ХъалицIа талихIчерти урхIедухъун. АкIубсира агара.

– Ге, бирар илкъяйдара. ГIямру гIямру сари. ГIямрулизир мурталра-декIар вегIлис дигуги детарули хIедирар.

ДемхIурги палтар чердатурли, Элдар дивайчи кайиб.

– Нуни хIу цалра бархIи хъумхIертурри. Хъумартес дигулихъалли, вирули ахIенра.

– ХIу-декIар нуни хъумартур или гъанбиркулив хIед? Дугира муэрли чеири. Муэрлизир хIуни ну мурталра вявриулла. Гъаман ургъулри, челхъулри.

– Илис сабаб хIуни балуси саби.

– Гъаригу дяхъиличи зе писмадирид! Набра гъамадли ахIенгу. ХIуни бурригу, гIямрулизир вегIлис дигуги детарули хIедирар или. Чум бархIилис вакIилри курсаначи?

– АвцІали бархІилис.
– Ишар хІябал хъали лер. Ца хъали хІед бирар, хІери авцІали бархІи.
– ХІуцун хІерриулрив квартирализир?
– АхІенра. Набчил рарх хІерриули ца студентка лерси сари. Гъанна ил каникултаци шилизи аррякъи сари. Августла ахирличир ляркъян.

Сунела тянишла, сунес дигули калунсила хъулив курсани тамандиайчи хІеризэ Элдар разиикиб.

Телевизорлици хІербикІули гІяхІцад замана беркІили гІергьи, Эльмирани гІяхІял кайхъахъес хъали чебаахъиб ва «ХІед дуги гІяхІси бакІаб» или, унзара къяпІдарили, дурарухъун.

Буруш-гІянала хІядурлири. Эльдар кайхъун. Амма усес дигулихъалли, гъанкІ гъамхІебиуб. Элдар пикрумази ахъиб.

* * *

... Февральла бугІярси аргъ сабри. Миъ бетаурси дяхІиличив къакъурбазивад вашес къияннири. Адамти кабикибти ва къяш-някъ изиаурти анцІбукъуни дири. Къакъала тротуарличив тІашси Элдар чина-саял хІерикІулри. Хапли илис гъамли чумал жуз някъла дуцили ляркъуси ва къакъа байбирхъуси рурси карикиб. Жузи тІутІудиуб. Чумал секундла ухІнав Элдар рурсила мякълав вагъариуб ва ил ахъруцили тротуарлици каратур. Къакъализибад аркъуси «Волга» рурси карикибси мерличибад, тІутІудиубти жузала чедибад шалгІеббухъун, гІур тІашбизур. Урухриубси рурси Элдарлис баркалла эс бажардихІерикиб, амма уршилици ца гІяжаибли хІерризур.

Урухиублири «Волгала» вегІра. Машиналичивад кацІили, ил тратуарлици гъамиуб ва иб:

– МяхІкамли дашеная, жагъилти. Гъуни урехила саби. Ишгъуна гъуйчиб машина тІашаэс къиянни бирар.

ГІур ил Элдарлици гъамиуб.

– ХІед, узи, кІел баркалла. Ца – иш жагаси рурси рерцахънилис, ца ну туснакълизи хІейкили калахънилис. Нуша гІурра къаршидикес асубирар.

Элдарли рурсила жузи дучиб ва илизи дедиб.

– Чи бикІара хІед?

– Эльмира.

– Чинар ручІусири?

– Медицинское училищелизир. Их, хІушала филологический факультетла мякълабси.

– Ну ихав учІни сели балусири хІуни?

– Нуни хІу валусири. ХІед Элдар бикІар. ХІела мякъла тІашбизуртани бурули бакъира.

Илди декІарбикиб. ГІергъила бархІи медицинское училищелизи аркъути ва илабад дурабулхъути рурсеби-ургар Эльмира аги. Авэсил бархІи къарширикиб.

Эльдарли рурсбачил дахъал гъай хІедали. Ил цакъадар урузкІусигъунари. Сен-биалра бара хІилхІи буриб:

– Наб хІу гъар бархІи черизэ дигахъаси.

– Нуша цали ца чедизэс къиянни ахІен, мякълар дучІулагу.

«Нуша цали ца чедизэс» ибти дугъбачила урши дебали пикриухъун. Илис

нура чезс дигули ралан. Илини дила ура балули руили сари... Се хІергъеси леба гъатІи ишаб? Нуша, дурхІни, рурсбачи хІердикІулра, рурсбира дурхІначи хІербикІутигу.

* * *

Уршилисра рурсилисра белчІудила гІергъиси дус сабри. Элдар университетла шуибил курслизив учІулри, Эльмира училищела авъибил курслизир. Илди гъар бархІи къаршибирки. ЦацахІели мякьла гъамхІебиубли, цали ца чебии. Илдани цаличи ца дигай дихъни балулири.

Гъачам, парклизиб гъунибаибхІели, рурсили хъарбаиб.

– ХІела гелешмеш леру?

– Агара. ХІела?

– Дила шилизив гелешмеш кІев. Нуни мурт-биалра иличила хІебурес гІямалагарсири. ХІу наб дигахъулри. ХІед ну дигахънира нуни гІяхІил балулра. Нушала хъалица детхІерар. ХІечил ну раклес хІерирус. БегІтани хІералтара. Шанта набчи бугътанги чедирхъу, шутІни-къунби гІинтІдиру. Мурул адамлара хъунул адамлара цагъунти ихтиурти конституциялизир сари лерти. ГІямрулизир, хІякъикъатлизир илди диэс хІедирар.

Сунела уркІи бячунси хабар аргъили гІергъи, Элдар рурсиличил камли къаршиирканиуб.

Гъачам имтихІянтачивад дуравхъунхІели, Элдарлис Эльмира гъунираиб.

– Дила имтихІянти тамандиубли сари, училищера таманбарилра.

– Мубаракриулри, – иб Элдарли ва рурсила някъ чІумабариб.

– Баркалла. ХІуни бакъирив, Москвала гІяртистунни бакІили саби. Урусла театрлизиб халаси концерт бирар.

– Нуни ил балулра. Билетунира асилра. БегІла гІергъи гъунидиэхІе. Илди концертличичи бякъун. Элдарли рурсила някъ сунела лехІел някъли буциб, гъачам чІумабирули, гъачам хІяршбирули, концертличичибад дурабухъайчи батхІеиб. Рурсилизибад сунени касес вирусни разидеш ца илцун сабри.

ДекІарбиркухІели рурсили някъ гъабатур, чІумали буциб.

– ГІяхІил кален! ХІед рурси акІалли, дила у бихъа. Гелешмеш рургухІели, хІу дигуси чи лерал багъину, ил черрикІа. ХІела шилизир илгъуна рургар. Эльмира рисирииб. Эльдар сай гІашизурни мерличив вахъхІи калун...

* * *

Пикрумази вархили сецадхІи калунал Элдарли хІебагъур. Хабарагарли итил хъулибад Эльмирани ахъли вьявѣиб. Илис гъанбикиб хъулки ацІили ургар или. Вайхъухъяшли чІянкІули виъниличичи хІерхІеили, Элдар рурси лерси хъули дуцІухъун. Эльмира чІябарличичи карикилри ва руржулри. Элдар шакикиб: Эльмирани кахси муэр чебаилри. Ил ахъруцили, Элдар кроватьличичи кайиб. «Паргъатрии, паргъатрии» – ил кІапІруциб.

Цакъадар паргъатриубли Эльмирани сунени чебаибси муэрличичила буриб:

– Ахъси дубурличир рагъарриубра. Духъяна тупангуначил урегал къачагъ гІергъибухъун. Удибси къадалав хІу чеири ва хІечиряхІ гІяхІрухъунра.

Илди паргъатли, гъайра хІебикІули, сьгІятцад калун; гІур Эльмирани иб:

– Раткааба. Укъен хІела мерличичи.

Илис жавабли Элдарли ил гьатИра чумали кIапIруциб. Эльмирасра ратрухъес дигусигъуна ахIенри, сенкIун мякълавсила хъяб суненира кIелра някъли чумали буцилри...

Шаладикили чеваргъибхIели, Элдарла мякълар Эльмира аги. Сунес бетаурси муэрал, хIуруцIал багъурли, сунени барибси Эльмирани секъяйда чебиул хIебалули, Элдар цакъадар вачавархиб. ГIур, «велхIунрив, хулиган» или, ил сунела мякъла гъамриубхIели ва берхъибси жагаси къама хIяршбарибхIели, паргъатиуб.

– Беркала хIядурлину, айзи. ХIела палтар шинкIали лералну, ишди палтар чегъи, – Эльмирани удирти ва чедирти палтар Эльдарла мякъла уталичи кадихъиб.

Вегиубли укес кайрухIели, Элдарли хъарбаиб:

– ХIу шери рякъунра рикIули ахIенрив?..

– Нуни къяна хIебурра. Шери рякъунсири, амма дила жагъдешла ва дигайла вавни хIези къябдарахъес кали сари. Къисмат илгъуна буили саби. Дила мурул жявли гIямрулизивад арякъун, гъарли-марли мурул ветаэсра бажардихIейкиб.

Дуббатла гIергъи Элдарли буйрухъбариб:

– РегIриину, раши набчил рарх.

– Чина аркулра хIуни ну?

– Раши наб гIеларад.

Илди «Алмаз» бикIуси мургъи-арцла тукейзи абацIиб. Илаб Элдарли мургъила тIулека асиб ва Эльмирала тIуйчи чегъур.

– Гъанна хIу дила гелешмеш сарри.

БархIехъ илди мижитлизи бякъун ва магъар дихъахъиб. Илди мурул-хъунул бетаур.

ТалихIчерти ва разити авцIали бархIи бахъ къалабали шалгIердухъун. ГIурра гъал гъатIи бархIи Элдар шагъарлизив калун.

УрегцIали ибил бархIи Элдарли сунела плантачила буриб:

– Ну шилизи чарулхъас. Мекъ барес чебиркур. Чумал бархIили нуни сукникъянаби хIела бегIтачи бурхъис. ХIядурли руэн.

Ил дуги илди цалра бусхIеун.

– Мекъ бетхIерар, ну чиналра ракIес хIерирус. Нушани хъалицIа дарра. Гъайгъай, нушала хъалицIа духъянти ахIенри. Гъанна илдас ахир бакIили саби. ХIечил рарх ну жагъаннабла цIализи булан тIяхIрухъес дигахъаси. ТяхIяркъяйда цугдиркули ахIен.

– Се диргалабулхъули? Сабаб хIебуриду?

– Бурис. Дила неш зягIипли сари. Иличи хIерэсил агара. Рузи цархIил шилизир хъалибаргличил хIеррирули сари. Узи Россиялизив сай. Ну нешличи хIерэс шилизи чаррулхъула. ИкIаб наб хIянчира кIеб.

– Ну хIуни сецад замана чебаахъадра, илцадхIи хъайчикахIейили уэс вирус.

– ГIягIниси ахIен. Хъайчикайи. Нуша мурадличи даира. Мурталра-декIар дигайла бегIти бекIайчи барх кавлули хIебирар. ЖягIял нуша мурталралис декIардиркехе.

Ца гъатIи секIал. ХIу лявкъухIели хIечир лерти палтар ишар дати. Нуша дучIухIели тянишдиубти ва ишар деркIибти бурхIни гъандиркахъули, нуни илди замана-заманаличир кIапIдурцис, байдирис.

Гергъила бархИи хъулилад дуравхъи, Элдар сунес тяниши къакъализи хЕрдикЛути улкъайличи хЕризур. Улкъайларад Эльмира къакъализи хЕррикЛури ва нургъби ушкулри.

* * *

Курсаначивад чарухъунХели, Элдарла нешли чIумали буриб:

– ХЕд хъунул кариэс замана баили саби. Гъану шура дус виублири. ХIугъунти цацабехIтала акIубти леб. УркИи кабизурси чи лерал бура.

– Илгъуна гъачамлис агара.

– Мурт рируси? Шилизиб гIяхИти рурсби леб. ХЕд пачяхIла рурси гIягIнилив? Гъари тIашизи. Иш кагъар белчIен. Нешли илизи тетрадьла кIапИи гъабуциб. Ил Элдарличи белкIунсири. Илизиб бурилри: «Шилизир хIу дигуси рурси лер. Ил чи сарил рагъадлири хIябилра гIяхИил биши».

Элдарла неш учительница сарри. Ца бархИи илини сунечи шадир ракIахъес Зара бикIуси рурси жирариб. Къугъали регIриубли ил рурси ракIиб.

– Ишди хатI хIела дургар или гъанбиркули саби. ХIела сарив?

– АхIен.

– Бархъли хIебурадди, хIу пашманрируд. ХIела сарив?

– Сари.

– Дила Элдар хIед вигахъулрив?

Рурси хIунтIенриуб ва бекI гIяшбуциб. Селра хIеиб.

Ил замана Элдар хъули чарухъун, ва рурсилис салам бедиб.

– Иш рурси хIед ураркъес дигулра, – иб нешли.

– Сари разилив?

Рурсили бекI гъатIира гIяшбуциб.

– ЛехIкахъни къабулрикнила лишан саби, – рикIар неш уршилизи.

Неш цархИил хъули араЦили, мургъила тIулека хиб ва Элдарлизи бедиб

– Ма иш Зарала тIуйчи чегъа.

Элдарли Зарала някъ буциб ва тIуйчи тIулека чегъур. Ил чегъахъес рурсили къаршидеш хIедариб.

ТалихIчерси рурси арцурсиван хъули чаррухъун.

Ил чина рякъунсирил багъурти бегIтани гъар секIал аргъиб. БахъхИи агарли Элдарла ва Зарала мекъ бетаур.

Хъунуйчи Элдар разилири. Разилири илала бегIтира. Иличи села шайчибалра гIяйиб барес хIейри. Куц-бекIлизирра ил кегIерсири. Мурул-хъунул балкабикили хЕрбирулри. КIелра школализиб бузулри.

Дусми аркъулри. Уршила хъулиб сири гардбарес ибси Элдарла нешла пикри бетурхули ахIенри. Илала виштIал алкIули ахIенри.

Муруйра хъунуйра чула децI дигIянни бихIулри.

Цализи ца гъанбуршули ахIенри.

Гъачам Зара муруйчи дугъаризур:

– Нуни хIед дурхИни баркъес хIерирус. ЦархИил хъунул кариа. Ну багъандан хIура цунни калес гIягIниса ахIен. Наб гъанбиркули саби хIела бегIтира илгъуна пикриличил бургар или.

Элдарли хъунул кIапIруциб.

– МехIурти пикруми ураса. ДурхИни агарти нуша ахIентира бирар. Аллагъли

хІегибси касес вируси ахІен. Нуша цунти ахІенра. Нушала узи-рузи леб. Илдала дурхІни леб. ДухънадаибхІели нуша илдани лайхІедикІура. ХІура нура дурхІначил дузулра. Илдира нушалагъунти саби.

Хъунуйс илгъуна жаваб бедилихъалли, Элдарла уркІиличиб миъ сабри. Белики, гІяйиб сунечибра биэс. Илини балулри, гъачамцунра ахІи хъунул тухтургачи рукъни. Амма сен-биалра сунечи сайра ташмишикІулри. Заманали дудеш ветаъни тІалаббируси саби. Илис узи-рузила дурхІни дигахъи. Илди чучи бакІалри разири, илдачил ихтилатикІи. Къакъализиб къаршибиркути дурхІначи хІерикІи. Чи биалра чеввикІили, их дила виалри или гъанбирки.

Гъавкъя ва устадешла вегІ учитель сайлин Элдар багъудила Министерстволизи узахъес живариб.

Ил хабар хъунуй дебали хІейгули къабулбариб.

– Ну чиналра хІякъяс, – чІумали каризур ил. – Ну ишабси хІянчиличи къабуллира. Итар, шагъарлизир, сели риркъусира ну. ХІу командировкабачив, архІяличив декІар-декІарти совещаниебачив, собраниебачив вируд. Ну хъулир цунни кариили руусирав, чичил гъайрикІусира?

Элдар зигарухъун:

– Нуни гъай бедилра. Наб приказ белкІи саби. Гъанна гІелумизес хІейрус. Жита-вацала хІязани мурул адамличи далдикибти ахІен. Ишар хІу рузен, итав ну узус. Акъути бурхІназир цаличи ца дашесра дирехІе.

– Наб илди авара хІейги.

* * *

ХІянчила бархІи таманбиублири Министерствала школабала отделла инспектор Аселдеров Элдар дуравхъес къалабаикІули ахІенри. Министрли сунези бекІбарахъес бедибси ца гІярзала хІекълизив пикриикІулри. Рахли, илала кабинетла унза гъаргдиуб ва машинистка рухІнарухъун.

– Элдар Аселдерович, хІечи вакІес дигули ца урши лев. ВахъхІи тІашли сай унзала гъалав. АцІес урузкІусигъуна сай.

– АцІахъа.

Уруз-хІяцІли вецІну кІира-вецІну хІябра дус виубсигъуна урши ацІили салам бедиб.

Инспекторли айзурли илала някъ буциб, гъамсигъуна уталичи кайахъес чебаахъиб, хъарбаиб:

– ХІу шагъарлизивадсирив?

– АхІенра. Шилизивад сайра.

– Чидил шилизивад?

– УцІарила.

– Ге, лебси сабил илгъуна ши. Гъарахъси саби. ИкІ шилизир нуни ралуси Запирова Эльмира бикІуси тухтур лерсири. Раладу хІуни?

– Дила неш сари. Нешли вархъибсира хІечи... Нешли тиладибариб ишди суратуни хІердарахъес ва ну урхъула дублавад къунзварахъес. – Илини кисализибад акІнила хІекълизибси свидетелство дурасиб. Илала духІнар дарх касибти кІел сурат лерри.

Элдар суратуначи хІерикІули чумал минут калун.

– Ишди чи сабил нуни балас. ХІела узи-рузи кІебу?

– Агара. Нешла нуцун сайра.
 – Чум дус виублирив? Чи бикІара?
 – ВецІну хІябра. Арсен бикІар.
 Элдарли акІнила хІекълизибси свидетельство хІербариб.
 – Мурт акІубсири?
 – Февральла 15-личив.
 Элдарли лерилра аргъиб, пишяхъиб.
 – Гъари, айзи, гъамии набчи.
 Ил айзайчи тІашхІейзурли Элдар харчизур. Ахъуциб ва кІапІуциб,
 уммайдариб.
 – Ну хІела дудеш сайра.
 Уршила хІулбазирад разидешла нургъби дурадикиб. КІелра лехІкахъиб.
 – Нешла кагъарра леб хІечи белкІунси.
 – Кагъар хъулиб бучІехІену, айзи.
 ТалихІчевси дудеш ва талихІчевси урши Министерствозилибад дурабухъун.
 – Урхъула дублавад кІинайс къунзвирури. Гъанна ихар адамти бугути халати
 урехила бялихъуни дагъардиубли сари, – пишяхъиб дудеш. Дудешла гъайличи
 вирххІеурси уршира пишяхъиб.
 Хъули абаибхІелира кІапІбикили илди бахъхІи калун. Уршили урзи
 ахъилри ва дудешла хъяб буцили, илала михъирличи бекІ кабихъилри.
 – Сен гъанна бикайчи хІекІири набчи?
 – ХІу левни нуни балуси ахІенри.
 ГІур Арсенни хъарбаиб:
 – ХІела хъалибарг чинаба?
 – Дила хъалибарг агара. Гъанна хІуцун сайри дила левси. Дила хъунулра
 агара. ДекІардикибтира.

* * *

– Урши, усахъес каркъили, паргъатварили гІергъи сабри Элдарли илала
 нешла кагъар белкІунси. Кагъарлизир дахъал гъай аги.
 – «Салам, дила Элдар, – лукІулри Эльмирани. – Илкъяйда рикІес набзиб
 ихтияр леб, сенкІун хІу дила уркІилизив муртлисалра дебавиубли левалри.
 Илизирад хІу уввизахъес сегъуналра цІакъли хІебирар. ХІу набзирад
 декІарикили гІергъи, дила урши акІуб. Нуни илис Арсен бихъира, наб бахъ
 жагабилзуси у сабхІели. Фамилия, дудешла у дархъли делкІахъунра. Ну гІур
 шерИ хІярякъунра, сукни башути лебли биалра. КІина рукъялли байбси саби.
 КІина-хІяйна шерИ рукъни нушала шилизиб бируси анцІбукъ саби. Иш хІела
 лачин хІечи урхъулра. Ара-сагъси, серхурси, духуси урши сай. ХІебалас
 къабулвиридал.
 Хъумартуррав хІуни ну? ХІу къалли дила хІябла гІянжилира хъумхІертури.
 – Някълизиб кагъарличил Элдар усуси уршила кроватъличи гъамиуб, уршила
 кІантІити гъез хІяршдариб. «Ишала нешла гъалав ну гІяйибла вегІрав? Юх,
 ахІенра. Илис нуни селра хІейгеси хІебарра. Уршила гъалав? Илала гъалавра
 гІяйибла вегІ ахІенра. Белики, гІяйибла вегІ вииша? ВецІну хІябра дус виайчи
 ва сай вакІайчи ил левнилра хІебагъурли ватни дила бархъсив гъатИ? Белики,

ну дигуси ва наб дигуси хъунул адамла къисмат ну декларикибхейчибад чина бетикибал багъес чебли бииши».

Илдигъунти пикрумачил Элдар уталачив ускаун, уршила бекла мякъла бекла кабихъили.

Муэрлизир Элдарли Эльмира чераиб. Илини къялкъяличил мура удулри. Ил гъамиуб.

– ХІянчи гъамадбираб!

– Гъамадси хІянчи ахІен иш. ХІу жагъси хъунуйчил хІилна виркъули кайилри. Наб кумекбарес къас агара хІела. Нуни хІед урши варкъира, хІу ил чеэсалра хІекІири. Селра хІебирар. Илала мекъличи левкури.

ГІур Эльмира цІуба палтарличил хъулир рагъарриуб.

– ЛехІизи, гъари. ХІед дигалли нуни ГІурра виштІал виркъис. Ну хІела хъунул сарра. Нушала магъар бехъубси ахІен. Урши дигив, рурси дигив?..

ЧеваргъибхІели хъали шалабиублири. Элдар уршиличи хІеризур. Ил усухІели пишяхъилри. Илала муэрти дудешлаван ахІи, разити дурги.

* * *

Дудешла хъулри, иларти тяхІяр-къяйда, ибгибдеш, умудеш Арсеннис гІяхІдизур. Хаслира гІяхІбизур илис дудешла библиотека. Жузази халтІикІули, Арсен ила сягІятунадли кайри.

Гъачам бархІехъ Элдарли Арсен живариб:

– Ваши хІела нешла хъарбаркъ таманбирехІе. Урхъула дублар къунздулхъехІе.

КІелра урхъула дублаб къунзбухъун. Илав Элдар пикрумази ахъиб. Илар Арсенна нешличил дирути гъунибаъниби, разити ихтилатуни гъандикиб. Илис гъанбикиб «дила гелешмеш кІев» ибси Эльмирани бурибси, сай къудкъуварибси хабарра.

Шагъарлизив Арсен гъал бархІи виублири. Амма илис анцІбукъи ахІенри. Илини шилизи нешличи кагъар белкІун. Кагъарлизиб илини бурулри, дудеш сунес разили гъуниваъниличила. Ишаб сунес гІяхІил биъниличила. «Шилизиб школа таманбарайчи нешличив кавлад, каникултала замана набчи вашуд, школа таманбарили институтлизи керхурхІели, набчив вируд» ибси дудешла пикриличилара белкІес Арсенни хъумхІертур. Кагъарлизир делкІун дудешла адрес, хІянчиличибси ва хъулибси телефонтала номерти.

Арсен вирхулри, сунела кагъарличи неш разирирниличи. ХІерлири нешла кагъарличира. Кагъар шилизи мурт биурал, нешли бархъибси мурт сабиурал бурхІни дуйгІулри.

ВецІал бархІи ардякъун. Кагъар хІебакІиб.

Гъачам алхІят бархІи дудешли ва уршили сагати газетаби хІердирухІели, унзализи къутІдахъиб, ГІур зянкъла саркъибти тІама зайдухъун. Арсен унза абхъес дуцІухъун. ХІерикІалли – унзала гъалар неш!

– ХІу ишав вегІбекІ ветаурсигъунаригу!

Хъунул адамла тІамаличи Элдарра айзур. РакІибсила някъ буциб, яхши-хуш дариб. Илдас кІилисалра кІапІбикес дигулригу, уршила мякълаб ил секІал лайикъли чехІебаиб...



Гяйша КЪУРБАНОВА



ЦЕЛДА

– Хи уни се билулли, дудес? Сулат билуллив? – вичИрбикIесбииб, цала цали някъби дуцили, гъамбиубти кIелра урши, цIелдалис хIядурбарибси гIеналичир някъиш альуси Маратличи.

– Ге, узи-урши, – пишяхъиб Марат, хъапIниван журуга цIудара хIулбар виштIалла ляжи зузбирули, – хIера гъари, сецад жагаси къяли бетаурал иш гIярбукIан някъишла! Эгъе-гъей, ца хIеризи гъари, иша урши.

БиштIати пахруличил чула дудешличи хIербизур.

– ХIед жагабилзулив? – ласяхъиб Марат халал уршиличи.

– Агъа. Набзира къегI лугаду?

– ХIябилра лугас. Аммаки, иша урши, гъачамлис халаваи, – Надирла хIулбачи къапIа битIакIиб Маратли.

– Ну халаваайчи хIуни сурат таманбирид къалли.

Марат дукаругиб:

– ХIед гъанна дигулрив?

– Агъа. Лугаду? – тиладиличил хIеризур хъяша.

– Лугас. Ваши иша. Буца къегIра, къякъра. Гъари, алэн. Гъу!

Хъяша, вирхаэс хIейрули, гIела хихиуб. ГIур, ниъ дигухIели житалаван, дурхIути хIулбира вякъяили, дудешличи хIеризур:

– Марли викIуду?

– Ге. Алэн!

Сунела хъул бетурхни аргъибхIели, хъяшали къегIра къякъра касиб, някъишла бухIнала алэс алавакIиб. Сенрил хъяшала някъбазибси къегI тьякбулхъулри, къякъ тIулбази чейгулри – хъяшала хIулби нургъба дирцIулри. Амма «хIянчи» бетхIерни багъандан децIугкъи, сеннира уста ветаэс къайгIилизиври. Сунечи дукаркIулил ахIенал, урга-ургади дудешличи хIерраилзули, хъяша, гъаббакIахъили лезмира, къегI бархъли бузахъес виубцад чекайзурлири. Дулгъали нургъбира ушкули, Надир сагадан бузерилизе ихъулри, амма къякъ гIурра тIулбази чейгулри, къегI, вайбаркълисван, тьякбулхъулри.

Уршиличи хЕрикIуси Маратла цацахIели дукелцIи дурадулхъулри, амма илала яхI сегъуна сабил багъес дигули, дудешли сабурбирулри. Хъяшала бурсиагартI, амма сакIубти някъбани ил хIулуркIахъулри.

– Биур, дила урши, биур. Илкьяйда вирхъули, някъличиб цалра тIул хIебалтад хIуни. Диха иша ваяхI. ХЕрикIен, сен-сен альулрал нуни.

Надирра Назимра дудешла някъбачи ибкъли хIербикIесбииб.

– Дудес, хIу уста сайлив? – хъарбаиб виштIалли.

– Ге, сайра. Уста хIейасри, ишгъуна жагаси някъиш бирирав нуни? Эгъе-гъей, иш някъишла жагадеш! – лезмили дубшар пIянкъяхъили, бекI гъакIбариб Маратли.

Някъиш алэс дудешли сен гъамадли вирусил, сунела някъбазиб къегI сен хIусбулхъусирил аргъес хIейрули, Надирли дудешла някъбачирад хIулби черхIейсулри. ВиштIаси Назим биалли дягIли ахъбуцибси пяхIуллис гIелавадкайкилри.

– ХЕрагу, узи, буца икI пяхIул. ХIера, узи!

– ТIашизи, бусягIят бурцисну. Цакамси яхIбара! – Надир дудешла някъбауб някъиш алкIнила дигIяндеш багъес къайгъилизиври.

– ХЕрагу, икI пяхIул гъаббулхъули, буцагу, ужи, буца!

Надир виштIал узичи дуцIухъун, пяхIулличи хъямикун. БиштIатачиб дукаркIусиван пяхIул гIурра ахъбиуб, гъарахъбиркесбииб. ЦIуэрли арбухибси пяхIулли хумарбарибти дурхIни, чинабадрил хапли багъарбиубси къабулданни шадбариб. Ил буцес къайгънабиркъули, кIелра урши къакъализибяхI гъайбиуб. ДурхIни хIулба гъунибалтули, Марат цIелдаличи гIяшиуб: «Нура Надирра Назимрагъуна белхаагарси, урхIла децI-шишимти иргъес бурсихIейубси, цаличира лехIхIелзуси урши вираси къалли ну. Агъ, гIязиз неш, хIу хIяририхъесра, хIед цIелда баресра чебуркъубгу наб... Ишгъуна, хIу агарси бархIи лябкъян или гъанхIебиркигу.

Халкъли «цIуръа» наб ирули хъалли, хIу мицIирли лерай, цIуръа сайра или гъанхIебиркигу наб. Гъанна, хIу агархIели, ну дурхIнала дудеш виасра, ятимииублира. Шилизир чумра жагъил бекIа диуб, тухумти умуснази арбухиб, амма хIу шалгIеррухъунхIеливан, ну ялкъузхIейубра. Сегъуна хIяйчив виасра, се манзиллизив виасра, хIела малхIямдешли ванаирни, хIела сабурли паргъатирни, хIела бирхаудили уркIичевирни балусири. Гъанна чини аргъесара хIуниван дила уркIи? ХIуниван чини-биалра буру вара наб насихIят? Юх, нешлагъуна дигили бицIибси, дурхIнала хатIабачибад чеббурхуси, дурхIнала вайбаркъунира мурили чедиуси уркIи хIебирар».

ЦIелдаличиб къегI хъурсбирухIели, Маратлис нешла къаркъайзи хъурсикIусиван билзулри. Илгъуна манзиллизир илала някъби, урцулъауртиван, лехIхIедилзулри, ил гъанбикунази гIелаиркулри, уркIи цIубхъбулхъулри.

Хапли Маратла къакъличи забла кIунтIри пIакъардикIесдииб. ЦIелда бируси илини бекI ахъбуциб, вахъхIи къухIкайзурли къямаурси къакъ бархъбарес дигули, зуз-зузитIун. Ахъдуцибти дяхIличи забла кIунтIри гилдидухъун.

– ВяхI, ца бара гъалабван буцIардеш къацIбашули лебригу. Марлира, урзару? – Марат алав-гъалав хIеризур.

Аварагад багълали, хахамикIуси сукъурла някъличи мешубиркули, дирихъла «качIа» гъамбикIулри. ЦацахIели ил, ташмишикIухIели сукъурван,

ца мерличиб тІашбилзулри. ГІур, дягІли гъабяхъибсиван, къас-къасли гъалабахІ башулри.

Бируси хІянчира бархъбатурли, Марат айзур: «Урзар. ДягІра дирихъра Цинала шайчирад дургъули сари. Ванза белкъесли, марка баралри: чедакІбти картошкала хъими, деръубли, сусдалхи сари. Илдас гІяхІти дяхІни хІедикалли, хъумачибад гІябала сабухъ касес хъуликІни дугІла саби. ИшбархІилра гІяхІти ряхІмат даралли, анІкила хъумира чеахъдирар. Урзар, – хІулукІб Марат, – гІяхІил урзар: гъагулти декІли сари, цІябдирули, гІяшдикІули сари. Асубирар, чумал бархІи заб тІашхІедизесра. Илди тІашхІедизалли, цІелда мурт таманиуси? Чегъамли неш ребкІибхІейчирад авцІали бархІи диркур. ХІяб-алав къаркъа делшес, цІелда тІашбатес гІягІнилигу. Се баришара?»

Духъби тІашдатурли, бурх барес гІягнили саби. Ге, бурх-мага хІебарасли, цІелда хІядурбарес имкан хІебирар. МицІирли лерай, нешла уркІи хІерурцІахъес хІейубра. Гъанналра илала гъалабси, бегІла гІергъиси чебла таманаэс гІягІнили саби. Дугели чиргъмала шалалиурра някъиш алъас, заб-маркалиувра узус, амма цІелда таманиис».

Маркала чяхІлиуб, юлдашунала кумекличибли, илини бурх бариб, сагадан бугасигъуна къегІ чеббикІили, ил улъесииб.

– Ассаламу гІялайкум! Кири биаб!

– ВагІялайкум салам! – тянишси тІамаличи ласяхъиб Марат.

Сунес гІергъи касли башахъули урчира, Макъсуд гъамирулри.

– Таманбирулив? – кІелра някъли някъ буциб илини Маратла.

– Багъла-багълали. Ваппабай, левгІев вемхІурлиригу.

– Савлиличибад аргъ аязхІели, варгъи кахІесира. Халкъла буралаличи лехІизурси пашманхІейрар. Нуни биалли иличила хъумартурра. Гъу, селра хІебирар. Чуйнара заблира вемхІурли, дугІбанира вяхъибсира. Ванза буруш барили, зак юргъайзи буйгІули, хІербирути букІуни хІебемхІурли кавлану? Нуси хира. Иш нусира гягІбиахъалли, валлагъил гІязим, складчила хъантІалабад абилтІас. Гъанна, Марат, маза изни хІуни сагабарили хъалли, я букІуни биули ахІен, я гъалабван нусира бертара дарес балуси адам агара. Барибси нусира складлизиб гягІбирахъули саби. Ягъари, сен заяли арбашуси дила бригадала ихцада къиян?

– Сабурбара. Лерил секІал ахтадидирис.

– Сабур къалли дила жамигІятлис баарицад леб. Амма вегІличи хъарси хІянчиличи чедихІяртли хІербикІни децІигулра, – Макъсудли урчиличирад нусили дицІибти хунжи керасиб, складлизи ацІиб, умцантациб нусила битІакІ умцур. Марат складлизирти чармунази хІеризур, сунтІикун. Илдазибси нусила тІем шянкІлайчи шурбухъири.

Марат сунеласун складчичи чевхъес, ил вявварес гъакІухъунгу, хІилхІи сабурбариб. «ХІязлиси уили ахІен ГІялиасхІяб викІуси: «Каримуллагъгъунти хІянчизарти складлизиб батес асубирару, нуси хІербарес хІебирули биалли? Ил увасили, ну хІянчиличи катасли, хІуни чебиид, секъяйда нуни нуси хІербирисал».

– Ягъари, Каримуллагъ, дудешгъуна хІези ургъес я вирули, я дигули ахІенра. ХІеръа икІди чармунази! ИкІгъуна палакатдеш биэс асубирусив? Нуничир дахъал зешин чедаибтигу хІуни, нуси сен заябарибси?

ИкI заябарибси нусила багъа ахърилис гIашиъни багъи, – хIянчизарличи гIясили чевхъун директор ва дуравхъун.

Макъсуд Маратличи хIерлири.

– Агъа-гъай, гIяхIил урзули леб къалли! Ца-кIел сягIят гъатIи урзаллири, маза маслис бергесли къар ахъбири, – хIулукIиб директор. – Ваши, узи-урши, дила хабчабли се хIядурбарилли, белгибирехIе.

КIелра хъулибяхI гъайбиуб. ДяхI-някъ дирцили, столла гIела кабииб.

– Валлагъ, дурхIя, жагаси цIелда барилри хIуни. Жагати някъишра альбири. ХIяб шаладаркъ, хIела дудешла арцла ири-ханжалличирра итдигъунти някъиш дири. Амма цIелдалис гIена дебали чIумаси, мутIигIхIебикIуси чеббикIилри. Дила хIулба чехIебаасри, ит цIелда хIуни барниличи вирххIераси, – гъачам диъличи, гъачам картошкаличи къацIилкулри Къасум, – ит хIуни барибси хIянчиличи хIерризес рируси риалри, сецад разириишира хIела неш...

– Агъ, вегIебш, мицIирли лерай ил разирарес виъхIейубра къадин... ВиштIахIели, бугIярси янила аргълизив, бархIи ахъайчи хъули хIешира. Элелей, се гIяламатрил, я гушиубли шахIеркира, я вамсурли гъанхIебиркур. БархIила-бархIи нуша, дурхIни, иштяхIличил кадулхъулхъира, някъби-къяшми изирахъули, кадиркира, хъули чардиэс гIягIнили биъниличила хъумуртира. Демжурти нушала чурхрачиб дяхIи бицIи, шинкIадиубти палтар хIяз таманбиубмад миъдиргIи. Сунела насихIятуни хъумартурли или, ну витес или рахли неш алавракIалри, арцурсиван гъавулхъира. ЛехI чина илзусири, цIябдаибкъи, палтар дарсдаресалра хъули хIешира. Ил куцIичил «милица-къачагъ» или ируси хIязли биркъутачил вархиркира.

– Балас, Марат, нуни хIела хасият гIяхIил балас. ГIяшулличил цIами адилкъусира хIу виради, къаркъубачил лишаннизи иртусира хIу виради. Житни-хурала гъалмагъра хIу виради.

– Хури дебали дигахъира, – пишяхъиб Марат. – Школализивад чарулхъухIели, юлдашуназивад декIарварили, хури наб алавдири. Нуни хIедерки, чус диълара бухъумйларе бутIни, къацIла кесекуни дихухIели дииши, илди наб лявдикIи. ИлхIели неш набчи тамашарири.

Макъсуд, гъинчIилзули, укулри.

– Пякъир, дила неш, забли ургъуси бархIи ну дуки вархъаэс гIелумрилзи, сари раши. Ну, хIехара, ил дуки рякъи, хъулив каласри, харили убкIира... Тапла хIяз лебу, къагъ-гIерхъали биркъути лебу, зилантачил абзики, нешличила хъумуртира...

– ХъяшахIели адам я бегIтачила, я аркъути гIямруличила пикриулхъули ахIен. ГIур, дусми аркъуцад ил дарибти хатIабачи мукIурикIули сай, сенахIенну илди уркIилизи къыздикIули.

Халкъли бурули бирар: «БегIтала уркIби дурхIназир дирар, дурхIнала уркIби – къаркъубазир» или. ВегIла дурхIни акIубхIели саби нушани нушала бегIтала хIурмат бируси. ХIу, Марат, гIяхIил лехIизи биубси анцIубкъличи. Гашала дус сунела неш ребкIибхIели, цIуръа дурхIялизи хъарбаили саби:

– ХIу нешличи лехIхIелзули, иличивад мурталра гъавулхъули виради. ГIяхIлив гъанна ил ребкIибхIели?

– ГIяхIил саби, – викIули сай цIуръа.

– ХIед се гIяхIдеш бикиба, ил ребкIили?

– Садакьала кьацлира аврушалира велкьайчи укес бикиб, – жаваб бедили сай цIуръали.

Неш ребкIили гIергьи биалра, илала кьадри аргъни – ил камси секIал ахIен.

– ВиштIахIеликIун хIехарадешли нешла кьадри адамли хIергъули виэс, халакаибхIелиалра, неш мицIирли лерай, илала хIурмат бирес адам бурсивириси виалри...

Мушулвашули, кьаш бячунхIели, сунела хIяйван-кьачара урхIичи хьардарили, гьарахъси шилизирад шагьарла больницализи неш ракIибсири. Дила кьаш бархьхIебирар, бурьар или пикририкIули, ну гIяйсначив вашукъи, палатализир калес дигули, ил тухтуртачил жалризурсири:

– Дила урши буршанивад айзайчи, ил вархъли вашули чайчи, ну чиналра хIякьяс.

– ХIу ишар каладли, илала кьаш арабирули, аррукьядли, бурьусив?

– ХIушани дила уршилис сегъуна кьуллукъ гIеббурцулрал, дила хIулба чебаэс дигулра.

– ГIе, Марат, цаибил уршира жьвли вебкIибхIели, хIу илис дунъялизи калзули вииши. ХIела халал узи вебкIибхIели, ил хIела дудешлизи маслигIятрикIусири: «Бареси гIямал агара. ХIу цIумикIули, ну рисули хьалли, урши чархIелхъан. Паргъатии. Селра кьертIхIякьяллира, се-биалра беркен: усалиубли, куц агара хIела. Нуша ара-сагъли калахIелли, гIурра урши акIесгу». ХIу акIубри, Марат. Амма хIела дудеш, сунна хIяб шаладаркъ, вахъ жьвли шалгIевухъун. ХIези гIямрула убайдеш хIедагъахъес, дудешла агри хIебагъахъес илини халаси кьайгьи дакIубариб.

– ХIези буресра цахли саби, Макьсуд, амма дила хатIа гьархIебарни багъандан, гъанна децIигули саби. Студентли левай, художник ветарулра или, нуни неш хьалчичи каралтусири. Гьачам чаба убисахъули, гьачам чебуршахъули, абзур бархIи илала суратуна виркьусири.

«Дила хIянчи уркалули сари, жан дила урши, ратаба» или неш тиладирикIусири. Илала гIамала хIебакьибсиван, нуни сагаси сурат бехIбирхъусири. Ца минуталра хIянчи агарли руэс хIерируси ил, рахли вяшрухъалри, гIясирусири. Ну гIясихIейрахъес багъандан сабурра бири, пькьирли. Ихтияр бедайчи, вяшхIерухъи, руи.

– ХIу художник ветхIеурли ууд или гъанхIебирки. Амма нешлис икьалаиэс багъандан шилизи чариубли, гIяхIси барилри.

– Се икьала баррав илис нуни? Узи-уршиличи вякьунхIели яра архIяличи дуравхъунхIели, нешра кулпетра набчи хIерли биъниличила хъумуртира. Сецад кьанни чариасра, неш хIерусули, шимимтазир рургира. Сари рикIуливан «духули» чариасри, илала талихIла ахир хIебири...

Хъа регIли дяргIибти хурегуни урасиб. ДуцIарти, хIулумта диркьути чудни-хинкIала кIабатI гьала кабихъиб.

– ДуцIарли лерай ишдиалра деркена, гьайлизи ахъили, селра берки ахIенрану.

– Вай гьарай, Калимат, баркалла биаб хIед, гьаладихъибти хурегунира диутиригу. Гушсили варьаличибра мурили лебсигъуна букуси саби. ХинкIалира диъбанира гIяхIил велкьи виасра, чудни хинкIалара гIем багъес гIягIнили саби, – пишяхъиб хъа регIлис Макьсуд. ГIур Маратличи ласяхъили, кьабшизур. –

Амма, дурхІя, хІуни илди жавабла хІянчи чесили гІергъи, хІела неш усалрикиб. Дигалли вирхаи, дигалли вирхмаруд, ил даим шишимрикІи: «Гъай аман, гІямулти хІедалуси, шилтахъчидеш чедаибхІели, гъалаксаруси дила уршилис далдикибти хІянчи ахІен илди. ХІунилра илис гІякълу гІеббурагу, Макъсуд» или тиладирикІусири.

Марат хъяшаван пишяхъиб.

– Ахъри лябкъуси биалри, илини директорла хІянчира сунечи чейси рииши, пякъир дила нешли, набзи къиянти чехІедаахъес къайгъилизир рири. Изай рацІахъили, лигубира камра кали диалра, бемдурси каниличибад някъ чедибуркІухІели, ил рикІули рири: «ИшбархІи гІяхІил сарра, дила урши, изала хІярхІбиубли саби. Канира биштІакабаибсиван билзулра». Алав кабиибтала дяхІ хІедамкъахъес багъандан ил пишрирхъи.

– Валлагъ, Марат, хІела нешван, изайс чІумаси, гІямрула далаагъардешунас мутІигІхІерикІул адам чехІеира.

– «БиштІатала вяшатІайчи хІеррикІес, илдала вичІирличи лехІризес хІяздулхъули сари» рикІи ил гъаман, гІялагъажали хІебиркъахъес или Калиматли дурхІни арбукалри.

Гъачам неш карихъунси хъулив калес къасбарира. Ил набзи арукъяхъес, дила буршанив усахъес тиладирикІи. Амма гъанкІли айзахъес хІелтусиван, нуни левси мерличив усаунсила гІердарира: «Нешлис хІяжатхІели, гъачамалра кумекбирис» или гъанбикиб.

Усес, Макъсуд, наб мурталра дигахъис. Гъачам гъанкІли вертурли гІергъи, тупанг къаяйкбараллира, чевхІергъус. Амма итдуги сегъуналра гъанкІ хІебакІиб: дила къаркъай чегъамли неш набчирад аркъниличила бурулри. Неш ну хІевсниличи шаكلي рииши. Ну хІевсули левалцадхІи неш русхІелъан или нуни хахикІусила гІердарира. Набчи лехІра рилзули, изай къакъаракІахъибси нешли, бекІра гъакІарбирили, халаси гъигъ абатур, гІур илала гІянцІси цІум дурабикиб.

– Неш, се бариша? Кани дебали изулив? – харчизурра ну, гІямултачила хъумартурли.

– Селра гІягІнили ахІен, дила урши. Кайхъен. Аргъла изайс биэс, къячІдеркІиб. ХІу усен.

– Дарман бужиду, неш? Укол баришав?

– Селра гІягІнили ахІен, дила урши, усен. ДугІли инжитмайруд.

ГІянручІла ил русаун.

– Дармунта кумекбираллири, Марат, дахъалдегІ хІуни илди дарири. Се барадлира, ажал тІашаэс хІейруд.

– Тухтурли каниларад шин садилтІухІелилра, тамашала инсан хІерирару ил, илала дяхІ дарсхІедиуб, илини сунела буруси къябхІеиб. Элелей, сунела канилизирад бадирализи шинкІадеш жугъдикІухІелира, ил унра-хунраличил берхІила кариибсиван, ихтилатрикІи.

– Валлагъ, дурхІя, чІумаси яхІла адам рири хІела неш. ДекІси изай руцили, буршанир риалра, икъалариэс хъулрикІи, – Макъсуд сягІятличи хІеризур. – Гъу, гъанна набра арукъес замана саби. Баркалла! ГІурхІейс шадлихъуначи кадиэси биаб!

ГІяхІял гъунивватурли, Марат «биштІатала хъули» ацІиб. ДурхІнани дудеш алавуциб. Маратли виштІалгъуна хъябличи катур, халал къяшми-урга уциб, дуцІла урчиван ватихъиб – хъали дурхІнала дукелцІили бицІиб.

– Дудес, хала несла хъули васи, – лихІилизи зузикІулри хъябличивси виштІал.

– Ваши, дила урши, илцад дигули гІергъи, – хъапІ-хъапІухъун Марат.

Ваткаили халал уршира, хъябличивад увасили виштІалра, дайхъули бяхІяхъили бурушра, Марат кайхъун. Алавбикибти дурхІни иличи чебухъун. Житала дурхІниван, гъачам ца, гъачам итил урши гервалтули, ил хІязлизи ахъиб. Гербухъунти дурхІни итмадан харчбилзулри, дудешличи чебулхъулри. КъулдумегІбухъи, илди дудешличил абзбиркулри.

Чилирил хапли унзализи къутІдяхъиб, унза гъаргдиуб.

– ГІяхІял дигив?

– ГІяхІял агарси бархІира мабакІабну, раши, рузикъар. Гъарахъси мерличирад раКІили, рамсуррив?

– Рамснира хІебиуб. Сен саррая? Вайси хабар лебли хІебиэсгу?

– ГІяхІтицун хабуртачи хъулдикІулра.


БиштІати раКІибсиличи хъябруцбикиб, илала халаси сумкаличи хІербикІесбиб. Сумкализивад бизиси тІем башулри.

– Исаб се хеба хІела? – гъанхІевциб виштІалли.

Марат къяркъли дурхІначи хІеризур. Илди, лехІкахъили, утначи гугбиб.

– Ишар, дила ахІерти, хІушаб чудни лер. ХІушагъунти жагати. ХІера ишди! – илини дуцІарти чудни дурасиб. Мая хІушаб нусира. ХІушала хала неш муэрлизир чераира. ЗягІиприкес гъаларван сакІублири. Ил набзи тиладирухъун: «Дила гІязиз, ну Маратличи рукъес рирули ахІенра. Ил дебали чІукъавиубли сай, умсули сай. Илис дебали нусила чудни дигахъуси сай. Сецад къиянни биалра, дахъал гидгури дархаили, чудни дара. ГъарракІи дила уршиличи». МицІирли лерхІеливан, хІушала хала неш ихтилатрикІули чераира. ЧераргъибхІели, ил муэр биъниличи рирхаэс гІядаблири. Муэрлизиб бедибси гъайлис къянахІерирус или, чуднира дарили, дуцІли иша раКІира, – халаси гъигъ абатур гІяхІяй.

Маратла дяхІ думкъесдиб: «Агъ, ахІерси неш, ребКІили гІергъира хІу набчила къайгъназиррив?»





МяхИяммад
ТАХСУРМАНОВ

МАККА = МАДИНА ЧЕДИДЯХЪИБСИ

МикИхИен ХИяхихан ХИяхихановлис

*«Гъарил адам алмаз сай,
ЛямцИикIеси даражаличи
сунени сай викахъалли»
(Л. Толстой)*

I

Бахъ духути бегIтани
ГИяхълучевли варкьибси,
Пагъмучевли айкъурси,
КарцИи-диги картIибси.

«ВелхIунрив, адаузи!»
«РелхIунрив, ахIер рузи!»,
«РелхIунрив, дурхъаси неш!» –
ВикIусири ил савли.

Адаузи, хIела маза
Нуни дуки аркисну,
ХIела хъули чарухъен.
Ханумчакар, хIела къял
ХIенкълизи бархкайсну,
ХIу хъули чаркарии.

Дуки-гъунила авлахъ
Къяшмани белкахъунси,
Маза-мас, хIяйван-къача
Сагъли цIерхъдирахъуси.

Мура дердес вашули,
Къялкъяра белкахъунси,
Яни дугби дирули,
Унцира дамсахъурси.

Хъуми далцес вашули,
Гъаршлав халаваибси,
Ризкъила сабухъуни
Дучес бажардикибси.

II

БархъдешгIеб партияла
ХИялалси дякъ буцибси,
ЧеббикIибси гъуникад
Сабурличил вашуси.

Колхоз-совхозуназив
Ламусчевли узибил,
Се хIянчи хъардаралра
Ункъли тамандарибил

ГІямрула хІябкьяйтачив
КъардхІелхъули вашули,
Шантас къакъбяхъ аурли
Гъабзасун хІериубси.

Дахъал хІянчи дарили,
Къиянти дяхІяурси.
ГІямрула дебш касили,
Дусми хІялай деркІибси.

Ахъанай ухънадешла
ЯхІличил гъамбарибил,
ГІяршличи гъабзадешла
Къисматли ваахъибси.

Исламлис марси виъни,
Алагъла амру бихни,
Идбагла дугІя руркъни.
ШаригІятра бузахъни.

Мургъила сабурчедеш,
Имамтала духудеш,
Адамтачил валгундеш –
Сар хІела къиликъуни.

БегІла дурхъаси къиликъ
Адамдеш дихІни саби,
УркІилизи яхІ-ламус
Минакадиъни саби.

Гъариллис гІяхІдеш бирни –
Ил саби хІела мурад,
Шантала децІ хІелаван
Иргъни саби чевяхІдеш.

Шилизиб, районнизиб
ХІурмат-хатир халаси,
Шантала мажлисличиб
Къимат хІела чебяхІси.

Ламуслисра яхІлисра
Гъар мурталра гъалавси,
Адабра адамдешра
Мургъиличир дурхъаси.

ГІяхІдешуна виркъули,
Шанти разибирахъан,
ГІякълума гІевугъули,
ЖамигІят хІулбуркІахъан.

ХІялалти юлдашунас
УркІи пешкешбарибси,
ХІярализиб хІярхІяван
КумекікІес хІядурси.

Къуръа аятуниван
Дурхъати гІяхІбаркъуни,
Саби мицІирли лебай
ХъумхІертү адамтани.

Ш

Хала дудешунала
ЧерикІла къилликъуни
ХІиличил уркІилизи
Минадарилри хІуни.

Адабра адамдешра
РухІлизир ламдикІуси,
УркІецІира ряхІмура
Ниъличил дарх дерхъибси.

Ургубаличи диги
АкІубхІелил дарх лерси,
ГІинкъурбази айцІули,
Шила тарих бяркъурси.

Кагібси пагъмула вегІ,
Дахъ дигести гъайла вегІ,
Халаси хІурматла вегІ,
ХІекъли кайзурси гъабза.

Гъалмагъ-хъиланти бахъал,
Илдачи даим хІерси,
Узи-урши, тухумлис
Жан дедес мяштІхІейурси.

Диндаличир гимиван,
Халкъличил वालीкібси,
Галгаличир цІедешван,
Унрубачил уржибси.

Къукъура-лямцІра къяйда,
Баркъудилизив хъярхъси,
Дурхъал къуръа аятван,
ПасихІдешли вицІибси.

Тилбайла дубураван,
Адамдешлизив ахъси,
БирхІела лусентиван,
Даим гъабзадешчевси.

Разиси, уркІи гъаргси,
Бурибси гъайлис марси,
ЖамигІятла зугІлуми
Гъар мурталра ирзуси.

Шантасра унрубасра
Къакъбяхъли ветаурси,
Узи-уршис, тухумлис
НасихІятчи аурси.

Шилис баракатри хІу,
Шантас нурла чирагъри,
Унра шантас мисалри,
Аллагъла муъмин сайри.

Дусмани хІянварибси,
ХІянчили дебшдарибси,
Къисматла бяхъянани
Хъябхъяливан вяхъибси.

Чинав хІериадлира,
Се хІянчи бирадлира,
ХІедицири хІяяра
МикІхІен яхІра ламусра.

ХІела духути дугъби,
Пергер насихІятуни,
ЗайкадикІули кавлан
Адамтала уркІбазир.

ЧеалкІуси наслулис
ГІибратли ветаурси,
Дурхъати гІядатуни
Дяркъяхъурри илдази.

МикІхІен яхІра, хІяяра,
Адабра, адамдешра,
Гъабзадешра, мардешра
ХІуни ахъли дихІулри.

Ламуслизир, яхІлизир
ХІялай гІямру дуркІулри,
ХІялалси хІярамсила
Къадри ункъли балулри.

Халатачил халаси,
БиштІатачил виштІаси,
Дамличил дяд къяйдали,
Валикибси лебтачил.

ГІядатунас хІялалси,
Аслу-миналис марси.
Савли дулхъул шалдаван,
Вахълис шалаикІуси.

Гъарил хъарахъибсила
Мурад барес хІядурси,
Тиладибарибсила
Хъарбаркъ таманбируси.

ЖамигІятла зугІлуми
Суннаван чедиуси,
ХІяжатбикиб мерличив
Ургиван лагилзуси.

Шанти-ургар гъалмагъдеш
Калахъес къаслизивси,
Тухумтала уржибдеш
ЧІумадарес кайзурси.

ГІяхІял-шайс ва дурашайс
Ванаси анкъила вегІ,
Авадан уркІила вегІ,
Сахават къумурла вегІ.

Варъали халкъ балхуси
Мирхъила мез далуси,
МицІирагла арзи-хІял
Дагъес имканбакІибси.

ВегІлис хІейгул баркъуди
УрхІлиера хІебируси,
Вируцад гІяхІдеш барес
Къайгъилизи виркуси.

Агара хІезир къяркъдеш,
Лер адамтачи диги,
ХІугъунтачи саб дунъя
Хъарахъесра бируси.

Дубурти дирихъливан
Маккара Мадинара
Чуйнал чедидяхъибси
Ва дагъес валкъаурси.

Дурхъал зам-зам гІинизла
Шин чуйнара держибси,
Илди умути шинни
Бунагъ-хатІа дирцибси.

АнцІкъира шишимтира
БекІлил чемадааби,
Разити дукелцІили,
Анкъи-къуш шаладараб.

Калаби ара-сагъли
Лералти гІямрулизив,
Булдешлизив хІулкІули
ЧевяхІсила хІерлиув.

Лайлатул къадри кайзаб
Авадан юртла чеди,
ВерхІ-рангла зурхІяб ухаб
ХІуша хІердирул хъулиб.

Заклизибил зубари
Калаб хІела хІебиши,
Иш шалал дунъяличир
Бац-БерхІи лералцадхІи.

Савли дулхъул БерхІили
ХІела юрт ванабираб,
ГІяршлизибадли Бацли
Анкъи-къуш шаладираб.

Арадешра талихІра
Дерхъаб хъалибарглизир,
Къисматли къадардараб
ГІямрула гъарбизуни.





Патимат ГИЯЛЛАЕВА

УРШИЛИС

Ху дила шалда сайри
Гямру шаладируси,
Дунъяла шаладешлис
Урки гьаргбиахъуси.
Ху дила берхи сайри
Даим шалабикуси
Гямру жагадияхъес
Алагъли аклахъуси.
Пишбяхъли уркилизир
Гулвавни удалтуси,

Зайдикул дукелцили
Дунъяра булхехъуси.
Наб талихла берхиван
Савлилизив ухуси
Дурхъаси лигимат сайри
Чериксиле виубси.
Верхъаби гямрулизив,
Ветааби игъбарла,
Абала дурхъал балгна
Вихияби гьар ганзлизив.

ДАЛАЙЧИ

Далайикен, далайчи,
БацI къакли вьавхейкули,
Уркибази абацеси
Далай белчес вирадли.
Далайикен, далайчи,
Рухла давла лебхели,
Гяшси хела лайлара
Чурхразиб зимбулхъалли.

Далайикен, далайчи,
ДацIти тямри датину
Хела гъайбат тямрауб
Дунъя лехикабизесли.
Дунъя каберхаллира,
Даршдусми ардукъалра
"Далайчи сайри марси"
Или гурра буресли.

ЦЕЛДА

Бяргиб къаркъала целда,
Лига агар хябрачиб
Урдатурли дякунти
Ахер жан харждарахъес.

Нушаб даршудеш гъанни,
Дурхнас талихI булгули.
Сархирану чедибдеш
Сен ганзкабарилира?..

Гуррара хИллакарти
ЧичІлумиван лукъули,
АхІерли абикъур дурхІнас
Сен гъалабилзулира?
Рирхулира, балулра
Хушани ухІебалтни,
Гъарилла къакъла гІела

Малаикван тІашдилзни,
Хушани дедибти жан
НехІекъти хІдиахъес,
ДурхІнала дурхІначил дарх
ЧехІебиуси гІяскар
Алавчар кабилзнилис.

АХЪМАБУРЦИДА КЪАРКЪА

Ахъмабурцида къаркъа
Курличи чебушибси,
МухІли дукаркІаллира,
УркІи сабну къакъали.

Ахъмабурцида къаркъа,
Шисимти шикъмалхъахъад,
Шахли дурцуну урхъи
ДуцІрумла дай аргълизир.

Ахъмабурцида къаркъа,
Дахъал сарну дигІянти,
Къясдешла бурбуна
УркІи сабну бяхъили.

Далути-хІедалути
Жаваб агар суалти,
Чумлара дургар илди
Дарман агар излуми.





Тавсултан СЯГИДОВ

ГІЯБИДЛА ХУХУРА ГУРДАРА

(Масхара)

Сунелайчил барх бабгес
Унралара сасили,
Савли ГІябид дуравхун
ЭмхІелис мухьи бегІес.

Дуразличил хью бацун.
Сури мухьили бицІиб,
«Дерхьили дакІаб!» или,
Гьели велгІес вехІихьиб.

Унраличиб колхозла
ГІяргІнала ферма сабри.
ГъямдикІули хІябал хя
Гурдас гІергьидухьири.

ТІерхьяличил ГІябидра
ИлдачивяхІ ветухун.
Сенаж кархьул курлизи
Пакьир гурда тІяхІбухун.

Кур-алав дуцІдикІули,
ГъямдикІули сар хури.
Курла лутІилаб гурда
«БекІили» кабихьири.

Чедирад хурала гъям
Гурдачи чедихулири.
Пакьирла биштІал уркіи
СягІятван кьутІбикІулири.

Фермализиб буцибси
Дагъара кІапІбуцили,
«Аллагъ, балагълизибад
Берцахъаба!»- бикІулири.

Гурдаличи пукъалар
ХІябал дурхІя хІерлири.
Дагъа кили, дурхІначил
ХІяз барес пикри сабри.

ТІерхьяли гъакІикІули,
Хури кункли дугІаиб,
Вайлизи гъая бигъи,
ГІябид курлизи кацІиб.

Курлизибад чедибяхІ
БекІиб дагъа лайбакІиб.
«Гурда хухучи аркис» -
БекІлизи пикри бакІиб.

БекІилили вирххІерхули,
Ахьбуцили халбариб.
Саби мицІирли биъни
Гурдали дигІянбариб.

Гурда чеди лайбакІес
Ухъна бажардихІейкиб.
ХІяйнайс игъубхІелира,
Ил гІелабяхІ кабикиб.

Гябидли сунечибад
Къанда хІяка чеббатур,
Начиван хІякализи
ЦахІнабли гурда бергур.

Ухъначи ца хІербизес
Гурдали хІули абхъиб,
«Биубси бизес» или,
Гур сагали чебихъиб.

ХІяка чегъурси гурда
Гъаяла дубли бигъун.
Вамсайчи угъикІули,
ХІилхІи чеди дуравхъун.

Гъайялизи бигъунси
Гурда кункли дурасиб.
Илра шайубуцили,
Сай умхІачи чариуб.

ХІянчи тамандарили,
Ил чарухъес валкъаур.
Дуразла бекІ дукІлизи
Гябидли дебабриб.

ХІякализибси гурда
Гавлаглизи кабатур.
Хъар бигъун гавлаг кункли
ХъуцІарличи сурбатур.

Гябидла хуху хъулир
Хуреглизи рархилри.
Мурул чарухъунхІели,
Азихъра сабаилри.

– ХІед нуни савгъат хира.
Аризи, дурарухъен.
ХъябцІарлис гурда кира,
Гъари, делхъли карухъен! –

Маза къапІа някълабли,
Гябид делхъли ветухъун.
Хуху гъаррашахъули,
Азбарлизи дуравхъун.

– Иш сабив хІела гурда?! –
Гавлагличи гъамриуб.
Хъар арзили гавлагла
Гур ил рухІна хІерризур.

ХІякализибси гурда
Чебаили уркІрухъун.
– БебкІахъилри иш хІуни! –
Илмадан хъутуррухъун.

– ХІед дигули риадли,
Гули бицесра рируд.
Илис дикибти арцлис
ХІяка асесра рируд.

– ХІяка чегъурли гъанна
Ну чина аркъусира?
Ишис дикибти арцлис
Холодильник исесра.

– ХІед дигуси асану,
Дила хІяка бакІахъа.
БяргІили балкъаайчи,
Гурдала гули архъа.

– Суратван жагасигу!
Гъуя, хІела абас бат!
Иш нясли гІяндбакІадив,
БакІахъили мусибат?

Гурдала къуйрукъ сабри
Рухънас жагабизурси.
Гурда язихъбизурли,
Нургъби булан датаиб.

Рухъна рисули лерли,
Гурдали хІулби абхъиб.
Хухучи хІербизурли,
Харчбизурли, ил бебшиб.

– Гъарагу, буца! Гябид!
Бебшили аркъулину!
БебкІили бургар или,
Рисули калунра ну.

ДуцІухъен, гІеввиудну!
Бebшили чебаагу.
«БярГІайчи гули архъа»
АхІенрив виКІули хІу?

– Гурдас гІевваэс дила
Агара кункти кьяшми.
ХІилхІирагу вашуси,
Дуцили изул дуйми.

– Тупангалра игъагу,
Бebшили аркьюлину!
Цурмачи къяйкикІули
Вирадигу гъалав хІу!

Тупанг кайсисра или.
Ухъна хъули ветухъун.
Патиран кабихъили,
Тупангличил дуравхъун.

ГІябидла бухъна бердан
БекІла чедиб гурбухъун.
Къяйккла тІама аргъили,
Пакъир хуху урКІрухъун.

Миrшли балъун лугиван,
Ванзаличи геррухъун.
Тупанг игъубли, ГІябид
Кумекличи ветухъун.

– ТупанглизирадКІун хІу
АхІенри урухКІуси.
Дила хуху, черсаргъи,
Се саби хІед биубси?!

Яра хІунира гъанна
Наб гурдала дирулрив?
Гурда бebшили или,
РекІес пикрибарилрив? –

ДяхІла рангра двахъи,
БекІли гъакІикІар ГІябид.
– Гъари, хуху, черсаргъи,
Наб гурдала мадирид!

ДуцІли вякъи, хъулибад
Ши бицІиб бадира хиб,
«Чериргъахъури кункли!» –
Ил рухъначи бацІбариб.

Чумал минутла гІергъи
Рухънани хІулби абхъиб.
«ХІу къалли гъархІерулхъад!» –
ГІябидли хухузи иб.

Хуху кункли харчризур:
« Нукъа тупанг сайри хІу!
УркІи пІякъсабиркули,
ХІилхІи калунрагу ну!

Някъбази хІебикили,
Бebшибгу дила гурда.
Итинири бергунси
Дила мургъила Журда», –

КІелра хъатли рирхъули,
Чукъати къукъубази,
Гъандикибта ругъулри
Ил сунела ухънази.

– ХъябцІарлис гули бикес
Чинаба дила игъбар?!
Унрубази мабурид
Бетаурсила хабар, –

Лезмили тІямкърикІули,
БекІли гъакІрикІар хуху.
– Агъ, сунела хІулби дацІ!
Жагасира лебригу!

– Ит нуни гІурра бурцис!
КъакъамарикІудра хІу.
Ца ярга бebшилихъар,
ХІедухъар сунела хъу! –

Берданна хІярализи
ХІерикІули сай ГІябид.
– Ит гурдала хъябцІари
ХІякаличиб чебиид!

– Ил бархИи сабаайчи
Калишара гъари ну?
Марли, ГИябид, ит гурда
ХИуни гИурра бурциду?

– ЭэмхИеван гъаббуцили,
Ил хИела гъала лебкис!
ХИура хИеррихИахъули,
Нуни гули чебудис.

– Бати, ГИябид, гъачамлис
Ил сунези бихахъес,
Нура гъалакхИерикIус
Сагал хИяка бирбахъес.

Шакалра хИерикира
Гурдала сурат касес,


ДурхИнала дурхИнази ил
Ририра чебаахъес.

– Ил барес дигадли хИед,
Нуни гурда ахИенну,
ХИези сурат касахъес
Синка булан лебкисгу!

Илдала хабуртаци
ЭмхИе булан лехИихъур.
Хабурти детИибхИели,
Юртличибад бетихъур.

ГИябидли мухъи биршиб –
ЭмхИе саби кеплизиб.
Хухус биркул хИякала
Хабар саби шилизиб.





Ильяс ИДЗИЕВ

УМУТ

Баллада

Гямарла акЉуб урши,
Унрала – жагал рурси,
Илдачила хЉушази
Саби хабар буруси,

БиштГатала хЉязтазиб
КЉелра халабиулри,
Цализибад ца саби
ДекЉарли хЉебуулри.

Цалис изаурхЉели,
Итилра цЉумикЉулри,
Ца разивиубхЉели,
Итилгъуна урцулри.

Аркьулри дурхЉядешла
Дусми, дягЉла урчиван,
КЉелра халабикЉулри
ЗабхЉели халахЉеркЉван

ХЉера, илди жагъбиуб,
Мекъличи хЉядурбиуб,
Ца гъунчибад ганзбикЉес
Ца хъули хъурабиуб.

Ардякьун чумилра дус,
АлкЉусиличи хЉерли,
Сагадирули гъар дус
ВиштГалла савгъатуни.

Багъур чус къадарбиъни
ВиштГал агарси хъали,
БакЉибси чекайсули,
Ихъулри чули гъуни.

ДурхЉа агарси хъали
АнцЉубкъеси биалра,
Дигайла ца дилшахъул
БархЉи хЉебакЉиб цалра.

Ца бархЉи кЉелра жагъти
Шадиб-гъуйчиб къунзбухъун,
Ца кецЉа чебаили,
ИличибахЉи дуцЉубхъун.

БиштГаси, цЉумбикЉуси
КецЉа някъла буцили,
«Чинара хЉела аба?» –
Хъарбаиб исбагъили.

КецЉа саб хЉербикЉули,
Някъбази лямбикЉули,
«ХЉед гъалмагъли бирусну,
Арбукаба», – бикЉули.

Рурсили уршиличи
Тиладиличил хЉеръиб,
Уршила хЉерлизибра
УркЉила мурад аргъиб.

Чарбухъун кѣлра хъули
Разидешли биџили,
Кецѣалис кертѣиб ниъра
Ца сукура биџили.

«Се у лугехѣе ишис?», –
Хъарбаиб исбагыли,
Ваши, къабудиркехѣе
У бедес «Умут» ибси

Рурсили вигусила
Урџила мурад аргъиб.
Урџила хъурабиуб
Ца тамашала мугъур.

Чули букусила пай
Умутлисра лугули.
Кецѣали илдала гъай
Сабри хѣисабдирули.

Умут унзала гъалаб
Мурталра къарауџиб,
Азбарла аџибсилис
Гъунибии гъямличил,

Ардякъун чумилра дус
Умутра халабаиб,
Аллагъла урѣџили
Жагъгас уршира ведеб.

Хѣера, илди авалра
Даршули хѣрбирулри,
Умутла дирутачи
Разили хѣрбикѣулри.

Умут унзала гъалаб
Къарауџиб сахълири,
Лихѣбира дянгаили,
Гъар шайчи хѣрбикѣулри.

Насиб сирила ухѣнав
Муриси гъанкѣлизиври,
Неш, дудеш унрубаз
Азбарлаб гъайбикѣулри.

Уршила тѣмаличи
Ада хъули чарухъун,
Хъулибад, хѣили бяс,
Умутра дурабухъун

Чебаили Умутла
Хѣили бясунси мухѣли,
Адала михъирлизиб
Урѣи тямхъбухъун хъярхъли.

«Дила урши! Хѣяй аман!» –
Ада ахъли џѣумухъун,
Лаџличи чебяхѣяхъибси
Тупангра хапбарили,

Умутличи ветухъун.
Умут унзала гъала
Гербухъун, џѣум-џѣумбухъи,
Тамашала хѣрличил

Вегѣличи хѣрбикѣули.
Къяйкла тѣама бакъили,
Неш хъулирехѣ дуџѣрухъун,
Тупангра лайбакѣили,

Ада хъули ухѣнавхъун.
Ада чеваибхѣели,
Насибли «гѣя-гъу» дариб,
Хѣулбира чѣипѣдарили

Дукелѣили пархухъун.
Сирила мякъаб хъулиб
Бекѣ агарси чѣичѣала,
Гъаннара миџѣрлири

Кѣавлизиб хѣунтѣен хѣила.
Сунела хатѣаличи
Пашманиубси ада,
Буџили някъбани бекѣ

Чарухъун Умутличи.
Ахъбуџиб Умутла бекѣ,
Кѣапѣбуџиб михъирличи,
Чяхѣдухъун хѣулбазирад

Умутла рухѣ дикѣулри:
Се барес кабушира,
«Хѣебатуррагу цайли
Уршира чѣичѣалара?»

НЕСАНАС

Назикти хьуцІрумачиб
Зугъаси мах биханти,
Цайналра къияндешлис
УркІби мутІнгІхІейубти.

Духути гъайла дугъби
ДурхІнази гІердурути,
Дурхъаси баркъудили
Хъалибарг уржахъути.

Узи-уршила ургар
Лерил далдиркахъанти,
Урши-рурсбала хъулри
ДурхІнара дирцІахъанти.

Хушала дурхъати мез
Лер дила назмуртазир,
БучІухІели жагъилти,
Дархили далуйтазир.

Хушала ванаси някъ
ИшбархІи байбирулра,
«Нешани батаб!» или,
Аллагълизи улгулра.

Нушаб дурхъаси тІама
Даршал дус бихеная,
Байрамличил нешани
Мубаракдирулрая.



Учительла гІямзи

Земфира ЮСУПОВА



ДАРГАН МЕЗЛА ДУРСРАЧИР ДИДАКТИКАЛА ХІЯНЧУРБИ ДУЗАХЪНИ

*Учительла чебла саби –
дурхІнас гІяхІзесли узни,
илдала диги, хІурмат
ва бирхауди сархни.*

А. С. Макаренко

ДурхІначил мекелли халаси бяркъла ва дагърила чебкадси хІянчи бариб-си чевяхІси педагогла икІди дугъбачил къабулхІейкес хІейрар, сенахІенну дурхІнани чула учитель ункъли чейу. Секъяйда дурхІнас, хІязти дигахъу лебтанилра бала. ГІурра чардулхъехІе А. С. Макаренкола дугъбачи. Илини бурули сай: «ХІяз – баркъудиличи шурбулхъуси бузери саби». ВиштІаси хІязлизи ихъули сай, сенахІенну ил культурала, багъудила, дагърила даржалашал ахъикІули сай. ХІебиалли нуша, учительти, хІязла тяхІярла хІянчурбачил дурхІнала багъудила, бяркъла сурсатуни гъаладяхІ ардукес, чедицІахъес алавдикІахІелли, хатІахІедиркехІе. Амирбек ГІялиевич КъадибяхІяммаев викІуливан, «Я хъулкили бигІес хІейруси, я къркъирли уббихъили дигІянбарес хІейруси, я гъармукани кебасес хІейруси, я жаниварли талапбарес хІебируси нушала мезла давла» халабаахъес, имцІабиахъес, чеалкІуси наслулизиб ил дебабиахъес нушани лайикъси хІянчи барес чебиркур.

Гъамадли ахІен гъанна нешла мезла мугІяллимтас, хаслира шагъарла дурхІни бучІахъутас. Дубурла мер-мусаличибти дурхІнира урус мезли саби имцІали гъайбикІути. Биалра нушачиб чебси саби, нушала миллатла давла батахъес. Ил баркъудилизиб нушаб кумекладиэс дирули сари декІар-декІарти хІязани.

МухІлила ва белкІла дугъби гъаладяхІ ардукнила баркъудилизиб мягІни-чебси мер бурцули саби фонетикала, морфологияла ва синтаксисла правилоби ученикунани чедетаахъили далнили. Илдала кумекличибли саби дурхІни бур-сибирути бархъли лукІес ва чула пикри бархъли бурес.

МухІлила ва белкІла дугъби гъаладяхІ ардукнилис ва дурхІни бархъли лукІес бурсибирнилис хасдарибти хІянчурби ва хъарбаркъуни дарсличир пайдаладирес дирулра.

Дидактикала хІянчурби хІядурдирули, нуни лайикъси пикри бяхІчиули рирус дурхІнас рухІлашалси культура, интернациональный бяркъ бедлугнилизиб хІянчурбала ва хъарбаркъунала къадриличи. Дидактикала хІянчурбани нушала республикала тІабигІятличи, декІар-декІарти миллатунала адамтала пергер баркъудлумачи диги адилкънилизи лайикъси пай кабирхъу.

ИшхІелла школала гъала тІашдизурти мурадуназибад ца саби творческий тяхІярли пикрибикІес балути, сагати къяйдурти пайдаладирес балути дурхІни абилкъни.

Нушала дигуси ВагІайчи, бузераила адамличи, халкъла историяличи, культураличи, литератураличи диги адилкънилизиб нешла мезла къадри мекелли халаси саби. Ил багъандан нушаб, дарган мезла учительтас, гІергъиси замана нешла мезличи диги ва илди руркъниличи бяхІчиуиси пикри имцІабарес чебиркур.

Школьникунала гъар шайчирадти багъудлума имцІадикІахъес багъандан, илди даим мурхъдикІахъес ва чедирцІахъес хІяжатси саби. Ил баркъудилизиб лайикъси мер бурцули саби дурхІнани касибти багъудлума пикридирнили. Ил багъандан ит яра иш класлизир дидактикала хІянчурби дурадуркІухІели, нушани пикрилизи кайсулра илди хянчурбала дарган мезла программала тІалабуначил уржили дархдасахъниличи.

Дидактикала хІянчурби пайдаладарес вирар дурхІнани класлизиб чула хІянчи бирнилизир, учительли хъули хІянчи хъарбирухІели, сагаси дарсла мурад гІебисухІели. Илдани, хІязла тяхІярли, къас-къасли бархІебарили дурхІнази секІал багъахъес кумекбирули сари. Амма, урус мезла ва цархІилти предметуначил халдарибхІели, дарган мезли дурадухъунти дидактикала хІянчурбала пособиеби дебали камти сари.

Нуни дурсрачир пайдаладирули рирус Р. МяхІяммадовла «Тамашала грамматика», У. ХІясановала «5-ибил класлис дарган мезла дидактикала хІянчурби», А. КъадибяхІяммаевла «Дарган мезла кружок», ГІ. Къурбановала «ГІяжаибси азбука» ва ц. Илдигъунти хІянчурби дурхІнас гІяхІдилзулира дирар.

БелчІудиличи дурхІнала диги, имцІадирули сари илди хІязла аги-къяйдализи бархбикахъалли. ХІязлизив учІан вяшикІули сай саял, гуж агарли. ХІязла мурад – мягІничебси, къайгъи дакІубирусси хІянчи дурхІнала пикри битІикІусили, иштяхІдурхъесили, хІяздурхъесили бетаахъни. Дарган мезла дурсрачир пайдаладирути сари дидактикала хІязани. Илди пайдаладирнила дарсла белгиси бутІа сунела мурадуначил балбикибси журализиб пайдалабирнилизиб саби. БелчІудила чебкадси хІянчилизи нушани абз, жал адицІахъулра, бархбирхъулра; хъарбаркъ гъарбизнила хІясил биалли хІязличил, хІязла къяйдаличил бархбасунси саби.

ХІязани-хІянчурбани дурхІнала бекІлизиб секІал бихІни, пикри бяхІчаибдеш, гІеббетаибдеш, арагІеб багъудлумала авид гъаладяхІ аркули сари.

Илди хІязани гъалар касибти дарган мезла шайчирти багъудлумачи хъарахъибти; грамматикала чиди-биалра темала шайчирти багъудлума тІинтІидихъести; сари дурадуркІес дурхІнас имкантили диэсти, дебали къяянхІедурхъести, дарган мезла шайчибси сегъуна-биалра хІялумцІлаличил дархдасунти;

ахирлизиб чула къяинна сархибдеш сен-биалра багъарбухъести; сари дурадур-кIухIели, дурхIнала гъира, иштяхI акIести, чебаахъибси заманалис тамандарес виэстили диэс гIягIнибиркур.

Гъарил хIяз абзличил дурабуркIули бирар. Абзла сархибдешличи гъарил бутIакъянчи разиарар.

Гъарил хIязла хъарбаркъ таманбарнилис лайикъси кымат кабалтес чебиркур, иличирли хIязличи дурхIнала къайгъни, иштяхI, гъира имцIадирар.

ДурхIнала сархибдешуни кыматладирули, учительли илди бегIтала ва цархIилтала гъалаб гапбарес вирар, илди разбиахъести савгъатуни, ил лугIилизир жузира дедес вирар, балани кадатес вирар, грамотаби дедес вирар.

ХIера ит яра ишил тема ахирличи бикибхIели, ил кагахънила чебкад хIянчи бирухIели дурадуркIес вирути чумал хIяз.

ХIяз «Дев барсбара»

Учительли дев буру. Илизиб ца хIярп барсбирули дурхIнани сагати дугъби диру. Дахъал дугъби дарибси чедииркур.

Масала: Мякъ - дякъ, къякъ, тIякъ, ...

Тур-тугъ, туп, нур, кур, зур, ...

ХIяз «ИмцIабара биркIан»

Иш хIяз барес вирар «Существительное», «Девла лексикалашалси мягIна» темаби руркъухIели.

Учительли существительное буру. Иличи на биркIан имцIабирули, сагаси мягIнала существительное бетаахъес дурхIначи хъарбиру. Дахъал дугъби дарибси чедииркур.

Кура (уркура), къакъ (къакъба), у (ута, ула), хя (хяса), хIи (лихIи), цIа (вацIа), хъи (мирхъи), хъя (хъябхъя), ...

ХIяз «ХIярп имцIабара»

Учительли дев буру яра лукIа. Иличи ца хIярп имцIабарили, дурхIнани сагаси дев бетарахъу.

Масала: Ула (хIула), ши (шин), къача (къачагъ), гIякIа (гIянкIа), къяга (къядга), дам (адам), мура (мурад), къя (къял), ...

ХIяз «Пикрибарибси дев чиди гъайла бутIа сабил багъирая»

Ил балуси саби суаликIули. Ца ученикли дев пикрибиру. ГIурилтани суалтачибли ил дев чиди гъайла бутIа сабил кабилзахъа. Масала:

– Ил гъайла бутIа падежуни хIясибли барсбикIару?

– БикIар.

– Жинс хIясибли барсбикIару?

– ДарсдикIутира лер, лер хIедикIутира. Нуни пикрибарибси барсбикIуси саби.

– Илини секIал яра илала лишан, лугIи чедиахъув?

– Ил лерилра илдала мерлаб бузес бирар.

- Хебиалли, ил местоимение саби.
- Саби. Нуни пикрибарибси сай ибси дев сабри.

ХІяз «ДигІянбикибси дев»

Учительли дугъби луга. ДурхІнани илдала духІнар цархІилти дугъби дургу. Илдани чула мисалтира делкІес бирар.

Сирис, ганзухъ, къакъба, гуми, хъарахъ, гажин, уси, гав, гили, вачар, къутІкъутІи ...

ХІяз «ИмцІаси барга»

Иш хІяз дураберкІес вирар гъайла бутІни тикрардирухІели.

ВатІан, неш-дудеш, нуша, хъалибарг.

Аргъира, вагъурра, чераира, багъира.

ЦацахІели, ца-ца, кІикІел, хІяб-хябал.

ХъанцІа, вацІа, бяхІцІа, бухъуцІа.

ХІяз «Чили дахъал диру?»

ДурхІнас ца дев луга. Ил девлизирти хІурпразирад чили (белгиси заманала духІнар) имцІали дугъби даралра, ил чедииркур.

Масала: къабулагардеш къунзкабикІар

ХІяз «Жут барга»

ХІяз бирутас ца дев луга. Илизиб ца хІярп барсбарили сагаси дев биру. Масала: къякъ (дякъ), цула (цура), ваца (вацІа), мурда (гурда) ...

ХІяз «Дугъбала рахаж»

Учительли ца дев луга. ДурхІнана илизирад яргали дугъби диру. Гъар девла бегІла гІергъиси хІярп гІелабадси девла цаибил хІярп бетарар.

Масала: баз - зурхІяб - бархІи - ихтилат ...

ХІяз «КІел хІярп»

Белгиси заманала духІнар (2-3 мин.) 2 хІярплизирад цаладикибти дугъби тетрадунази делкІес. ИмцІали дугъби дарибси чедииркур.

Масала: зе, ар, хъя, хІи, хъи ...

ХІяз «КатхІел белкІунси дев»

Иш дидактикала хІянчи барес вирар фразеологизмаби руркъухІели.

ГІергъиси девличи белгиси хІярпличирад дехІдирхъути фразеологизмаби делкІес.

В	- ВерхІел дубурлаГела
А	- АбитІунси тургъуна
ТІ	- ТІулбази къаціжІес
А	- Агъу уркіла кабуціб
Н	- Нушала мез кадуршан

Масхарала суалти

1. Гъарил газала къяшми дирару?
2. Чиди къякъ устала ваяхІ ахІена?
3. УрзухІели арцан сегъуна галгаличи кабиръура?
4. Сегъуна къумурлизивад укес хІейрара?
5. Пашбизниагарли кІел бархІи забли урзару? ва ц.

КРОССВОД

Кроссворд арзахъес гъалабихъес вираp белгиси класслизиб существительное кагахІили гІергъи. Илала чеди, жавабтили диубти дугъбала (*существительноебала*) склонениера белгибарахъес вираp.

1.			Д		
			А		
3.			ГЪ		1.
			И		
5.			С		
6.			ПІ		
			А		
8.			Н		


1. ЛугІи ибси дев нушани дурсрачиб цараван секъяйда ирулра (бузахъулра)?
2. ХІеркІ ибси девлис синоним.
3. ЛукІнила ваяхІ.
4. Экзамен – дарган мезли сен-сен ирехІе иш дев?
5. Ризкъила ца жура.
6. Хъат някълаб бетаурси чІумаси кам.
7. Хъар шали авидли, къямли белши къапу даршес яра жагадешлис лацлизиб багурси мер.
8. БугІми хасси тяхІярли кадирхъули барибси халаси бекІа

Жавабти: 1. Къадар. 2. Варачан. 3. Кагъар. 4. ИмтихІян. 5. Сусул. 6. Къатав. 7. Арсавар. 8. ХІентІа.

Чедирти ва илдигъунти цархІилти дидактикала хІянчурбани адамла, хаслира виштІасила, творчестволашалти имканти гъаргдарахъес кумекбирули биъни ашкарси саби. Дурсрачиб ва дурсрала дураб бируси хІянчилизиp илдигъунти хІязани арагІеб дурхІнала къукъяла багъудлуми, устадеш гъаладяхІ ардикнилис сабабли дирули сари.

Дидактикала хІязанани илдала бутІакъянчибала багъудлуми чеахъдируси хІянчилизи чула устадеш , дагъри кадерхахъес, имцІадарахъес багъудлумала хълчилизирад чус сагатили диубти секІал, сарира дурхІнани чули дургес чебуркъахъули саби.

Дила покрили, ил журала хІяз учІайс бурсивирнира, къиянра, мягІничебси бяркъла жураpа бетарули саби.



**Хадижат
МУТІАЛИМОВА**

* * *

*Нешла мез детахъалли,
Ну пяхІли ветихъулра,
Нешла мез хІедагъасли,
БегІти агар азихъра.*

*Даргала далайливан
Дард сели гІур чебарку?
Нешла мезла девливан
ДеҫІ селипра убхІейсу.*

Расул БЯХІЯММАДОВ

НЕШЛА МЕЗ МЯХІКАМДИРНИ

Дарган мез азирти дусмазир даргала халкъли дузахъули сари. Илди мезли саби нуша, дарганти, ца къамла наслу диъни кабилзахъуси.

«Мез – гъанна миҫирли агарти, хІербирули лебти, гІур алкІути наслуби-ургабси бегІлара миҫирси бархбас саби», – викІусири урусла машгъурси педагог К. Ушинский. ХІебиалли, мезла кумекличибли нушани нушала хала бегІтала жывхІелла гІямруличила, бусягІят лебси хІякъикъатличила, даргантала челябкъалаличила дурусли багъес дирулра.

Сен гъатІи нуша даргантани гъаман нушала мезличила, лугъатуначила, нуша дегІси миллатличила хъумуртутирара? Сен дарган мез хІядяркъурли, илди хъумкартурли урус мезличичун хъарахъили хІердирутира? Нешла мез имҫІали руркъуцад хала бегІтала рухІла давлала мурхъдешра, муртрил даргантазир далгунти, ахІерли хІердарили нушачи даахъибти гІяхІти гІядатунира муръидилзан.

Ягъари, нуша дарганти миҫирли лерай, нушала мез дубкІутив? Вакилти миҫирли лебай, мез дебкІахъни, дила пикрили, неш лайракІнигъуна саби. «Нешла мез гІягІнили ахІен» бикІути гъар бархІира-сера нуша-ургаб къаршибиркули саби.

Гъарил неш дигуси дурхІяли илала хІурматбиру. Нуша даргантикІун дарган нешана даркъибтира, дяркъуртира, дагъриличи дикахъибтира. Даим нуша

нешла чеблалиур кавлутира. Илбагъандан сарра нуша илала хІурматбарес, ил разили, талихІчерли риахъес се-дигара барес хІядуртира. Дила пикрили, мезлара нешлагъуна хІурматбирес ва илди мяхІкамли дихІес гъарилла чебла саби.

Гъарил адамлис секъяйда вегІла неш дигулил, илкъяйда нешла мезра дигахъес хІяжатти сари, сенахІенну нешли бегІ гъалар далахъути сари сунела малхІямти цаибти дугъби. Илкъяйда цаибти гІямрула дурсрира кадирхъути сари илини илди мезли. Нешли жагаси тІамаличил сунела дурхІя усаахъес гардла далуйти дучІа. Хебиалли, илди мезличир нушаб гъамти, ахІерти ва хІяжатти цархІилти мез диэсра хІедирар. Амма сецад вираллира мезани дяркъес асубирар. Иличирли учІанна дагъри гъаладяхІцун аркъян, амма вегІла нешла мез хІедалуси адам сукъур ва гІянцІа вирар.

ГІергъиси замана бегІтани илкъяйда нушаб дурхъати ва хІяжатти мезличил чула дурхІни гъайбикІахъули ахІен. ЦацабехІтас гъанбиркули саби, урус мез далали, нешла мез хІедагъалира гІямал бетарар или. Илди гъанна чис хІяжатти или, кыматладарес хІебалусили увулхъули сай. ВегІла мезлис вегІли кымат хІелугалли, илди черяхІхІедиралли, чис хІяжатти гъатІи илди?!

Хебиалли нушани, чеалкІуси наслули, нушала бегІти ва хала бегІти гъайбикІули калунти, илцадра нушаб гъамли детаурти мез мяхІкамдирес ва гъаладяхІ дикес чебиркур. Илкъяйда барес вирар чІянкІли дурхІни нешла мезли гъайбикІахъес къайгъибираллицун. Нушани иткъира далулра илди. Нушала чеалкІуси наслулизи хІедяркъяхъехІелли саби илди детихънила урехи алкІуси. Учителътаницун илди калахъес къайгъни дакІудирули гІямал бетхІерар. Халаси хІянчи дураберкІес хІяжатси саби дурхІнала бегІтачилра. ДурхІнала бегІти мугІяллимтани чула бегІлара жигарчебти кумекчиби бетаахъурли, нешла мез руркъяхъес чебиркур. Миллатунала мезанала учителъти цадиубли, нушала нешла мезани калахъести тяхІурти далдуцес чебиркур. Нушала республикала ва улкала бархли руководстволічи дугъадизурли, мез мяхІкамдарести ва илди гъаладяхІ дашахъести тяхІурти далдуцес хІяжатли саби диубцад жявли. Илкъяйда хІебарахІелли, гІур къанни бирар.

Шагъуртазиб ва шимазиб чула дурхІни школализи башули нешла мез ункъли руркъули дургар или пикрибикІути бегІтира бургар. Илдани илгъуна мягІничебси бетуцлизи пай кабихъес хІяжатси биъниличила балули хІебургар. Илдигъунти бегІтази дарган мезла мугІяллимтани аргъахъес хІяжатси саби, учителъли сецад къайгъибаралра, хІушала кумек агарли, дурхІнани нешла мез хІеруркъу или. ХІушанира ил шайчиб белгиси хІянчи барес къасбарая или, илдази гъайбикІес хІяжатбиркур учителътасра. ЦархІил селра хІебаралра, бегІти чула дурхІначил хъулиб гъайбикІалра, мезличи бурсибирути саби. Бахъалгъунти бегІти чула дурхІначил урус мезли саби гъайбикІути. БегІта, халадеш дирули, чунира илцад-декІар хІедалути урус мезли гъайбикІули саби чула дурхІначил. ЦацахІели дурхІни, урус мез ирнилизир бегІтала хатІаби хІясибдирули, дукаркІули бирар. Хала неш яра хала дудеш дарган мезли, дурхІни биалли урус мезли гъайбикІути анцІбукъуни дирар.

Нешла мез дигахъуси цалра адамли урус мезла яра дурала улкнала мезанала къадри уббирхъули ахІен. Урус мез гІяхІил дални – ил пачалихъла гъалабси чебла саби. Илди мезла гІяхІдешли, нуша дарганти, лебил дунъяла литератураличил, культураличил, халкъанала историяличил тянишдиэс дирулра. Биаллира нешла мезли адаблати къиликъуначила, мурталра дарганти-ургар черяхІдирути яхІ-ламусличила, инсантаци ва мицІирагличи дакІудироти уркІеци-ряхІмуличила, сахаватдешличила, вегІ акІубти мер-мусаличи, ватІайчи дигиличила, узидеш-мардешличила хабурти иргъути адамти, дила пикрили, рухІлашал давлачебли бирар. Хала бегІтала мез хІедалути инсанти наб хІячмазибад бердибтаци мешубилзан.

ВегІла бегІтани вегІлизи ункъли дагъахъурти, вегІлис илцадра гъамтили детаурти мез, се багъандан чула дурхІназира хІедалахъутил, аргъес гъамадли ахІен. ЦархІилти миллатунала – франциялан, анлиялан, немецунала мезани дурхІнази дяркъяхъес багъандан имцІатигъунти бегІтани гІяхІцад харжанира дарили, дурхІни бучІахъули саби. Пикриухъалли, дурала улкнала мезаначир вегІла нешла мез камли хІяжатдиркуру дурхІялис гІямрулизир?

Илди лерилра секІал пикрилизи касили, хІурматла дарганти, даширая мугІяллимтанира, дурхІнала бегІтанира, школала бучІантанира, хІякимтанира нушала миллатла мез мяхІкамдирехІе



Аминат
ГІЯБДУЛМАНАПОВА

ЛИТЕРАТУРАЛА ФЕСТИВАЛЬ

Камси гъалабван биштІати дурхІнас ва жагьилтас хасбарибси «Литературала фестивалъ» бетерхур Астраханьнизиб. Ил дураберкІес пикрибарибсири «Культура» бикІуси проект хІясибли. Ил фестивалъла бутІакъянчи сарри нура. Астраханьна писательтала Союзла председатель, машгурси поэт, тилмаж Юрий Николаевич Щербаковли ну ила жирарира, набчил рарх лерри табасарантала поэтеса Исрафилова Сувайнатра.

Ил халаси, мягІничебси фестивалъла бутІакъянчиби гІяхІцад лебри. Москвализибад Толстой Владимир Ильич, – Р.Ф-ла Президентла, Культурала Советла председатель, Набоков Александр Михайлович, Интернет – порталла бекІ редактор ва цархІилти.

Ярославлизирад Орлова Анастасия Александровна – писатель, тилмаж, Матюшкина Екатерина – писатель, Санкт-Петербурглизирад. Шурганова Лариса, поэтесса, Калмыкиялизирад. Аманова Солмаз, Азербайджа писатель (Баку шагъар).

Ил фестивалъ хІябал бархІи бухъянбитІун. Театрла парклизир творчестволис хасдарибти 20-цад площадка цаладахъиб. Илди площадкабачи гІяхІцад адамтира бакІиб, дигесли сабри, халатани чучил барх килри гІяхІцад дурхІнира, сенкІун ил дурхІнас хасбарибси фестивалъ-байрам сабри. Гъарил шагъарлизибад бакІибтани жузала выставкаби дурадερкІиб. Жузи гІяхІцад дурхъатирри, диалра дурхІнала тилади хІясибли бегІтани илди исулри.

Сагати жагали суратуначил далкъаахъурти жузи шалкІудуцили, дурхІни разили дурабулхъулри, илди площадкабачирти тукентазибад.

Жагаси, адам хІяйраниэси «Театр Опера и балета» бикІуси юртлизир даимдариб цацадехІ далдуцуни. Писательтачил гъарра шайчибад бакІибтани ва нушачил гъунибаъниби дурадερкІиб. Гъарилли чула назмурти делчІун. Цалис цали жузира савгъатдарира.

Ил фестивалъ-байрам гІурра жагабариб Астраханьна жагьил далайчибани. ДурадερкІиб викторинаби. Чедибикибти дурхІнас савгъатуни ва грамотаби дедиб.

Нушала – Россияла дурхІнала писательтала произведениеби хІясибли кадихъибти ДурхІнас хасдарибти фильмаби чедаахъиб. ГІяхІцад дурхІнас хасдарибти жузала автортачил нушара тянишидубра ва жузи савгъатдарира. Илди гъунти хъумхІертести гъунибаънибани гІяхІцад асар бариб дурхІначицун ахІи халатачира. Астрахань шагъар къунзбарира ва «Волга» хІеркІличир катерличир кадухъунра.

Илди гъунибаъниби хъумхертести сарри, узби-рузбиван хІулкІули разили
хІябал бархІи нушаб хІябцІали бархІиван духъяндитІун. Нушала чеалкІуси на-
слулис илдигъунти гъунибаъниби мурталра хІяжатти сари.

Астраханъна поэтунани нушаб гІяхІцад жузира савгъатдариб.

Юрий Щербаковла чумал назму шурдалтулра.



Юрий ЩЕРБАКОВ

ХІЕБЛА ДЯГІ

Мартла дягІли
Лебил дуги
ГъакІбикІули,
УфбикІули,
ЛапІбикІули
ТІутІубариб
Бухъна яни.
Халаси бушкай
ХІяршбикІули,

ГъакІбикІули,
ДугІрухъ къяйда
Гъарил шайчи
ТІутІубариб
Бухъна яни.
Арбукъес хъул агарси
Мартла дягІли
Гъунар сархиб.

САВЛИ

Ниъла тІемли
ТІембикІахъес
ИшбархІила
БархІехъра,
ИкІабяхІ авлахъличи
Архули саби
БерхІила

КъерхІе къял
Мукукращиб
Ахъбуцили,
ГІяйбиахъес
Авлахъличиб.
Архули саб
КъерхІе къял.

ГІИНИЗЛИЗИБСИ КЪУРГЪ

Илис илкъяйда бикІар
ГІинизлизибси къургъ или,
СенкІун ил гъарил дуги
ГІинизлаб хІеркабирар.
ГІятІни къяйда дахъ кункли

Дурцули сар зубарти,
Лерилра къяриули
Илаб бамсри ихъули
ГІинизлаб хІеркадирар
Къургъ дугути зубарти.

ГЪАГУЛТИ

Закла хъанца хІеркІлизир
Гъагулти дизули сар,
КІинайс берхІила удир
Делгайчи хІеркадирар.

ХІейгахъу илдас дяхІци
Илар илди кІундицІур,
ГІур чилилра чедаэс
Я даргес илди хІейрар.

САВГЪАТ

КецІала акІуб бархІи
Сабаиб, разибиуб,
Савгъатуни хиб илис
ХІябилра разибиуб.

Амма ца анцІбукъли
Лебил тамашабариб,
Даг Шарикла халдарлаб
Илгъуна лига лебри.


Житала дурхІялира
БегІла гІяхІси савгъат хиб,
Торт хІехиб, цархІил селра
ГІяжаибси тІагІямла.
Лигала ца бутІа хиб,

Ил бетахъили лебил
Илабти васвасбухъун,
Марлира ил лигарив
Шарикла халдарлабси?

ЦархІилти берклумачиб
Ил бегІлара гІяхІсири,
ТІягІямлари, тІемлари
КецІара разилири.

ГъатІи чинабикибсив,
Житани арбухисив,
УрхІла бигІунси лига
Савгъатлис халбирисив?





**Аминат
ГІЯБДУЛМАНАПОВА**

БАРАКАТЛА НЯКЪБИ

Тамашала адамти хІербирули саби нуша-ургаб: къисматличи гІярзхІебикІули, чучи хърси хІянчи уркІила буйрухъ хІясибли таманбирули, саби алавти чус булгахъули. Илдигъунтазирадси сари ГІялиева Шагъризат Кърбановна. Ил акІубси сари Ахъшала районна Цугнила шилизир. Илала дудеш Кърбан Булатов шилизир учительли узиб ва партияла хІянчизарли калун. Неш Хадижат Рабаданова шилизир колхозла хІянчизарли рузиб. Дербентлизи шуррухъунхІели, илара ил хІялалси бузерилизи ахъиб.

Илала чихъси даражала бузериличи хІукуматли пикри бяхІчиаиб ва шагърла депутатли рикІиб. ХІукуматли илис, шабагъатла дурабад, хъалира бедиб. Бузерила адматас илдигъунти гІяхІдешунира дирутири итхІели.

СирхІянти чинабалра бажардичебти ва жигарчебти халкъ саби. Хадижатла халати баркъудлуманира, хІялалси бузерилира, адматешла къ依ликъунанира дубурлантала багъара ахъдуциб или рикІасра, хатІа ахІен. Совет хІукуматла замана илдигъунти гІяхІил чебиутири ва гърра шайчибад уркІичеббирутири.

Шагъризатлис убай нешра къадарриуб. Ил Урцакила школала историяла мугІяллим, Булатова Александра Ивановна сарри.

Дила гІямрулизиб бегІ гъалаб саби убай нешличила дурхІни гапбикІули чебаибти, Шагъризатличилси ихтилатлизиб сабри илгъуна аргъибсира.

«Александра Ивановна наб убай неш риалра, кІиэсил учительница сарри. Хъулибра дурсрачибра илала гъарил хърбаркъ таманбирули, урус мезли гъайрикІес бурсириубра, школализир ункъли ручІира. Ункъли ручІули, шила школа таманаили гІергъи, Каспийск шагърлизибси медучилищера белчІунра. Медучилищелис гІергъи Цугнила шилизир фельшерско-акушерский пунклизир рузиб. Дагъистайзивра машгърси тухтур МяхІяммадов ХІянапила хъунул, гинеколог Шагъризатли, акушкерстволичи илала диги имцІадиахъуб.

Илини дурхІни биркъутас сегъуна кумек хІяжатсил набзи багъахър. Ну илдас мурталра баркалла рикІулра. ДурхІни биркъутачи гІяхІцад дигира уркІецира диэс гІягІинити сари акушеркала. Кахти къиянтазиб алкІути саби дурхІни, ил багъандан мурталра мякълар рирусира нура.

Александра Ивановнани наб кІел узира ца рузира баркьиб. Узби Анатолий ва Булат Санкт-Петербурглизиб хІебирули саби. Рузис Наталья бикІар. Нушала уржибси хъалибаргли тухумдеш дузахъесра гІяхІил бала.

80 ибти дусмачирад Дербентлизир хІеррирудра. Илаб акушерла хІянчи бузахъулра», – рикІи ил.

Шагъризатли, дила суалтас къантІ-къантІли жавабти лугули, дахъал дусмазиб, бамсри хІебалули бузахъубси хІянчиличила буриб.

Гъайгъайра, акушерла хІянчи гъмадси ахІен. Илис дурхІни биркьути чумра хъунул адамлис къалабаси кумек гІеббаахъес чебуркьуб. Гъарил хъунул адамла цагъуна арадешра хІебирар. Къияйчил дурхІни биркьутала мякълар камриэс илис асухІебири. Шагъризатли сунела хІянчи ункъли бални багъандан илис баркалла бикІути бахъал саби.

Пандемияла манзил, арагІеб дунгъяла адамтасван, тухтуртасра дурхІни биркъантасра дебали къиянсила бетаурсири. Ара-сагъти адамти хапли бубкІулри. ВиштІаси варкъес баибти хъунул адамтас кІиркІали кумек хІяжатлири. Дуги-хІери больницализир дуркІес чевкъусири Шагъризатлисра, амма чумилра дурхІяра нешра берцахъиб илини. Илгъуна сари нушала дубурлан, дагърикара ва сикІрула някъбар, умуси уркІила регІ Шагъризат Къурбановна.

Халаси замана больницализиб буркІули риалра, Шагъризатла пергер хъалибаргра леб. Илала рурси Зайнаб Ибрагъимова чумал багъуди касес бажардирикиб: Халкъла хозйстволла институтла экономикала факультет, Финансы ва кредит, МяхІячкъалализиб медучилищера таманаиб. Гъанна ил рузули сари медучилищела хІянчизартала санигІятлашалти устадеш чедирицахъуси отделлизир.

Шагъризатла урши ГІялиев ГІяли МВД-лизив узусири. Илини Дербентлизиб Азербайжа пачалихъла университетла филиал таманаиб. ГІур биалли – Дербентлизибси сельхозтехникум. ХІукуматла къуллукъуни дузахъухІели, илис вагъабионтачилти вшатІайчил къаршиикес къадарбиуб. Илдани акІахъубси къукъяли халати палакатдешуни дакІударибтири. Илдачилси дергъелизиб пергер адам, хІябал дурхІяла дудеш ГІялила арадеш нукъсанбикиб.

ГІялини дявила далдуцуназир дакІударибти гъабзадеш багъандан гІяхІцад шабагъатуни ва ХІурматла Грамотаби касиб. Ил заманалис гъалав пенсионер ветаур. Биалра, ГІялини гъаннара, ВагІа хъарбаркъуни ихъули, гъабзала хІял-табигІятра дихІули, кулпет хІербирули сай.

Илдигъунти шантанира, бегІтанира, улкалира пахрубирести дурхІни абикъур Шагъризатли ва илала гІямрула вархкъя МяхІяммад ГІялиевли.

ГІямрулизив сецад жагали, къардхІелхъули ганзикІули виалра, адамлис къисматли гъанагарси бяхъ чейгахъули бирар. Илкъяйда Шагъризатла мурул гІямрулизивад жявли шалгІевухъун. Ил декІси бяхъли чуйнара цІумрухъахъун. Биалра, илди гІямру сари.

Шаласи сипатла регІ, умути ва шараван мурхъти илала хІулбачи хІеррикІули, дила хІердигІянбарес хІерирули, ил хъунул адамлизивад берхІила шаладеш кайсули, ихтилатрикІули гІяхІцадхІи калунра. Набчира илини гІяхІси асарбариб. Ил хъунул адам хъумартес хІерирули гІяхІцад замана калунра. ХІялалти адамтачила гъанбикунани рухІла дяхъурби сагъдирахъутиван билзан наб.

Назмурти лукІниличила гъай детаурхІели, Шагъризатлис назмурти дигахъни ва студенткали рирухІели илинира илди лукІули кални ашкарбиуб.

Дила назмуртачил тянишириубли Гергъи, илини набчи зянкъдяхъиб ва сунела пикри буриб: «Дурхъати аятуниван хЕла жузи дучІулра, Аминат», – рикІи Шагъризат. Илгъуна кыматли ну, гъайгъайрагу, разирияхъубра. Держъаб хЕла ва хЕла гъамтала Гямру, Шагъризат Къурбановна! Эс дигулра набра.

Дила ахІерси Шагъризат, хЕд саби иш назмура.

УРХІЛИС ИГЪБАР БУРТІАН

СирхІяла дубуртазир
Шараб парчдохъунара,
ХЕла шала хІулбази
Севан адаціибара.

СирхІяла диркъурбачир
Хан гъундури лервара,
ХЕла къугъал башрили
Диркъдиахъубти вара?


Шагъризат, хЕла жан дат!
АхІенри хІу гІядатла,

ХЕла мургъила някъба
Абуциб чумра дурхІя.

ГІямрула архІябачиб
Чумлис гъарбизурара,
Баракатли буртІули,
Игъбарли баргибара?

Масличи ва арцілици
Дунъя хъарахъибхЕли,
ХІу Аллагъла керилис
Лерил ГІямру рузади.





Къади ГІЯЛИСУЛТАНОВ
Салимат ХІЯЖИЕВА

ГІЯХІГЪАБЗА ДУБУРЛАН!

Дагъистан гъалабяхІ арбукес мекелли халаси пай кабихъибсири пергер гІяхІтигъубзнала къукъяли, илдала лугІилизиб ГІялибек Тахо-Годинира. Машгъурси гІялим, жамигІятла ва политикала хІяракатчи, культурализи ва гІилмулизи халаси пай кабихъибси ГІялибег Тахо-Годи акІубсири ХІурхъила шилизив 1892 ибил дуслизив. Бара гъалабван ил акІубхІейчирад 130 дус дикнилис хасбарибси вечер бетерхур. Ила цалабикилри тарихла гІилму руркъути гІялимти, студентуни ва СМІ-бала вакилти.

Бахъал саби ХІурхъила шилизибад дурабухъунти машгъурти адамти, чунира улкала гІямрулизи халаси пай кабихъибти. ГІялибек Тахо-Годи бегІти гІядатла дубурланти сабри. Илала дудеш жявли гІямрулизибад шалгІевухъун. Дудеш вебкІили гІергъи, илдала яшав дебали усалбикиб. Цаибти багъудлуми илини касибтири Чумлила шилизибси мадрасализир. КІинайс ил сунела узи Башир ПалхІятлици Владикавказлизи вархъибсири. Башир ПалхІятли ва илала хъунул Ольга Кукоринани халаси пай кабихъиб ил айкънилизе ва багъуди касахънилизе. Илини гІяхІти къиматуначил Владикавказла гимназия таманбариб. Илала гІергъи ГІ. Тахо-Годи Москвала университетла юридический факультетлизи керхурсири ва ункъли ил хъараахъурсири.

ГІ. Тахо-Години жигарла бутІакъяндеш дариб Октябръла революция кабилзуси къиянси манзиллизир. Ил цаибти бурхІназивал улкала челябкъла багъандан бургъутала къяйлизи керхурсири. Иличил имцІали тяништи адамтани буруливан, ГІ.Тахо-Годи Дагъиста бегІлара багъудичебти ва ахъси культураличилти адамтазибад цализи халирусири. Кагибси политикван, халаси гІялимван, халкъла багъудила организаторван, пасихІси насихІятчиван ва литература гъалабяхІ башахънила шайчивси кумекчиван. Халаси пай кабихъиб ГІялибек Тахо-Години миллатла газетаби-журналти гъаладяхІ дашахънилизе. Гъарил баркъудилизир илини мурхъти къел датур. ГІ.Тахо-Години Дагъиста миллатла искусство, музейла ва библиотекала бузери гъаладяхІ дашахънилизе мекелли халаси пай кабихъиб.

1920-ибил дусла мартличив ГІ.Тахо-Годи Дагъистайзи чарухъун ва, Дагъиста революционный комитетла судла бузерила отделла заведующий ветаур, илкъяйдали ил берк-бержла комитетла масанала отделлисра бекІдеш дирес вехІихъибсири. Илини 1922-1929-ибти дусмазир республикала дебали мягІ-ничертaziбад ва къиянтазибад цали сабси халкъла багъудила комиссариатлис бекІдеш дарибтири. Цазаманализир прокурорла, ДАССР-ла халкъла комиссар-тала Советла председателъла заместителъла ва юстицияла комиссарла къул-лукъуни дузахъулира калун.

Г.Тахо-Години республикала районтази гьаман бузерила архЯби дурадур-кИи. Багьудила, культурала х!янчизартачил, г!ядатла дубурлантачил гьуниви, шимазиб х!ербирути х!урматла адамтазирад насих!ягуни кайси. Шимазир ба-гьудила, культурала сагати объектуни дак!удухънилизин илини мекелли халаси пай кабихъиб, сенах!енну илдазиб илини шимала челябкьла чебиулри.

Г.Тахо-Годила кьайгъначибли 1924 ибил дуслизиб Дагъиста багьудила г!илмула-ахтардила институт ва Дагъиста музей ак!ахъубтири. Институтлис илини г!ях!цад замана бек!деш дирулира калун. Илкьайдали институтла г!ил-мула библиотекала фонд чебиц!ахъесра халаси кьайгъи дак!убарибсири. Ин-ститутли Дагъиста тарихла, мезанала, культурала, фольклорла ва царх!илти г!илмула ахтардлума дурадурк!утири.

Г.Тахо-Години 1927 ибил дуслизиб «Дагъистайзиб революция ва револю-циялици кьаршиси дяви» бик!уси жуз дураибсири, 1928 ибил дуслизиб биалли – Уллубий Буйнакьскийличила бишт!аси жуз дураиб. Илди дусмазир илини илкьайдали г!ях!цад макъалабира жузира дураибтири: «1877 ибил дуслизир Чечня ва Дагъистан пунтдиъни», «Хъарх!ерагардешла гьунчиб», Мях!яч Даха-даевличила ва Сафар Дударовличила баянти дучибтири.


1929 ибил дула ахирличив Г.Тахо-Годи Москвализин гечуибсири ва РСФСР-ла халкьла багьудила комиссариатла бек!либиубсигъуна багьудила отделла за-ведующийла заместительла кьуллукъуни дузахъес вех!ихъибсири. Илала сипта х!ясибли, Москвализиб г!илмула-ахтардила миллатунала педагогикала инсти-тут ак!ахъубсири. Г.Тахо-Годи ил институтла цаибил директор сайри. Сагаси институтли улкала урусла ах!енти школабас педагогуни х!ядурбарнилизин, ме-тодикала ва белч!удила литература алк!ахънилизин белгиси пай кабихъибсири. Камси заманала бух!наб Г.Тахо-Годис саниг!ят ункъли бяркьурти х!янчизар-тазибад цалабикибси, уржибси коллектив ак!ахъес имканбак!ибсири. Мурхъти багьудлумачилси, ахъси культураличилси, адамдешла чихъти кьиликьуначил-си дубурлан адамли халкьла халаси х!урмат сархибсири. Сунечи хъарси сар-хибдешличил таманбирни багъандан, Г.Тахо-Годи чинав узалра, гапличи лай-икъиркусири. Нушала улкализиб багъуди гъалабах! башахъес, дагъистанланти багъудичебтили бетаахъес илини мекелли халаси кьайгъибарибсири.

Сепайда, Гялибек Тахо-Годила г!ямру жявли кьабдердиб кьадин... Совет х!укуматлици кьаршиси организациялизин керхурли сай ибти бугътантн чедихъили, 1937 ибил дула октябрьличив кавшибсири. Камти г!ямрулизир су-нела улкалис, халкьлис дахъал г!ях!дешуни дарес бажардиикибси Гялибек Тахо-Годила машгъурси у мучлаагарбарес балбизуртири. Эгер итх!ели ил г!яй-иблаварили ках!евшибси виалра, г!урра сецад сархибдешуни диишара...

Сагаси наслули халкьла шаласи челябкьла багъандан Дагъиста жамиг!ятла х!яракатчибани, илдада черях!ти баркьудлума хъумх!ертниличин дирхех!е. Ил-дала ургаб заклизиб шаласи зубариван ухули саби нушала машгъурси Гялибек Гялибекович Тахо-Годила ура.

Вечерличиб бахъал сабри Г!ялибек Тахо-Годила г!ямруличила ва илини да-рибти х!янчиличила докладличил гъайбухъунти

Библиотекала х!янчизар Салимат Х!яжиевани Гялибек Тахо-Годила бузе-рилис багъишлабарибси «Дагъиста асилси урши» бик!уси жузала выставкара гъалабихъиб.



Наида ГЪУРУЕВА



МАШГЪУРСИ АДАМТИ УЦАХЪАН

Дахъал санигІятуназибад адамтас бегІлара багалатази халдирули дирар тухтурла, учительла, лацла ва палтарла устала ва гІяхІцад цархІилти санигІятунира. Нуни дила белкІлизиб гъанбушибси санигІятра, дила пикрили, дебали адамтас чараагартазибадси ца саби. МяхІячкъалала урхъула дубличиб мерлабиубли саби Россияла МЧС-лизи кабурхуси адамти уцахъуси отряд. Ил отряд акІахъубсири 1992 ибил дуслизиб. Ил отрядли Дагъистайзибцун ахІенну, мякъларти республикабазибра адамти берцахъес кумекбирули саби. Илдани адамти къиян-жапализибад берцахъес чуйнара халаси кумекбарибсири Армениязлизиб, Грузиялизиб, Чечнялизиб ва нушала улкала цархІилти регионтазибра. БехІемцІуни детаурхІели бегІ гІелабтала къяйлизибри илди.

Илаб бузули ахъси даражала 55специалист леб, чулира Россияла ва Дагъиста бурибти, машгърти ва халкъани урғабси классла, цаибилра кІиибилра классла адамти уцахъанти ибти уми дихути.

Дагъиста адамти уцахъуси отряд Россияла МЧС-ла отрядлизи кабурхуси саби ва чуйнара лебил улкала отрядунала урғаб бегІла гІяхІси отрядлизи халбарибсири. Адамти берцахъес илдани кабихъибси пай хІисаблизи касили, Россияла президентла хІукму хІясибли ил отрядлизибти: Зиявдин НикІамяхІяммадовлис, Зияутдин МуртузагІялиевлис, ва Ш.ГІялиевлис «РФ-ла урибси адамти уцахъан» ибси хІурматла у бедиб. Чула гъамадли ахІенси хІянчиллизир сархибдешуни днахъес багъандан илдас акІахъубли лерилра шуртІри лер. МЧС-ла база мерлабиубси урхъула дубла раибхІели, илар нуни чедаира: спортзал, бассейн, скалодром, цІа дилшахъантала вышка, шинна уди кабицІес мер. Ил отрядлизибтани зарядка дирули, 5 километрличи ва къантІси 100-метрличи дуцІбулхъули, турникличи абицІули, куртІбикІули гъар бархІи физподготовка ахтардибурси саби, ва илдас къимат кабалтуси саби. Илкъяйдали лерил жура-ла техника ва къалабаси кумекла машинаби мурталра адамти берцахъес гІягІнибикибхІели 5 минутла духІнар дурадухъес хІядурли сари.

ИшбархІила нушала игит сай – НикІамяхІяммадов Зиявдин НикІамяхІяммадович – Россияла машгърси адамти уцахъан ва халкъани-урғабси урибси

классла адамти уцахъан сай. Ил акЉубси сай Лавашала районна Къарекъяданила шилизив. Ил отрядлизи (ПСО – адамти уцахънила – умцъерила отряд) узес ваКибсири 1993 ибил дуслизив. Илала бузерила гъуни бехЉбихъибсири 1972 ибил дуслизиб, Зиявдин 2 – ибил курсла студентли вирухЉели ва дубурла туризмаличи иштяхЉ акЉубхЉели.

Ит дус Чечняла ва Дагъиста дазуличиб халаси дяхЉи барили, машинаби ва адамти дяхЉили кЉапЉбарибтири. Илдас къалабаси кумек хЉяжатлири ва МВД-ла министрли адамти бучахъес хъарбариб. ГехЉел адам хЉядурбиуб, илдала ургав Зиявдинра. ДяхЉила ясирлизибад илдани бахъал адамти берцахъибтири. Илди биалли МВД-ли премиябачил шабагъатлабариб. ХЉера илхЉели къасбарибсири Зиявдинни адамти уцахъуси хЉукуматла организация акЉалли, илав сайра узес.

1974 ибил дуслизив ил Дагъиста экскурсиябала ва туризмала инструкторли ва адамти уцахънила-ахтардила кабизла начальникли узусири. Ил мерс дакъунси мерличи, дахъал заб дарили шин чедидахъунси мерличи, юртани гъятЉаибти мераначи адамти берцахъес вашусири. Первомайскилизир кадикибти анцЉубкуъуни видеокамераличи касили, суратуни дарили чедаахъибтири.

БегЉ гъалар ну иличил тънишриубсири, ил туризмализив узухЉели. ИтхЉели илини туристунала къукънас Дагъиста жагати мер-муса чедиахъули экскурсияби дирули узурли. Швейцариялизибад бакЉибти туристуначил ил нушала шилизира ваиб ва дила дудешла хъулир илдас гЉяхЉядеш дарира. Нушала шилизирти жъв заманала мижит, къала, чяхЉ-чяхЉи илдани ахъли къиматладарибтири. Швейцария Дагъистайчил мешубурцули, хабурти дурутири. Арбъкъи гЉергъира дудешличи кагъурти дурхъули бахъхЉи калунтири ва кЉинайсра шадиб-гъуни барес Дагъистайзи чарбухъунтири.

Зиявдин НикЉамяхЉаммадовли Дагъиста адамти уцахъутала гъамадли ахЉенси хЉянчиличила 30 фильм касили сай. МЧС-ла базализиб илала цЉакъаначил акЉахъубси музей леб, сунезирра адамти уцахъантала тарихличила баянти дахъал ваяхЉ цаладахъибси.

Муртрил ну хъуликЉусири, нушала улкализиб къалабали гЉеббиуси, адамтас кумекбируси къуллукъла организация акЉахъес. Ил акЉахъуб, ва ахъси даражаличиб саби, дурала улкназибти нушала бархкъябанира къиматбарили, дунъяличиб гЉяхЉсилизи халбирули саби. Нуни пахрубирулра илгъуна мерличив узниличи. Гъачам гъатЉи гЉямру галри, нуни тъп ил санигЉят чеббиркЉаси, сегъуналра бизнесмен яра цархЉил чи-биалра ветхЉераси, – викЉар Зиявдин НикЉамяхЉаммадович.

Марлира, ил чуйнара бехЉемцЉунази викиб, амма санигЉят бархъбатес гъачамалра пикрихЉебакЉиб. Ил гъанна 40 дусличив имцЉа ил санигЉятлизив узули сай.

Илини хъунул Зазачил барх авал урши-рурси абикъур ва гЉямрула бархъси гъуйчи дураиб. Леб дурхЉнала дурхЉнира. Халал урши Ислам дудешла дякъкад вашули, адамти уцахъан сай. Ил цаибил классла спасатель сай.

Нуша дирхулра Зиявдинна гъуни дурхЉнала дурхЉнанира чеббиркЉиниличи ва адамтас кумекбирули, багалатили бетарниличи. ХЉурматла Зиявдин НикЉамяхЉаммадович, челябкъалализиб чЉумаси арадеш, кулпетлизиб талихЉ, баракат диаб.


МАНДАРИННА БАЙХЪАЛА

Нуша биштатала бяркъличила гьаман гъайдикѹли дирехѹе. Секъяйда ва чили бяркъес гѹягнитити илди: бегѹтани, хала бегѹтани, школалити яра пачалихъли? Гьаларти дусмазир дурхѹнас акѹбхѹейчибад бехѹбихъили пачалихъли биштатала анхълизиб, школализиб, дуцѹрумла дурхѹнала лагерѹтазиб, колледжуназиб ва вузаназиб цагъуна пикри-бетуц къелгѹеббикусири. Лерилра пачалихъла организацияби адамтас гѹягѹси бяркъ ва багъуди дедес, арадеш мяѹкамбарес ва яшавла шуртѹри гѹягѹти днахъес къарауѹчир дузутири. СССР пашбехъубла гѹергъѹ иличил дарх багъудира бяркъра пашдехъубли сари. Итди дусмазиб акѹбти, гъанна халабаили неш-дудеш бетаурли саби, амма хѹякъкъатлизиб биалли илдасра бяркъ хѹяжатли саби.

Гъачам ну хѹянчиларад автобусличир хъули чаррулхъулри. Мякълаб нешра 10-11 дус виубси дурхѹяра кабиити лебри. Илди школализибад чарбулхъулри ва уршила тренировкачила ихтилатбикѹлри. Уршили разиагарли сунени секъяйда бархѹли беркѹлибал хабар бурулри. «Хъули мурт детиутира, ну гушлира» или урши цѹмикѹес вехѹихъиб. Нешли, пакетлизибад касили, илис булка гъабуциб. Уршили ил къабулхѹебариб. Нешли, гѹррара пакетлизир халтѹрухъѹи, касили илис мандарин бедиб. Гушиубли урги, урши, ил сасили, халаси иштѹхѹличил укес вехѹихъиб. Илхѹели илдала мякълаб кабиити нешра уршира лебри. Ил урши 9-10 дус виубсигъуна сайри ва иштѹхѹличил укусиличи хѹерикѹулри. Ил секѹал хѹисаббарили, нешли илизи тиладибариб итил уршилисра байхъала бедахъес, амма ил разихѹейкиб. Илхѹели нешли илизибад кебасили, хѹерикѹуси уршилисра байхъала бакѹлахъили бедиб. Мандаринна вегѹ висивирули хѹилхѹи калун, «дила саби мандарин, сен хѹуни илис лугуси, нура гушлира...» или къижикѹес вехѹихъиб. «Селра хѹебирар дила ахѹерси, нуни хѹед гѹррара исис, хъулирра гѹрра терал...» рикѹуси нешла гъайла дурхѹяли иргъули ахѹенри. Илдани дурути иргъуси набра, мякълабти цархѹилтасра гъарли-марли цѹахъизур. «Виштѹтали левай илцад къиркъирси, халаваибхѹели илизибад се бетарара?» – бикѹулри илдала хѹер. Нушала манзилкѹун гъарил тукейзир ва гъарилла хъа гъалабси къакъалар дуслѹа чидил-дигара манзил асес вирули сай мандаринтира цархѹил журала цѹедешра. Илцад мандарин багъандан гайцѹхѹейкѹалра, гашала дусмикѹун ахѹен. Чеди хѹерэсра я неш, я урши мискинѹтази халбарестира ахѹенри: жагати палтарлира бегѹбиублири.

Нешли бархъѹси бяркъ бедес дигули риалри, илаб ахѹенрину илини мандарин кебасили буртѹуси, сай гѹягѹулалити бедесли хъулив левалли иргъахъусири.

Гъаннала заманала бахъалгъунти биштѹати дебали чус саби баибти, чус саби дигути бетарули саби. Илдас бегѹтани ва хала бегѹтани гъар журала палтурти, беркеси, хѹязла ваяхѹи ва телефонти исули, селалра агри хѹебалахъули саби. Или биалра, илдазибад бахъалгъунти къиркъиртили ва селра барес хѹейгутили, азгъинтили халабиули, гъар секѹал хѹядурли дигули саби. Бегѹтас гъанбиркули саби, школализиб бучѹути дурхѹини учительѹаниѹун бяркъес чебси саби или. Чули дурхѹнала бяркълизити кабирхъуси пай биалли дебали камли саби, илхѹелира яшавла шуртѹри акѹлахъубли, цархѹилти гѹягѹнитити секѹалра асалли, илдас арѹра лугули, иличибли гѹямал бирусиван билзули саби. Гъаннала заманала бегѹти сабира бяркъес гѹягѹнили саби. Биштѹатас дигутани биркъули, бикѹули къяйда, илди «бекѹличи абалтули саби», «нушабра гъамадли ахѹенрину, хѹушанилра гѹягѹ касая» или, хѹятта илдани сегъунтилра къияндешуни чедаили хѹебиалра.



МяхІямад КЪАРАТОВ

БИСАЛИЧИР ДУКЕЛЦІИ ГЪАЛАРРИ

МяхІячкъалализвад АхъушавяхІ льякъулри. Дила мякълаб гІела шайчи кабиили лебри кІел биштІати уршира илдала жагъил нешра. Маршруткаларри нуша. Илаб кІелра урши разили дукарбирхІули, хІинцІирбикІули, разист агихІяйзиб сабри. Урга-ургади илди нешли май-майбирулри. Диргала малхъада я или. Амма илдала разити гІялагъажаличи, дукелцІиличи дила вайси пикри атхІекІуб. Разидешличичи гІимидухъес, разидеш анцІдукъес дирару хаслира биштІати дурхІнала сархІели илди.

Илдала разити думяхІлис маршрутка бицІили лебти адамти се бикІил, илдала се пикри акІубал хІебалас. Дила уркІиличи биалли илди уршбала думяхІли, разити дукелцІили гІяхІла шайчиб асар бирулри. ГъурбукІила ласбулхъ ахъили дашули лерли, кІелра узила ургала бамкъур. Се бетаурал илдала ургаб хІебагъурра, виштІалгъуна урши висес вехІихъиб, ил ахъли висулри ил хІейсахъес нешли дирути къайгъни дугІлатили детарулри. Уршини биса тІашхІейулри.

Илдала урга гъудурхІейрус или гъанбикили, яхІбарили уира гІяхІцадхІи. Илдала дукелцІи-думяхІли гІяхІси гъавлизи бикахъибси дила уркІила гъав буун. Висуси виштІалличичи уркІецІидухъун.

– Гъари, сен висулри, чи бикІара хІед? – хъар-хъарухъунра, гІелавяхІ шурухъи, ил висуси уршилизи. Уршили биса тІашаиб, хІулбира душкили, илини сунела у буриб, илис МяхІяммад бикІулри.

– Эй, дила ула узи уилригу хІу. Набра МяхІяммад бикІар. – ира нуни уршилизи.

– Разили дукаркІули левси хІу, сен хапли висесвахІири?

– Иш узини бяхъиб наб, илбагъандан висусира.

– Чи бикІуси хІела узис.

– Шамил бикІар, – иличивяхІ шурухъи МяхІяммад.

– ВегІла виштІал узичил вирхІес, я гІимукІахъес асухІебирар. ХІу къалли МяхІяммадличив гІяхІцадла халал сайри. ЦархІилти иличил бирхІялра, хІуни узи гІевуцес гІягІнисигу, – ира нуни Шамиллизи. Илини сегъуналра гъай дурахІебушиб, бекІра гІяшкабуцили, лехІкахъилри.

Лаваша адаибхІели, илди кабацІиб. Нешли наб баркалла багъахъур, Шамиллизи гІякъула гъай дурнилис. ГІур Шамил кацІиб, селра хІеили, илини

дила някъ буциб. ВиштІал МяхІяммадли разили, пишяхъили, някъ буциб. Маршруткала унзаличи каиб, тІашизурли, наб някъ ахъбуцили, кацІиб. Илаб дила уркІи пахрули бицІиб.

ирхаираягу, бисаличирра адамла уркІи бумкъахъути вайти гъайличирра, разити дукелцІира, шадти аги-хІялра даршналі гъалар сари. БиштІатала биаб, халатала биаб, ургала мурталра балги, разили ва шадли бираб лерилра гІямрулизиб.

ХІЕБЛА ЦАИБТИ БУРХІНАЗИБ

МицІирагличиб бузути адамтас савлиличирад бархІи ахъайчи хІянчи камагарси замана саби янила аргъ. Къяркъси янира бакІили, мицІираг дахес дугениличилра гІяхІил гІеббуцили хІебиалли хъарахъуназиб бузути адамтас янила аргъ дебали къиян булхъуси саби, мицІираг дахъал дубкІули дирар.

Ил секІал нуни гІяхІил баласра, мицІирагличив узули гІяхІцад дусмазив калунсирану. МицІирагличиб бузантани дуруливан, хала гъигъ балтули бирар, янила къиянти бурхІни шалгІердохъи, хІебла шала дикибхІели.

Янира гъала хІебра жалхІедухъи, хапли ванабиалли, шиниша къар гъардакІили, мицІираг къулайдикІалли, илди цІерхъдикІалли, букІунала уркІби шадли дирар, янилизир чедаибти къияндешуни хъумкарту. Хала букІун сайра или ну, цацабехІтиван хъуликайили хІевъаси, ярга хІясибли мазала хІенкъличил дуки вашули вираси, набчил барх бузути букІуни къяйдали.

ХІебла цаибти бурхІни, пергер замана саби, яни арбякъи, авлахъличиб гъава гъигъбарес гъамадли ва тІагІямли саби. селичил вирара ил тІабигІятла пергер замана цугбуцес?

УркІи разили, селичи сабил мягІни агарси секІайчи харили ва шадли батбухъи саби. КІел бархІира сера пикрумази вархили сайра, ягъари, селичи разисири дила уркІи или.

Илис гъалар шалгІердохъунти бурхІназиб ну разивіеси анцІбукъ хІебиуб, я челяркъути бурхІназиб уркІи разивіеси, ну шадвареси секІал пикривикІули хъалли лебсигъуна ахІен.

Ца шайчибад уркІи батбухъи разилихъалли, гъачамлис якъинни ахІенси секІал аргъес хІейрули бархібдешлизив сайра ну.

ХІера диркъбикличибхІ гъайбарили дила мукърала халаси хІенкъра, някълизиб хъусбарили букІунна балкІа хъяйхъира нура, ахъти деклар ахІенти, къадубачи имцІали, сиренничи мешути вавни дашути галгуба алавбуцибси къякълизи айцІулра ва хъяйхъиличи хъарихъи алавчарла гІяхІил гъарахъли бикайчи чебуси авлахъличи хІерикІулра. Ил авлахъ нуни гІяхІил балулра, ца шайчибад биалли балхІебалусигъуна саби. АнцІбукъ селизиб сабил шакхІеркулра. Гъаман мазала хІенкълис гІелавад вашули чуйна-чуйнара чедибяхъибси, чидил мерличиб сегъуна къарла къада бухъулил гІяхІил далути мер-муса ишбархІи ца гІяжаибли гъарзабиубсин, разидешли бицІибсин, багъес агарли бехІсурбиубли саби.

Ягъари, се анцІбукъ вара иш, уркІи гъавлизиб саби алавчарли авлахъра балли дила уркІиличил бархбасунсин ца тІагІямла агилизиб саби нуни гъачамлис аргъес хІейруси?

Къякъла хърличивад шурухъи, лебилра алавчарли чебиуси ванзаличи хІер аІахъунра. Ахирра ахир шакикира селизиб сабил анцІбукъ, сен авлахъ декІарси тяхІярли кабизурсил. Ванзала ранг дехІсурдиубли сари, агъ, ванзали яни арбякъи гІергъи сунела палтар дарсдирули абархили буили саби. Бара дакІубухъунси шинишдешла аварали дуили сари набзир аргъес хІейрути пикруми акІахъубти. Мазали бергесцадара аХІебаибси шинишдешли ванзала кабиз гІяхІла шайчи шурбухъахъи саби. ХІера гъари, селизиб буилил анцІбукъ. Гъала хІебла чумал ванати бархІили къяркъи янилизиб бусули калунси ванза чебаргъахъили саби. Ванзализиб ряхІмат леб, ванати бурхІни дакІалли маслис гІямал барес шиниша къар ляркъян. Ахълиб декІар ахІи арцурси кІанра сунела жагаси гІамаличил, гъала хІебла ванати бурхІнас багъишлабарибси далай бучІули саби. Илдигъунти сари ишдусла гъала хІебла бурхІнала пишни-авара. ВеГІлит багъра хІебагъурли уркІи хІебличи, умуси гъаваличи, ванзализибад бара дурабикибси шинишдешличи, хІебли алкІахъути дарсдешуначи разибирули саби.

САВГЪАТЛА СТАКАНТИ

Даргала мезли дурабулхъуси «Замана» газетализив корреспондентли узуси замана, газета къулбасбарибтала ургаб лотерея бузахъусири. Гъарбизурсини жура-журала секІултала савгъат сархусири.

Лотерея гъарбизурли се биалра сархибтазибад цацабехІти редакцилизи бакІили, чули арбихули бири савгъат. ЦацабехІти къанни баши редакциялизи савгъат арбухес. БекІлилра хІебакІили кавлутира бири.

Илгъуна лотереялизиб сархибси стакантала набор арбухес чилра хІякъули гІяхІил бахъхІи биублири. Ил сархибси мурул адамла адрес Первомайскла шилизибси сабри.

– ХІела гъамти кІебли Первомайсклизи вашуси ахІенрив хІу? – хърбаиб гъачам набзи газетала редакторли.

– КІебти саби. ИшбархІира икІад викили арукъес пикри саби, нешла узикъар хъябшли сай, ира нуни редакторлизи.

– ИкІавси адамли сархибси иш стакантала набор бухили бедес хІейруду? – викІар ил набзи.

– Сен хІейрусира. Вирусну биха, – сасира нуни ил. Первомайсклизи аибхІели ну вархъли почтализи ухІнаухъунра. Илаб багъурра набор бухес гІягІниси адамла хъулрала адрес.

Почтализиб набзи бурибси мерличи аира. ГІяхІцад халаси гъуни ахъес чебуркъуб. Илар юртанала номерти аги. Ца азбарлизи ацІили, , наб гІягІнисила ура бурили, чидилти иш адамла хъулри или хърбаира.

– ХІера ишди сари илала хъулри. ХІуни хърариусира ну сайра, хІед се гІягІнили, хІу чи сайри? – хърбаиб набчил гъайикІусини.

Ну чи сайрал, се мурадли вакІибсирал бурибхІели, ганзухъличи ацІили тІутІила бухъани дурчули узуси адам итмадан кацІиб, набчи гъамиубли, разити яхши-хуш дариб.

– Марлира, хІу сайрив Къаратов? ДучІули вирус хІела макъалаби. Ну вакІес хІейубхІели, нуни сархибси хІушани гІергъи хилрая. ВирххІеэси анцІбукъ

саби. Баркалла биаб хІушаб, – уркІи гьаргли, разили гьайухъун ил набчил.

– ЦархІил кьуллукъра бургар хІела ишаб, наб ишди стакантала набор хилищун вакІили хІергуд иша?

– Селра халаси кьуллукъ агара. Нешла узикъар хьябшли сай или бакъибхІели, музавхъунсира. Иличила бурибхІели редакторли гибси саби иш набор.

– Леб. Щударахъали или узби лебгу. Илди дила нешла узбикъури саби.

– Гур хІу мухІен мезли гьайхІейкІули, ахъушала мезли гьайикІулригу!

– Дила дудеш Щухтала шилизивадси сай. – Гьанна ну аркъясра или илис някъ гьабуцира. Илини някъ хІебуциб. Вявьили раклахъили хъунуйзи набор бедиб ва сай анхълизи ацІиб. Илад дуцили хІябал гІяргІя хиб. Илмадан делгъун. Илди хъунуйчи хъардарили, гІутІила дерхъибти галгубала удибси столла гІела катурра ну, сай чина саял арякъун, жура-журала рангла чягъирла шишни хили столличи кадихъиб.

КІелра шайчибти унруби жибариб. Беркала хъунуйзи балкъаахъес хъарбариб. Хъа вегІли бакІибти сунела унрубачил тянишварра. Илди кІелра мулебкІанти сабли уббухъун. Илданира гьар дус нушала газета кьулбасбирули буилири.

БуцІарси аргълизир тяхІуси, гІутІила бурхлиур кадили чягъирла тІем багъурра, беркала балкъаайчи ихтилатдикІули калунра убяхІ мулебкІантира нура. Илди саби-ургаб балги хІербирути унруби сабли уббухъун.

Хъа регІли кабихъиб бизиси беркала, хъа вегІли дурадикахъиб гІурра сунени хъулир, арбякъунси дуслизир дарибти чягъир. Беркунра, бержира. Арукъес или айзурра. Чина хабара. ХІябалра мулебкІай хІетурра арукъес, къанируси мер агара биалли каили уэнгу нушачил, хІечил ихтилатдикІес гІяхІил сабину бикІули. Илаб нуни хъарбаибсири илдази «шинкІати» чягъирлис сен «сухойти» бикІути или? Илаб бурили къяйда «сухой» бикІули буили саби, илдазиб чІумадеш дебали камли сабхІели.

– Ягъари, викІулра ну хъа вегІлизи, – нуни хибти стаканти дурхъали кадилзули ахІенну хІед?

– Секъяйда дурхъали? Кадизалли кадизабгу? Илизиб ахІен анцІбукъ, хІуни илди набчи даахъни, хІечил тянишвиъни, ишди дила унрубира нура хІечил тянишдиънилизиб ва гІяхІси балгунси ихтилат бетаънилизиб саби.

Марлирагу, гІяхІти, наб хабарагарти пергер адамтачил тянишиубра, бемжурси ихтилат бетаур илаб.

Ну вашули урукъяхъесра хІетурра, хІябалра барх бакІили, наб гІягІнихІи каахъира. Гур илав къаршиикасли, ну чучи гІяхІладли вакІахъес маслигІятбариб. Амма ила гІур укъес бетхІеурли калунра.





Мисей
ГІЯБДУСАЛАМОВА

ИГЪБАРЛИЗИ БУЙГІУЛРА

Дагван ну ишбарХира
Цуннира пикрумазир,
Цай къяшмачил дуцЛира
Закла капарайличир.

Цуннира, садирхъулла
СубхІянван закла урми,
Гъариллис адирхъулла
Наб ахІертала уми!

ГІуррара уркІиличиб
Нуранар дирхала саб,
Ил агарли гъигърикІес
ХІерирус, якъинси саб!

Ишдугира цуннира
Дубагар дигайличил,
Закличилцун дуртІути
ДигІянти пикрумачил!

Цундешла хІяланазиб
Наб барХи шалали саб,

ЦацахІели наб курлабван
Кабизурси цІябдеш саб!

Садирхъулла гІямрула
Мачни набчицун хаста,
ЦацахІели шуркъ лебти,
ИмцІали варъа лебти!

Илар имцІати бурХІни
Дигай духъути сари,
Дугурбира карцІила
ЦІали дигубти сари.

Лерилра вайти-гІяхІти
Къисматла савгъат диэс,
ЧевяхІсили набзицун
Ахъахъес гибти диэс!

Пикрумазир цуннира
ГІямрукадли дуцЛира,
БекІ ахъли бихІес рирни
Игъбарлизи буйгІулла!

ХІЕРРИУЛРА

ХІерриулла хъябруцли
Наб гибти гІямрулича,
Нуни бегІун-бацунси
Хъарихъулла хъулича.

Рихулла дирхалали
Наб дигуси кулпетла,
Ахъруцилла хъуцІума
АхІер юлдашунала!

Ванариулра цІали
Нуни бикъур анкъила,
Шадриулра шалали
Дила дигул рурсбала!

Арцурира арцанван
Пикрумазир заклизир,
Къакъбяхъилра, наб-къала
Гјамрула юлдашличи!

Щакъ кайсулра тухумла
Набчи дирхализиб,

ЧатІниван хІербикІути
Рурсбала дурхІназибад!

Рирхулра дирхалацун
Саби гјамрула хъулчи,
Дигулра, дигайлицун
ТІашиу юргъа урчи!

Биаллира, балулра
Набзир сар дила гјамру,
ХІерриэс къаслизирра
Бархли бегІтала амру.

ЛЕРИЛРА ДАЛКАДУРШУ

Гјамру-беркала сари
ХІела някъба барибси,
ЦабехІлис шуркъ диалли
Балусилис каш сари.

Гјамру- беркала сари
Лезми къудкъубиралра,
ТІалхІяначибу гІяйиб
Яра дурхІназирталав?

Исиутла биалра
ХІед бикибси беркала,
Вари зукъимабирид
Чекакъурли мехІ зела!

Букуси бизибарес
ДяхІличиб гъинчІ абалкен,
Дукелцила зубари
КІуцІулла бехІла биршен!

Хурегличичи хІяз ахъес
УркІи дигили бицІа,
Гъар укес алзухІели,
Балуй къяшли ганз кацІа.

Чили биалра хІела
Хурег бизихІебиру,
ХІела устадешлицун
Лерилра далкадуршу.

ГЪАЛМАГЪУНАС

Баркалла, гъалмагъуни,
ХІуша дила лернилис,
Гъарил акІубси суал
ХІушази гес рирнилис!

Баркалла хІушаб, узби,
УркІбазир нур дихІнилис,
Хъарахъес хъарбикалли,
ХъуцІари гъабалтнилис!

Баркалла, дарган рузби,
Ца анкъилар диънилис,

ЗугІяй зиррарибхІели
УркІи абхъес лернилис.

ХІялалдиаб хІялалти
Дубурланти диънилис,
ХІебхІели, янихІели,
Кумек гъалабирхънилис.

Датаба, юдашуни,
Дай Даргазир духъули!
БиштІатала мукърачир
ТІашла делхъли дулхъули.

Калабая, ахІерти,
ХІертачи чардулхули,
ХІуша дигутас арцла
Маркали чахьдикІули.

Гъарил сягІят рулгулра:
Калаба, шимазирти,
Гъамти ва гъарахъларти,
Датаба шагъарлант!

НУШАЛА ГІЯЙШАТАБАС

ХІела гІямрула гъуни
Цалари, миъбалари,
ХІуни деркІибти дусми
Къаркъалари, мегълари.

Хъуличир хълрти хІянчи
ХІялалли тамандиран,
Рамсурдеш арбукъяхъес
ЦархІил хІянчи балбурцан.

ХІуни ахъиб гъундури
Заблари, келеклари,
ХІед къадарлис декІунти
Шуркълари, варълари.

ХІечи мешута саби
Дунъяла чар ласбиран,
ХІугъунти хъунра саби
Ванза някъбачиб бихан.

ВацІализи рашули,
Махли къакъ белкахъунси,
ХІянчила маргълчиб хІер
ХІулбала шявбиубси.

ИшбархІи мубараклис
Ца саби балга дила,
ХІугъуна ретаасри
Илри бархъбиз гІямрула.

БЕРХІИ НАБЧИБ ГІЯХІЛАДЛИ

Чебаира ишбархІи
Наб БерхІи гъакІбикІули,
Дигайличила далай
Набзи белкІен бикІули!

БерхІила арилизиб
Чарх сага-ванабиуб,
Детахъибти дурхІядеш
Дила гъала гугдииб.

Савли жявли илини
БиругІеб кІапІруцира,
ХІяланала хІеркІкадли
Марли куртІряхІяхъира.

Иганайла хІулбири
БерхІиван хІердикІути,
Ил сабабли дииши
ХІи тумикад гъалакти.

ЛихІбази шивкІивдариб
Гълар хІергъибти дугъби,
Марли талихІли дицІиб
Дисес хІядурти хІулби.

ГъанкІ ахІенри, хІуруцІри
БерхІила набчил пишни,
Игъбарлизи буйгІулра
Илини нура рагъни.

БерхІили някъ буцили
Ургубакад рукира,
Дигай арцур мерличи
Къяшмани тІашаира.

Ну ахІентира лебну
БерхІила гІурра бахъл,
Батиис илдачира
Набчил дигули хълли.

ХЪУМАРТУРРИВ?

Виклусири муртрил хІу
«Агара наб къаршикар,
СархІели гІямрулизир
Даимлис кахъиб гъайкар!»

Виклусири «Ванзала
Цугбуц агар хІурулгІин,

Гъар бархІи сагавирул
Дусми урдирхъул дарман!»

Гъанна сен хъумартуррив
Ну лерни унраличир,
Сен гъунили вихулрив
ЗугъадикІул къянбачил?

ДАТИРА

Дигайли далтул хІерзи
Чархличир мурхъти сари,
ДягІлисван унза-улкъай
КъяпІдарес хІейрути сар.

Гъарилли кайуси гъарш
ДяхІличибси ца саби,
Шин чекъурли гантарван
Бишес хІейруси саби.

Датира хІянсавдахъес
Чархличир дигайла хатІ,
Жагадеш архІехуну
ДикІалра гъар бархІи хилтІ.

Алкаб дяхІличир карцІай
Кам гІергъи игули кам
ДикІули гІергъи сари
ТалихІлис гІяшли икрам.

НУ ДАВЛАЧЕРРАРИБТИ

Дила рарг рарцІахъути
ХІялани хІечи сари,
Ванзаличиб алжана
Мурталра ил хІу сайри.

ХІечил дуртІулра нуни
БархІехъра шала шикъра,

Дай хІерейс ламбулхъуси
ДуцІрумла цІуэрира.

Ну давлачеррарибси
АхІенра мургъи-арцли,
Сарра багъала ахъти
ХІечи духъун дигайли !

МЕКЪЛИС

ИшбархІи нушаб гъалар
ГъинчІ дяхІлаб ухахъути,
ХІушаб сари дила гъай,
Мекъ бирути жагъилти!

ГІямру бикІул бягІул дякъ
Барх ахъес хъулдухъунти,
ТалихІчебси биаб ил
Агарли къалмакъарти.

Дигайла дуклумачир
Арцабая заклизы,

Игъбарли белшун къалтин
Балбиркаб ванзаличиб.

Духъянти диаб дусми
ХІушани дарх деркІести,
ДурхІнала дурхІначил дарх
Гъар даим жагъдикІести!

Даргас дигул далайчи
ГІяхІ сягІят хІед, Амиран,
Хъалибаргра биаб хІед
ХІела уркІи-хІял иргъан.



Зубайдат ГИЯМАРОВА

ХИЕЧИЛРА

Арцла зубаригъуна
Анхълизиб урунжъуна
Урхъназиб бялихъгъуна
ВацIализиб бецIгъуна.
УркIилизиб цIагъуна
ДуцIрумла цIуэргъуна
Савли дуги гъанкIгъуна
Алжанна вавагъуна
Къудкъути кофеличи,

Муръил шоколадгъуна,
Къудкъути гIямруличи
Шаласи пикригъуна
ЦархIил агу хIугъуна
Ишкъяйдали мурталра,
ХIечил сарра нуша дарх,
Ардукъялра дарш дусми
Дила дурхъал Дагъистан.

ПИКРИ

ХIера, гIурра арбякъун
ГIямрула ца гъатIи дус
Халал хъярхъдеш агарли
БархIехъла лехIдеш бакIиб.

Дунъя ишгъуна саби
Унза къяпIхебируси.
ЦабехI бухIна башуси,
ЦабехI дура башуси.

Жагал жагъдешла бархIи
Сабри илцад жагаси,
Хъумартахъур илини
Аркъул манзилла сягIят.

Нушабра гъанхIебирки
БегIти хIебирар или,
ГIямрулизибси къакъбяхъ
Нушаб камбирар или.

Ва хIера. Гъанагарли
Дуцира нуша хIекъли
Ухънадешла къялшуба
ГIелавяхI чархIейэсли.

Амма, гIямрули лерил
сунна мерла кадалта,
Халал мява барили
ГIелавяхI чарбиубли.

Амма, сунна къудкъудеш
Жагабирули саби,
Муриси разидешли
Уршбала биштIатала.

Илкъяйда бирусире
Азирти дусмас гъалаб
Ва, илкъяйдали кавлан
Азир дусми дашуцад.

ЛЕРИЛ ХІУ САБРИ

Хіуша алав мер-муса,
Арцантала макъамти,
Илди лерил – хіу сабри
Дила ахІер Дагъистан.

БиштІатала разидеш
Бухънабала пашмандеш,
Илди лерил – хіу сабри,
Дила ахІер Дагъистан.

Жагъилтала гъалакдеш,
ГІялимтала дурхъадеш,
Илди лерил – хіу сабри,
Дила ахІер Дагъистан.

Алхунтала гъабзадеш
Бургъантала чІумадеш,
Илди лебил – хіу сабри,
Дила ахІер Дагъистан.

ГІячлам хІяйран бируси
Иш пергерси тІабигІят,
Илди лерил – хіу сабри
Дила ахІер Дагъистан.

Мусни-зубри мекелли
Хам цІакъли акІахъубти,
Илди лерил – хіу сабри,
Дила ахІер Дагъистан.

Марли хІедиур дургар
Дила някъла устадеш,
Гъайла гъайкІари барес,
Дила дурхъал Дагъистан.

ХІебелчІунни калунси
ХІечила пергер далай,
Даимбараб ГІяламли,
Дила дурхъал Дагъистан.

НУРМЯХІЯММАД

ХъмхІертехІе ГІяламли
Балагъла духъянати
Ва къиянти дусми
Агъула чІичІлумала
Бурги дячунси манзил.

ХІера, сар ахъдуцили
ГІурра илди чІичІлума
Чула агъула бурги
ГІялам халкъла ургабси
Паргъатдеш булгъахъули.

ХІера бакІиб илгъуна
ХІялумцІуси замана
Улкали «хІядурлирив» ибхІели
«ХІядурли сарра» ибси
Дурабулхъуси сягІят.

Илис бикъри ветаур
Булеги чІумал гъабза,
Жагъ чІака – НурмяхІяммад,
Зубарли ветаурси
Лебил халкъла уркІбазив.

Дубурланна бурала
Мурхъ мягІна марбарибси,
ВебкІес аркъухІелира
УркІлаб цІум агарси.
Я, хІуйзиб нергъ агарси.
ЦІуб къургъала тугълизиб
ХІунира баргири мер
Арцурли вявбирхъяхъес
Арцанна тІамаличил
Ванзаличиб калунтас.

Дарш дусмала насабли
ХІиличил ва цІаличил
Къаркъубачи делкІунти
Дубурланна яхІ-ламус
Дицибси дахъ дурхъали.

Дагъиста нешанани
Барибгу хІед халал яс
КертІили дуцІар нургъби
Урхъназирти шинцада
ДуцІарти ва зукъити.

ГІЯМРУ

Агу, гІелабахІ гьуни
Дигулихьар биубли,
ЖихІебарибти гІяхІли
ГьуцІли саби нушачи:

ГьанкІ агарти дугурби,
Дарман агарти бурхІни,
КьутІгала кьякьубала
Ва дахьал пикрумала.

Гьала хІебла заб кьяйда,
ГІебшила цІуэр кьяйда,
Хабарагарли дегьуб
Нушала жагьти бурхІни.

Нуша, хІердирули лерай
Кьисматли, кадирхьули сар
ГІямрули дахьал дурсри
Нушани хьумуртути.

Ва, нушани биалли
ГІяйиб агарси шайчир
ГІяйибла дирулира
ГІямру ишцад жагати.

Игьбар агар кьяйдали
Селичирил хІерлира,
Амма, аркьули сари
ГІямру чула гьуникад.

УНРА

ХІуни юрт барес или
ХІисаб барибхІели,
Пикриухьи, гьанбикахья
Хала бегІтала айту:

Хьали барес гьалаб
Алав хІеризи
Сегьунти сабил, унруби
Пикрикабара.

ГІяхІси унра хІела
ГІяхІсили ва гьамсили
Ветарар вахь гьамсили
Гьарахьси тухумличив.

Вируд, хІуни кьякьбяхьес,
Вируд уркІира бурес
Кьиян дикалли рахли
Вирар ил хІела мякьлав.

Эгер илди унрадеш
Сунес кьиян дизалли,
Вируд лехІли, малхІямли
Ца шайчи шулумикес.

Амма, илгьуна анцІбукь
БахьхІи буэс хІебирар
СенахІенну, унрадеш
Дазу агарси сабну.

ДУРХІНИ

БегІла халаси давла
ЧевяхІ Аллагьли гибси,
Иш дуньяла кьякьличиб
Саб нушала биштІати,
Мурталра илди нушаб
Давлара саб дусмира,
ПарчбикІуси игьбарра,
Кьякьличир дуклумира,
Аллагьла уркІецира,

ГІямру кьурбандирира,
ХІули линкІхІебарили,
Ара-сагьли калахьес
СабхІели дурхІни нушаб,
Нушала ГІямрулизиб
Разидешла галгуби
Ва, дурхІнала дурхІни –
Галгубачирти цІедеш!

ДИГАХЪИС НАБ ХІЕРРИКІЕС

Дигахъис наб хІеррикІес
Ва хІяйранни лехІирхъес
дагъала тІамаличил
ГІялам халкъ булхІухІели.

Дигахъис наб хІеррикІес
БерхІи абилзухІели
Исбагъи рурси къяйда
Урузли лябкъухІели.

Дигахъис наб хІеррикІес
Дубурла къар бекІличир
БерхІили датаибти
Къялуби дулхъухІели.


Дигахъис наб хІеррикІес
Хъанці урхънала къакъличир
Рамчани думхІухІели
ЩиркІси дягІла хІерлиур.

Дигахъис наб хІеррикІес
БиштІати разихІели
Нешанала дяхІличир
Игъбар парчбикІухІели.

Дигахъис наб хІеррикІес
ХІед, къуллукъличиб тІашти
ЧІумати жагъил уршби
Хъули чарбулхъухІели.

Дигахъис наб хІеррикІес
ХІела ахъдешлумачи
Гъар рухІлашал дирути
Ахъ чедибдешуначи.

Дигахъис наб хІеррикІес
ХІела уржибдешличи
ГІялам халкъ хІяйранбирул
КахІебурхул цақъличи.



Сагати уми



**Патимат
КЪУРБАНОВА**

*Дигеси аниЉубукъ саби литература диганти имџабикџни. Иш номерли-
зир нушани жагъси поэт, дарган мезла мугџяллим, Патимат Къурбанова-
ла назмурти гъаладирхъулра. Патимат акџубси сари Дахадаевла районна
Гъулатдила шилизир. Патиматла назмурти мухъси мяџна бухџнабу-
џибти сари. Каргънилашал, жагати мешубуџуначирли декџардулхъули
сари илала назмурти. Илбагъандан сари илала назмула тугъи жавгъар
духурибиван ляџидикџути учџанна урџилизир. Ишиди назмурти нушабван
џархџилтасра гџяџдилзниличи умут леб.*

ДИЛА ЖАН

Дила вава, дила жан,
Риурлав илџад хџяйран,
Хџядурлира ну гъаман
Виџхџейахъес хџу пашман.

Гџязиз хџулбала хџерлис
Се-дигара бедлугас,
Хџед нуни дила гџямру
Араџерли харџдирис.

ДУДЕШЛИС

Чџумал дуклумар дусма
Игъдибар марбарибси,
Сарра хџела гџякълума
Дунъяличир рихџуси.

Душмантас деџџигахъес,
Юлдашлис някъ гъабурџес,
Ахџер, хџуни дурибта
Бурсирарра яхџбурџес.

Пикри сабри хъарихъес
Дудешла хъуџарличи,
Хџейгулрагу рирхаџс
Гџямрула къяркъешличи.

Къарџин дусмала айгъир,
Гџяйибри агаризџс,
Дудеш, хџела аманат
Рииша дураберџес...

КУМЕКБАРА

Кумекбара, урши, наб дарман даргес,
Гџямрулизир хџечи хъулхџериахъес,
Дилаван хџелара дигайла гами
Урхъула рамчана панахџебарахъес.

Кумекбара, урши, гІямру дагъахъес,
УркІила пикруми хІечи даахъес,
Дилаван хІелара карцІайла лами
Зубрала заблизиб бишхІебишахъес.

Кумекбара урши, сабурбарахъес,
Дигайра карцІайра набзир дихІяхъес,
Дилаван хІелара сабурла умхъу
Дубурла хІеркІлизи архІебухахъес.

МЕЗЛА ЗУБАРТИ

Нешла гардла далай
Гъанбиркахъути,
УркІила хІялани
Чериргъахъути,
МалхІямли дучІути
Дила нешла мез,
Чучил цугдуцести
Агу цархІилти.

Дарган далайлизир
ТІягІямла дугъби,
Лебил дунъяличир
Ункъли дучІути,
Анкъилаб ванадеш
Дебабирути,
Улкена заклизир
Мезла зубарти.

МЕЗЛИЧИЛА

– Дагъиста халкъанала
Селизиба декІардеш?
– ДекІардеш саб мезлизиб,
Сар зайдикІудешлизиб.

Наб биалли дигахъис
Дила даргала миллат,
Саб рухІла дяхІимцІала
Дарган мезла гІяламат.

УРКІИЛА КЪАКЪАДЕШ

УркІи къакъали лебай
ДелкІес дигулра наб гъай,
Дунъяла гІеламгъабдеш
Дигаси барес маймай».

Анкъилаб цІа бихІути,
Хъалибарг булгахъути,

Неш-дудеш лебталалра
Биалри хІебубкІути.

Неш-дудеш ва тухумти
Ишцад шадли бихІути,
БиштІати лебталалра
Биалри хъябшхІейрути.

УРХЪУДУБЛА ГЪУМЛИЗИ

УркІи цІумбикІахъули,
ХІялани парчдикІесли
РамчбикІусигъунари,
Каспила хъанцІа урхъу.

Урхъудубла гъумлизи
Сегъунтил пикрумазир
Кариилри ца рурси,
ГІямрула хІял багъурси.

ШинкIадешри хIулбазир.
Душкес тIягIямагартI,
ГIянд сабри къакъарлизиб,
Арзес къиянбухъеси.

ГIямрула гъуникадли,
КъунзрикIули гъалакли,

Урхъула цIуэрили
Някъба кам тирхъаилри.

Рет-садрухъи, ретаиб
БусягIятла бурхIначи,
ГIяшли иб "Дила дурхIни" –.
Гъайбариб биштIатачи.

ХIЕЙГИ

ХIейгулра пашман бурхIни,
ДецIли дицIибти,
Хъябхъяли дуунти
Гулвавнигъунти.
Дигулра разити,
Ахир агартI,
Сецад диаллира
АнцIхIедукъести.

ХIейгулра цайти бурхIни,
ТIягIямагартI,
Забла гъар кIантIличи
ЛехIирхъахъути.
Дигулра аваданти,
АнцIкъиагартI
ДурхIнала дурхIначил
ХIязтавиркъути.

ХАЗНА

Дила хIечиван дигай
ХIела набчи дихъалри,
ИкIди ахъти дубурти
Диркъ майдайчи шурдулхъи.

Дила гIямрула дусми –
Дила давла, бикIалра,
Ну рикIулра, хIу сайри
Дила гIямрула хазна.

Дила хIечиван карцIай
ХIела набчи духъалри,
Лерил дунъяла урхъни
Деръубли пяхIли дулъи.

ХIури, дубурла лачин,
Ну къяшмачир рихIуси,
СихIрула хIяланачил
ГIямру гIеркъадируси.

БЕКIХIЕЙУБТИ ДИГАЙ

Къиянси насибра къяркъси къисматра,
АгартI секIайчи вирхуси хIура,
Даимли ахIенти ишти гIямрура,
БекIдарес хIейубти дила дигайра.

Чарх саби децIлизиб, бекI – пикрумазиб,
ХIед дигуси барес ихтияр хIезиб,
Аргъала буунри дила уркIила,
ХIед зулму бируси агара чилра.

Эгер, рурси, хIуни хIегадли жаваб,
УркIила шишимти дила дахъдирар,
Дирихъма кIапIдурцу лерил хъулани,
Иличиб тIашбилзан гIямрула гъуни.

БяхІмуд БУЛАТОВ



БУРХІНИ

Ардашули сар бурхІни
Цаличир ца гьалакли,
ДахъдикІули сар дусми
ЛугІилизир тарихла.

ХІера, дакІиб набра хІеб
АвцІанну кІираэсти
Ляркъян или сеналра
Бирхауди агарти.

ЖавабтагІив умцІули,
Пикруми мурхъдирути,
ЖагІялла бархІиличи
Хьулани камдирути.

Лерри разидешуни,
УркІи шадбирахъути,
Разити шадлихъуни,
Шадли шалгІердалтути.

Диуб сархибдешуни,
Ганз гьалабахІ аркути,
ТалихІла гІямрулис сар
Хьулчили детаурти.

Вирхулра, гІурра ляркъян
Чуйнара хІеб ванати,
Вавна бяхъибси анхъван
ГІямру даимдирути.

БУЗЕС ДИГУТИ

Леб нушачил бузули
ХІянчи дигахъутира,
Бузераила гьуникад
ГьалабахІ башутира.

Леб нушачил бузули
ХІурматличи лайикъти,
БегІлара ахъси кьимат
ХІянчиличиб сархибти!

Леб нушачил бузули
ХІянчи хІебалутира,
Балутала дирули,
Хамли кьунзбикІутира.

Леб нушачил бузули,
ХІянчи хІедирутира,
Бузутачибра халал
Алапа кайсутира.

Леб нушачил бузули,
КІидехІ мез далутира,
Бурибси гьай булъули,
Къунбани бугъутира.

Леб нушачил бузули,
ЯхІ-ламус агартира,
Чархлизиб сегъуналра
Къуват барх агартира.

АХЪРИ ЛУГА АЛЛАГЪЛИ

Ахъри луга Аллагъли
БиштІати гІеббуцахъес,
Чум биалра, лебилтас
Дигила пай барахъес.

ХІябал гІяхІгъабза урши
Нушаб цаван бигахъес,
Сархибдешуни чула
Ца умцлали умцахъес.

Халаси ва виштІаси
ДекІар бирхІебирахъес,
Халасира виштІалра
Цаван барх чебиахъес.

Цаван цугли гъариллис
ГІяхІси бяръкъ бедлугахъес,

Гъарил чула баркъуди
БегІтази гІеббурцахъес.

Ахъри луга Аллагъли
ДурхІни гъунчибушахъес,
Цаличиб ца биштІати
ХІябалра ахъбуцахъес.

ВиштІаллис ахъри луга
Узби уркІичеббирес,
Гъар бархІи мар сагати
Сархибдешуни дихес.

Балулра, Аллагъли ну
ЛайхІейкІура дайгъуйчив,
ХІябалра дила урши
Бархъбиру бархъси гъуйчи.

ДЕКІАР-ДЕКІАРТИ

Бахъал леб духутира,
Абдулта биркъутира,
МехІуртала дирули,
Дахъал дагъри лертира.

Леб гІякълу агартира,
ГІямал-макру дархтира,
Гурдала гули чебли
Гумайла башутира.

ГІякълуличи бикили,
Шантас багалатира,
ГІямрулизиб цайналра
ГІяхІси хІебарибтира.

Леб уркІи-хІял гІяхІтира,
ХІяя-ламус дархтира,
ХІяжарли хІербирули,
ХІяжлизи башутира.

Чус гІяхІси бурибхІели,
ВайтІа гъимбуркІутира,
Гъими-къяс уркІиларли,
ХІял-тІабигІят нястира.

Чула хІурмат баралли
ХІулкІули башутира,
Чилра мучлахІейрули,
Хатир кабалтутира.

ПОЭЗИЯЛА БАРХИИ

Адамгала уркІбазиб
Умут имцІабирути,
УркІила азир пикри
Назмулизир дуранти.

Мурхъти дигайла дугъби
Гъар девлизи каргъурти,
Кагъарлизи къаламли
СихІру някъишдиранти.

УрхИли чехИебиуси
Пикрилизи кайсанти,
Заманаличил балги
ГьалабяхИ ганзбикИути.

БугабикИаб къаламра,
МурхьдикИаб пагьмуртира,
Гьар бархИи имцИабикИаб
Пагьмуртала бегИтира.

НЕСЛИС

Нешла мякъла кайили,
ДурхИядеш гьандуршулра,
Буцили биштИаси някъ
Баркалла балахьулра.

Арцла някъиш делкИунти
Чурми дигИяндирули,
Пишряхьиб бараван неш,
ХИулбира гИяшдуцили.

"Баркалла, ахИерси, хИед
ГИямру савгьатдарнилис,
КИел урши, хИябал рурси,
Жагали абикьнилис.

Муриси гьанкИ батурли,
Сири гардбикИахьнилис,

Лайлаличил балгнира
Нуша гьанни дучИнилис.

ГИямрула бархьси гьуни
Нушаб гьаргбиахьнилис,
Ламус-хИяя, инсап-яхИ
Нушази дагьахьнилис.

Нуша къяйда нушала
ДурхИни гьуйчибуршнилис,
Нушабгьуна илдасра
Дигила пай бирнилис.

Баркалла хИу лернилис,
Нушаб къуват лугнилис,
ХИу-алав кадиили
Диги ахьес дирнилис.

КЪАДАРБИУБ

Дила шягИирла хИянчи
Гьунчидуршул кумекчи,
Мирхьиван серерхурси
Нешра лер насихИятчи.

Дила баркъуди, балбуц,
ГИякълули гИердурцуси,
ХИянчилизив хИялалси
Узира лев зяхИматчи.

Дила ганзличил бархли
Мякълабадли башули,
Кьар-ургаб вавнигьунти
ХИябалра рузира леб.

Дила ГИямрула гьуни
Набчил бархли ихьуси,
Амьур дигайла урунж
Исбагьи хьунулра лер.

Дила амру бихути
Гьар хьарбаркъ бекИбирути,
Дила пахрудила дард,
ХИябалра уршира леб.

УркИи децИлизибхИели,
ХиртИбирес къаламра леб,
Шадли къунзухьунхИели,
Зузбирес жикьира леб.



Сягидулла
ГІЯБДУЛЛАБЕКОВ

«АНКЪИЛА» МУГІЯЛЛИМТАС

Дубуртазир гул вавни
Дираргу дахь дерхъили.
Даргала мугІяллимтас
Далай бучІас ахь-ахъли.

Дурапачалихъла гъай
ДарсІедиру я арцли.
Багъудиличи диги
ИмцІадиру Цибацли.

ГІямру диаб ряхІятла
Керимова СайхІятла.
Жан дерхъаб хІела даим,
Дарган мезла мугІяллим.

Сабият сар Уркухъан,
Кункти къяшмачир рулхъан.
МугІяллимтала ургар,
Азир гъабзази рулхъан.

Цагъуна Насибатла,
УркІи хІела игитла.
МугІяллим сар рурибси,
ГІяй сунела жан датла.

Гъуладтан дила рузи,
Къурбанова ПатІимат.
Ну сайра хІела узи,
Бихуси хІела хІурмат.

Гъаниркули сай гъаман,
Заирбекович Къурбан.
ХІечил тянишиънилис,
ГІямрулис хІейрус пашман.

Дарган мугІяллимтазир,
БегІла дурхъал исбагъи.
Мургъиличирра дурхъаси,
Марият риъни багъи.

Рабазан – узи цуглан,
Анкъилизив авадан.
Мирхъи варъан муриси,
МугІяллимри урибси.

Чархла азирра биркІан
Арадаркъаб Басират.
Мар мургъила мулебкІан,
ХІу нушаб Аллагъли рат!

Чишили шалабиуб,
Шарипат акІубхІели.
Ши, шанти разибиуб,
МугІялим риубхІели.

ДитІунши махъилизир,
БегІла халал мугІялим.
Усишан рузи Райсат,
Риаб гъатІира хІяким.

Луарачи лехІкайхур
Ца классла узби-рузби.
Жявли бархъ гьунчибиркур,
БучІути дурхІни-рурсби.

Пирдауз, хІела жан дат,
МугІялим даргантала.
Я лугІи багъес хІейрар,
ХІу ригул адамтала.

Бахъал саби Усишаб
ГІялимти, мугІяллимти.
ГъалабахІ арбякьунти,
БяхІмудгъуна адамти.

Зарипат Къаратовна,
МухІела шила чатІа.
ХІед лукІути дугъбазиб,
ГІяйиб саб барес хатІа.

ХІу рузухІели школа,
Гимназия бетаур.
Арсланбекла Райсатла,
ХІянчилизиб гьарбизур.

ХІянчи хІялал мугІяллим,
Узи нушала Къади.
МуртІал гъалаб чебиу,
ХІела някъла баркъуди.

ХІечилла саб ихтилат,
Даргала гумайлизиб.
Рузи дила Пазилат,
ТалихІ хІед ГІямрулизиб.

ХІеб вававан жагаси,
Рузи дила СутбукІан.
МугІяллим сар даргала,
ПатІи нушала сирхІан.

ГІяллаева ГІяйшатли,
Багъудира кайсахъу.
Сунела класслизибти
Шулабачи бучІахъу.

ГІялам халкъла баракат,
Рузи дила Маликат.
Шантас дигул мугІяллим,
ХІу нушаб къугъали рат.

МугІяллим сар дурхъаси,
Рузи дила Нарипат.
ГІяламли мяштІбируси
ХІела жагаси сипат.

МугІяллимри дурхъаси,
ХІу Мухтарла Наида.
ХІела кумек агарли,
ХІебирар чискІал пайда.

ИСБАГЪИ

Вавари хІу, вавари,
Дубура хамбарибси.
Савлила хІу гъавари,
ТІяГІямли гьигъарибси.

ХІела шараб хІулбала,
Халаси саби гъунар.
ХІечи ГІяшикъ гъубзнала,
ХІечилла бирар хабар.

Давлари хІу, давлари,
БукІуннис мазагъуна.
Наб игъбарла савгъатри,
Сукъурлис шалагъуна.

ХІу багъандан, исбагъи,
Ихъис дубагар гъуни.
Наб къаршили кайзурси,
Гъалав хІелтасра нуни.

ЛАЦЛА УСТНАС

УркИ гьаргли лукІула,
Устни хІушаб иш назму.
Гьардизурли дигула,
ХІялал кулпетла гІямру.

БерхИ бикьри барили,
Абзур бархИ дузула.
Лерилра дурхьал балгни,
ХІушаб нуни дулгула.

ХІялал къацІли дукули,
ХІярам багьхебагьурти.
Ишцад иш ВатІаннизиб,
Уркухь машгьурбарибти.

Ахьили кахси къиян,
Лушула жагаси лац.
ХІебургар чинабалра,
ХІушалаван хІялал арц.

Багьара ахьбикІули,
ХІянчира кункбикІули.
ХІердиабая узби,
ГІямруличи хІулкІули.

Гьар бархИ бягІубикІаб,
Лацла устала хІурмат.
Уста къякъван чІумали,
Буцаба иш хІукумат.



МяхИяммад
СЯГИДОВ



ГЪАЧАМРА

Арѡа маркала кІунтІри вавнала кІапІрачир арцла мачниван лямцІ-дикІулри. Савлила умуси заклизиб булбул чатІара жагати макъамта бучІулри. Гъар журала вавнани тІембикІуси гъава къянкъубази гилди-бикІулри. Бара гъаббакІибси берхІила нурли хІяна хъурхъала бургачир лямцІдикІути дяхІи-миѡла къатани бизиси гъанкІлизирад багълали чер-саргъахъулри. Алавчарли тІягІямла лехІдеш сабри. ГІяшура шила дубла шичи аркъулри. Илис, берхІи буцІарбияйчи маза къарли делкъахъес дигули, дуки аркъуси ГІиса цугикиб. Ванати хІулбала хІерличил илини ГІяшурала уркІи гъузгълдибариб. Маза-масличил дубуртази арякъи, базра-сера хъули чархІевхъи, Имаццини бяргІяхъибси уркІила хІял ГІисала хІерли мицІирбариб. Дускаи лехІкахъибти жагъдеш черсаргъахъ-иб. ГІинзирад хъули чарриубхІели, ГІяшура рисирииб: «Хъайчикадиили кІел дус дикили диалра, гъачамалра ихкъяйда ванати хІулбачил набчи Имацци хІерхІейзургу. Гъачамалра дила уркІи аргъили, лявхІерарира. Дирихъли кІапІбуцибси хІурхъла музаван лехІкайхъули, дила дигайла мурхъдешличила ихтилатбарахъес гъачамалра ихтияр хІегибгу», – цІ-умрикІулри ГІяшура.

«Къянарлизирти дяргІибти шиннира шанглизирти дуцІарти хинкІа-ра бирар хъунул адамла багъара имцІабируси, хІурматра лябкъяхъуси» викІуси сунела дудешла гъайра тикрардирули, гъачамалра набзи уркІи хІебурили, дуцІрум ардякъун...»

Майла цаличив, ГІяшурала уркІила дард аргъибсиван, Имацци хъули къалабаикиб.

– ХІябал базла бухІнаб хъули бихуси гъуни хъумартурригу хІуни.

– Гузетличивси адам хъули вашес вирусив? – дукаряхІиб Имацци.

Мурталра гузетличивси адамлизир сегъунтилра малхІямдеш диѡс хІедитар или гъанбикили, ГІяшурани ГІиса гапварес къасбариб.

Мухли абхьибмад, хьуна хIер кураван дягIути мура някъбачи бархьбизур. «КIел тIуйчил хайдакъан хивира някъ-някъли маза-масла лигубира дялчуси дубурлай ГIиса каршугу, – урухриуб ил. – Юх, кахIершу. Секъяйда кавшес вируси вегIла унра, сегъуналра гIяйиб агарси адам? Амма ишгъуна муруйчил хIеррирниличиб мурул агарли хIеррирни гъалаб саби».

Сунела уркIила дард бурес хIерирули, ГIяшура малхIямли гъайрухьун:

– Имацци, хIела жан дат, бурагу, мурталра авлахьличив кавлуси, дурухъван дурав хIерируси адам селизивадалра урухкIарара?

– УрухкIар.

– Селизивад?

– ХIебаршили къяйкбикIуси тупанглизивадра хIебержили кепкайубси адамлизивадра, – пишяхьиб Имацци.

– Аргъира, – хъулирад дурарухьун ГIяшура.

Итмадан чарриубли, илини халаси диъра абушили, хинкIи дариб, гIямрулис чула юртлизир хIейубти гъарушла хъабара дакIубиахьуб. «ХIябилра сакIубси, хIябилра жагаси адам руили сари дила ГIяшура», – пикриухьун Имацци.

Бизили гавбикIуси диъла къябра хинкIира столличир дагъардиубмад, далай-гъалайла тIамаличил къапула гъалав ГIиса вагъариуб. ВякъярбикIахьули кIикъяран тупангра, ита-иша улкIули, ГIиса хъули ацIиб.

Имацци илала куцлици тамашавиуб, хъунуйчира хIерикIули, ташмишикIесвахIиб. Пур, багълали айзурли, ратIалгъунти хункIи чIумадариб. Унрала декIси хIерлици уркIкавхъи, ГIисани тIамадариб:

– Нуни бержили ахIенра!

– Балулра, – цулби къярждариб Имаццини, ГIисачи гъамирули.

Урухиубси ГIиса гIелавяхI вашесииб, Имаццини тупанг бяхIчаиб:

– Баршили ахIен, амма къяйкбухъес асубиарну, гъаммайруд, – вьвбяхьиб ГIисани.

– Балулра, – чевашесииб Имацци.

ГIиса къалабали къапула гIелав веткахьиб. Имаццини, чариубли, гъарушла умегI бержиб. Пурра бержиб. Белхьунси диъла кесекра чIямбариб. Урухриубли, дай хъулир дадкарризурси ГIяшурачи гъамиуб:

– ХIябал дуги-хIери ну хIечила пикрумазивхIели, дила хIялалти ва марти дигайлис хIуни хаиндеш дарес дигулрив? Багъи, ну мицIирли левалцадхIи, хIу цархIиллис къадархIерирни! Дила жанничирра наб ахIерси хъунул адам ГIисагъунти пандахьибазикахъес хIералтни хIебалулрив?!

Мура гъайли хIулрукIахьибси ГIяшурани кIелра някъли Имаццила хъяб цIацIабириб.

ИлхIейчибад илдала дигайлис чилра ургаухьунси ахIенри.

ГЪАРИЛЛИС СУНЕЛА

Мургъи-шинни дакибти гЯрбукИла тУлкмиван гЕбшнила рангли тАбигЯт ухескаилри. Ши-алавти катругуначирад дердибти мурала гЕбни дарилри. Дикьурти анкИла бугИми шилизи гечдарилри, хЕнтИбази делшири. Катанухланти шакхЕбекили, дуцІрумла жагати бурхИни демжурти хЯнчилизира шалгЕрдухъири.

Хурхъачирад дургъути, челис-че хъархъдикІути дугІби кадухъунмад дубурланти яниличи хЯдурбикЕсбииб. Шантас гЕлакавхъес дигхЕйгули, Имащинира сунела къял-къачалис даари мура кадихъиб. Гьаларти дусмазибван ахИи берхъили бакИбси хъучирад дучибти бугИмира хЕнтИализи делшун.

ГЯхІти къар-шин дакИниличи ГЯшурара дебали разириублири. Сабухъличи сунела хУлрукИбдеш дигЯнбирес хЕрирули, Имащизи хабурга ругъулри.

Гьаргалабси къасиличи кайили, ванадеш агарси гЕбшнила бархИли ванахЕйрни балули, хала хЯкализид вергурли, Имащиди сунела пикрумази ахъилри.

– ИшбархИра аргъ барсбиэсгу или урухкІулра, – иб хапли Имащини, сунела мякъла гугриили, балали лукІуси ГЯшурара.

– ДягІбухъесра асубитар...

– ВецІналира дирихъ бакИли гЯхИил бири. Дирихъли кабахъибси секІал сунела мерличиб балта, дягІливан хъямбарили архЕху.

ИхтилатбикІути Имащиди ва ГЯшурара буриси таманхЕбиубли лебай, хУрхъачибад бургъуси келекли сунела чябхъинти дехІдихъиб: гЕбназирти мура, хЕнтИбазирти бугИми ардихесбииб, хъулчрачи хъямбикЕсбииб. Шила дубларти гъундурачир хяса-пухІла гулумти ахъдиуб. Душма халаси гЯскар чебухъунхЕливан шилизир тАма-гъама ахъдиуб. Дархъдатурли хъулир дирути хЯнчира, катанухланти хЕнтИбачи ва мурала гЕбначи дуцІбикЕсбииб.

Бячунси уркурла хУлара шалкІубуцили, Имащиди сунела хЕнтИализи къалабаикиб. Илини, ганзиличив ацІили, гъаяли бигъи, хЕнтИлала хъарличи хУла баршиб. ГЯшурара дихахъули, гъаяли хУлализи дилгъули, бугИмачи къаркъа дебадиресииб. Амма я хУлала, я къаркъала зугъадешла хЕнтИалис кумек ахЕкІуб. Челис-че цІакъбикІуси келекли ардихути бугИми далтахъули, хЕнтИлала хъарличи Имащиди гугииб.

– Ягъари, Имащиди, дягІли каркахъуригу хУ. Се бирулри хУни илаб?

– Итцада халаси къиян кабахъили дучибти бугИми дягІлизи ардухахъибси Аллагълизи суал бедес дигулра.

– Сунени дакІахъибти ризкъи дягІлизи ардухахъес Къудратла вегІлизиб ихтияр кЕбсигу, Имащиди. Аллагълизи шукру викІен.

– Аллагълизи улгули, хУра ванаси хъули кайили ахЕнрину,

мегъла гимачил дебабарили, хІу-вегІси хІентІа дягІлизи батахъес къайгънаиркъулри.

Сунела хІентІа арбухиси дягІличи гІясиикІули, Имацци хумарли хъули чарухъун.


Ца-чумал бархІила гІергъи Къурбан байрам сабаиб. Катанухланти къурбандарес чесибти хІяйванти лугъули, имџасигъуна пай мижитлизи бихули, калунси пай хъали-хъайгІи буртІули, цаличи ца башесбииб. Имаццинира сунела къача белгъун ва пикриухъун: «Дила гІямрула гІямрулис садакъа буртІули хъалли, сегъуналра гІяхІдеш агара. Абзур дус узули дакІахъибти бугІмира гъарил дус хІурхъла бурямли ардихули сари. ДуџІрумлизир мура дурчули, янилизир хъач дурчули, халадияхъути хІяйванти садакъалис лугъули хъалли, хъулиб баракат агара. Дила лебдеш садакъалис буртІули, дила кулпет нуни сен къарцинбирахъусира? Ишдус къачала диъ буртІхІебуртІис, бяхІяхъбарили, берахъес дехъличи чебяхІкайхъис».

Малла МяхІяммад Къурбан байрамла бархІи белгъунси Имаццила къачала диъличи хъуликІусири. Илала диъ хІебикибси маллани шила масхарачис деџІагахъес къасбариб. Гумай биџибти мурул адамтачира хІеръили, илини Имаццис уркъбяхъиб:

– ВяхІ, Имацци, бунагъкар адам уилригу хІу. Дила сияхІлизиб лебси къачала диъ хІуниџун беркес къаслизивригу...

– Ягъари, малла МяхІяммад, дила хІялал-залалли халабаахъибси къачала диъ дила дурхІнази ва дурхІнала дурхІнази беркахъес къасбарибси ну сен бунагъкар адам вирусира? Мижитлизи сабухиси хъули арбихули, урхІла хІяйвантала диъба укули, џІуръабиубти дурхІнала нешаназибад напакъа бурчули, хІеркайруси хІу бунагъкарлизи халхІейрули





Хадижат ГЯМАРОВА



БАРХІЕХЪЛА БАЛГА

Глебшнлизир бархІехъ шагъарла анхълизи рашес дигахъис. ИшбархІира аркъулра анхъла дайларад. Гъунила кІелра шайчир даим шиништи къадуби малхІямли лехІли сари. Илди-ургарад мургъили варакъдарибти галгуби хІисабдирулра. ЦадехІ дайхъу чІянкІли, итдилти гъачамлис шиниш-духъутІли лерал илдани гІела-биркуси берхІила гІергъити нур чучи дигІикІули сари.

ДуцІрумла цІалира гІлебшнила шахлира дигубти къар, гІянжила рангичи мешудикили, чучил къисмат цабарибси ванзализирад декІардикес хІейгутиван, пІяцІдикили сари. Кам-гъамли къаршидиркули сари, гъардакІили, мицІирлира, ахІерти адамти, дикІутиван бурги ахъдуцибти духъутІа вавнира. Анхълизи кІапІрала къалтин убушибси дягІра ишбархІи агара.

ТабигІятла лехІдеш булъули, биштІати дурхІни хІяз-хІузлизиб саби. БегІлара биштІати биалли алавчарси тІабигІят бяркъес сахъли хІербикІули саби. Цакъадар халабаибгани, чула тІалабуни гъаладирхъули, нешанази, хала нешанази тилади-бурсавгала бурям чебушили саби. Школала гІямрула дурхІнани шагъарла дублаб сагали тІашбатурси жагаси кинотеатрлизиб бамсриихъес мер бургули саби.

Дурсразибад акъубухъунти илди каникултачи разили саби, дегъси дуцІрумлизир маркаличи вава-къар къайда.

Скамейкабачиб лякъирбикІути жагъгала тІамрачил чула агурби дархІдикахъес анхълизир арцантира гъазализир сари. БархІехълизиб ишаб шахмагуни-шашкаба биркъути гъести гІямрула гІяхІцад адамти чебаэс вирар. Илдаци хІербикІес дигутира камхІебирар.

Паргъатли саби иш яргалис урхъура. Илини ардякъунти дуцІрумлизирра чумра жагъилла жан къяраиб, илдала хъуланас, дигайлис ва баркъудлумас даимлис гъуни гІекІили.

Абадла-абад инсайс къуллукъличибси тІабигІят лехІхІели, ряхІятли саби нешла уркІира. ДурхІнала жан ахІерадарес сунела жан кІантІ-кІантІли харждируси нешлис гІягІнисира ил саби – лехІси тІабигІятра даршуси дунъяра.

Дунъя даршули калахъес, мадарла яшав лушахъес ахъри камхІебирахъес, дурхІни адабчебтили абилкъахъес нешанас яхІ-сабур дургахъес ибси мягІнала саби ишбархІи дила балгара.

Бикѹли бирар, берхѹи гѹлабиркуси вахтлизиб барибси балга мурт-биалра Чевяхѹси Аллагѹличи биуси саби или.

Нешанала урки-уркѹларадти балгни Кѹдратла ВеГли къабулдараб.

БАЗРИГАН

Сангарат чарх-бекѹлизир бекѹлилра жагаси ахѹенри. Гарасван ахѹси къаркъай, гъярѹа някъби-къяшмани ил къанкъличи мешуриркахѹулри. Авѹали дусѹун риубли риалра, дяѹличир 70-80 дусла рухъналаѹад шяхѹрумира лерри. Мурул-дурхѹни агара, сариѹун хѹерриури сари. Сунес сегъуналра къуллукъ хѹебиру илини, бекѹлил сунечи далхѹейкибти палтарра дихи. Модаличила гъйрахѹедикѹехѹе. Кѹдратла ВеГли жагадешла пай буртѹухѹели, ил гъарибличи ярга хѹебаилри. Хѹял-тѹабигѹят-лизирра ил чурхси ва къаркъси сарри. Малхѹямдешлизирадра мяхѹрумли калунси илала къисмат алавтани гъархѹебизнилизе халбирулри. Заманаличир хъалиѹа дѹцес бекѹхѹериънилис цархѹилти гѹяйибла бегѹти сабливан, илизир талихѹли баргибтачи къядешла лишантира дагъарлири. Хъарбуѹибси секѹал бетхѹерхалри, гъимили, гѹясидешли алавти тамаша-бирахѹулри.

Ахирра ил селалра аварагарси, беркес-бержес бикалли баибси, тѹабигѹят-санигѹятлизив кабиз-бетѹц агарси ѹа саяхълис шери рякъун. Давла бучес бекѹхѹериасли, виштѹасилра акѹесгу ибти пикрумачил. Багъѹдичевси, гѹяхѹси хѹянчизар сай или, гъамти биргѹябиргесра Сангарат бажардирикиб.

ѹа заводлизиб, бузули хъалли, илдала бузерила сабухъра багъарбулхѹули ахѹенри. Илди гъар бархѹи ѹализи ѹа къунба бугъули, далдурѹути гѹямулти-макру хъулибси баракатлис диргаладулхѹулри.

Кѹилинра начальник виргѹявиргесра тѹентѹлизилра бирули ахѹенри. Шилтахъчиби сабливан, мурул-хъунул ѹагъунтири, хѹебалас, илдани ѹалис ѹали дурсри кадирхъутирил яра къисматли къаршибикахъибтирил.

Яшав барес хъуна къайгъи халаси бири. ѹаѹабехѹ азгъин хъунри бусули лебай, савли жявли аризулри, анхълизир, хъучир рузули рири. Хѹерели заводлизир рузули, хѹянчила дурарад вачрукъядешра дарес замана бурги. Гъар чинаралра къалмакъар даресра бажардирирки. Илини чис-дигара, се-дигара барес чейси, амма чисалра сегъуналра кумек хѹебири, сунес гѹяхѹдеш агарси мерличиб. Жинжирагъван сарерхурси иличи башу-арбашутира камхѹебири. Лаг-катхѹел, ита-иша башутала азир зугѹяла бекѹдарес ил гъаман ралкъарулри.

Залумси хъунуй вайта хѹелтни балули, мурул Исмягѹил нукъуйс някъиш даресван сайри хѹянчила вашуси. Хъуна гѹямултачибли заводлизиб бикахъибси хѹянчиличи иличил варх савли ваши, камси хѹянчи барили, пяхѹли ветихъи. Къараулчиби умѹули хъалли, къел-хѹерзи даргес хѹебири.


Хириэс мерра лебри, базла ахирличиб камси-биалра алапара. Хьунул румснила, зягипли риънила, чус дурхІя ахІелкІнила илис авара аги. ХІябцІали бархІила къиян хІябал бархІили каберхахъурли, базриган-хъунуйчи къакъбирхъурли. Киса бацІбухъунхІели, чатІа къяйдали, хъуна дяхІличи хІерикІи. Макруж хъунул риргІяриргес гІямултас сайра гІелахІелхъи. Алапа касибхІели, ил каберхайчи, багъана баргили, веткайхъи.

Ахирра Сангаратла сабур каберхур. Левли багалаагарси муруйзирад ил декІаррикиб. Я нешдешла талихІ хІебагъурли, я хъалицІа детхІеурси ил барх бузутачи гъатІира гъимичерриуб. Бараван сунес къабулхІебиркутази бекІлилра гъайхІерикІанриуб. Яшавлизиб тухъли хІербирутачи къяскариубси илини тукейзир рузуси ралликъяначил вачар-чакарлизи ахъиб. Чеблалис арц сайсули, Бакулизирад дицес палтар-къяш дихули, сагати гІямру дехІдихъиб. . . .

Сепайда, гІурра гъархІебизур. ЦабехІ сунени биргІябиргулри, цархІилтани – сари. ЦабехІтала гъалар уркІецІидухъесли риси, цархІилтала гъалар гаприкІи.

Пякъир базриган рузули релки, карерхурли сари, рухънала дуругван. Мякълав уркІи буреси ва аргъеси чилра агнила децІли къацІруцили, ил гъатІира рухънали чериули сари. Къядешла ва къяркъдешла, къунбала ва шилтахъунала къикІа аурси вачрукъяла я бучибси давла агара, я бацІ хъулиб – баракат.





Къистаман ГЯЛИЕВА

ТАЛИПЛИ СЕКЪЯЙДА НУСИ АСИБА?

Убях! Мулебк!ала шилизив хабадехурси ГЯлила урши Талип кабизлачев-си, ахъси чархла, цудара супелтар, хъанц!а халати х!улбала вег! адам сайри. Илала лебри къугъаси хъунул Хамисра, вец!ну к!ира бигути дурх!яра. Хамис къаркъайзирад ришт!аси риалра, илини дебали чебетаахъили х!янчира бирусир-ри ва сунечи мурулра лех!илзахъусири.

Чула дурх!ни абикъес яшав барес багъандан, Талипра Хамисра дебали бузутири. Илдала дахъал х!яйванти-мас, хъуми дирутири. Илала дурадра, Талип монтерлира узусири.

Ца барх!и г!янруч!, барх!и абухъайчи Талип айзурли, Г!яяла базарличи дураухъун. Сунес г!яг!нити мегъла г!яг!ниахълуми асес базарлизи дураухъунси муруйзи Хамисли тиладибариб, мазала бизиси нуси асахъес. Базарличи ветайбси муруйс хъуна тилади гъанбикиб ва нусби дирцуси ца х!унт!ена ляжубар ахъушан хъунул адамличи гъамиуб.

– Х!янчи гъамаддираб, чумлиса х!ела нуси?

– Арали ватаби, села нуси вик!улри?

– Мазала.

– Ишк!ун дила дебали бизиси, дек!арти ниъ дархх!ерили, ца мазала ниълизибадцун барибси нуси саби. – гапбариб сунела нуси ил ахъушан хъунуй.

– Марли рик!улрив? – тамашавиуб Талип.

– Марли рик!улра, – жаваб чарбатур илини.


– Ил х!уни бурибси мар сабил, ах!енал бусяг!ят балех!е нушани, – иб Талипли ва кисалабад абит!и индикатор нусила байхъайх!и бикайчи къузбариб ва иб: эгъ, рузи, х!уни набзи къяна бурилригу, иш х!ела нуси байхъала къя ниъла саби. Вякъдизахъур сунела халати х!улбира сайра, Талип ил хъунуйчи дебали къаркъяси х!ерик!улри.

– Ва дила узи, х!у Аллагъли ват, пучжабиридгу дила къяна. Х!ед нуни байхъала багъалис лугас иш нуси, – тиладирик!есрях!иб ил хъунул, Талипли барибси пишаличи шахх!ерикили.

– Илкъяйда рик!ули г!ергъи, биха гъари наб ца нусила мява. – иб Талипли ва бег!лара халасигъуна нуси асиб.

Халаси нуси асибси Талип чеваибх!ели, халкъ, г!ях!си нуси теб или ил хъунуйчи гъамбирес бех!бихъиб. Талиплира ил нуси гапбариб лебилра халкъла гъалаб.

Илкъяйда байхъала багъалис асили нуси хъули хиб. Талипли сунела ригуси хъунул ва дурх!ни разибариб.



Патимат ГЯХИМАНОВА



ПИКРИЛА ЦАКЪ

Жагаси бархИира бакИиб къалли, уркИиличиси гъавра тIабигIятла аргъра вягIдаладиубтигъунти сарри. Жаннет цаибил бархИи хIянчиличи аркъулри. Сари акIубси шилизи учительница риубли рузес хIерирниличила нешли аргъили, ил сунела рузи хIерриуси поселоклизи пархъиб.

– Рузисра кумек бетарар, хIура учительница ретаруд, – рикли неш илизи. Нешла рузис кумекунани риркъес-декIар халаси иштяхI атхIекIуб рурсила, амма халаси шилизир, бахъал дурхИни лебси школализир рузес ибси пикрили илала уркИила гъав ахъбурцулри.

ХIунтIена диплома сарира хъайгИи чаррухъунси Жаннетлис лебил дунъя ца сунечицун тIашбизурли саби или гъанбиркулри. Секъайда лебил сунечи разибирарал, сегъуна къясдешличил иличи учительницаби хIербикIарал, ибти пикрумани илис шаладикайчи гъанкI хIебакИиб. ДерIлара жагати костюма, дабрира чердикИиб, гъезра хIедигъи, даткаиб, (иткъыйдара мурталра уршилагъунти къантIа гъезличил рири ил ручIухIели), сарира разиси хIайчил школализиряхI гъайриуб . Варх узикъарра леври 8 класслизив учIуси.

ХIера школа... Агъ, бахъал дурхИни. АрацИили чедибси дерхIличи, илини баргиб директорла кабинет. Директор валулри, сенахIенну гъабил бархИи нешли масла къакра сарира иличи тянишрарес рукибсири. Директорли:

– Иш нушала сагаси учительница Жаннет ГIябдуллаевна сари. Ишини дурхИнас дарган мезла ва литературала дурсри кадирхъу. Къабулрарая иш хIушала къукъялизи, иру или гъанбиркусири...

– Ракирив? – бизахъур илини, бекIалра ахъхIебуцили, – Приказ хирив? – Илар, коридорлизир тIашризи.

Жаннетли хIилхИи унза баргиб, хIулбала гъала цIябдеш дакIудиуб. Ил дура-рухъун. Илгъуна гъунибаъниличичи гъеч хIерси ахIенри Жаннет.

Ил биштIаси улкъайла гъала тIашризур. Се бирусил балули ахIенри, учительскаялизи сарицун арацИили, тянишриэсра рирули ахIенри, ита-иша башути, дуцIбикIути дурхИнала тIама-гъамали бекI жургъбухъахъири.

Зянкъдяхъиб, лебил дуцIли линейкаличи дурабухъун. КахIелун илдазив цалра Жаннетличи хIерхIейзурси.

Дурар далайла, ахъли дучлуту назмуртала тIамри дикъулри, Жаннет улкъайларад хIеррикIулри, амма чебиуси аги. КъакъаракIибдешли сарира шакIерикили къянкъубазирад чяхIдухъунти хIили, лерилра палтар дясахъун. Явлухъра балхIебикиб. Се бирусил хIебалули, ца някъли къянкъуби дуцили, цархIилли улкъай абхъес сен бирарал ахтардибирули лерси, илини чедаиб хIябри...

Жаннет итцадхIи сунела гъала тIашризурси улкъай хIябрази хIербикIулри. Рурсила уркIи гIурра цакъли къакъадешли буциб. ХIили дясунти дяхIкад нургъби гердикIесдяхIиб.

– Се бетаурли? Гъуя, тIаш, нуни шин лерхис, ма иш дила явлухъ, умуси саби, урухмакIуд. Ца ахъли ахIенси халати шала-хъанца хIулбачилси мурул адам дуцIли вакIиб шинни бицIибси мегъла кружкара сайра. Илди кIелра дурабухъун, ганзухъличиб къаршибиркути ученикуни аьбирхъулри, учительти селра хIебикIули шулумбулхъулри.

– ХIу сагаси ученицарив? – хъарбаиб мурул адамли, шин кертIули някъбачи.

– Сагаси учительницара, – жаваб чарбатур Жаннетли.

– Сен ахIерацIири учительскаялизи? Ученица сари или гъанбикибгу нушаб. Каса иш явлухъ, душка някъби.

Рурсили някъби, дяхI, бара-бара палтар душкиб, мурул адамлис баркалла багъахъур.

– Ну физикала учитель сайра, – иб илини, аркъуси рурсилизи. Ура буриб, амма ил Жаннетли хIебакъиб...

Бузерила цаибил бархIили илцад къакъадеш хибси рурсилис гIеларадти бурхIни муэрлизирван кадикиб. Ил я хIу чи сарри или чилилра мучлахIера-риб, я иличил тянишируси ахIехъиб, 11 ибил классла урши халхIералли. Гъар бархIи савлиличивад ил ганзухъличив Жаннетличи хIерлири.

– ТянишдирехIев, – или гъуни бурцули.

– Лерил дарган мезани хIезир сари, ну завуч сайра. Иш расписание... или хIябъибил бархIи иличи гъамиуб ца супелтар ургарти гIямрула мурул адам. Ил мурталра вирар учительскаялизив. «Завуч уили сай», – пикрирухъун Жаннет.

Баз кабикиб. ЦацахIели класс чинаб лебал къяйцIкарикIули кавлуту ан-цIбукъуни дири.

Ученикуна сегъунтилра литературный мез далули ахIенри. Къияннири рурсилис илала ученикунасра.

Булат бикIулри ит ганзухъ бурцуси учениклис. Илини гъар бархIи савлира бархIехъра гъунирра ралтулри, савли гъуниваили, Жаннет, гъай-гъай, иличила пикририкIули ахIенри, илала дигайла кагъурти, узикъарли дихути, делчIра хIеделчIи, лайдикIулри. Леври рурсила уркIилизив ца жагъил, ил ВатIайс къуллукъбирули гIярмиялизиври. Иличи дихъибти дигайли ЖаннетлиуркIили гIур чилра къабулирули ахIенри.



Къади
ГІЯЛИСУЛТАНОВ



**ХІЯБИБ ГІЯЛИЕВЛА ПОВЕСТУНАЗИР
ХЪУНУЛ АДАМТАЛА ОБРАЗУНИ СИПАТДАРНИ**

ХІябиб ГІялиев даргала литературализи поэтван вакиб. Жагали каргърти назмуртани учІанна уркі сунечи битІакиб. Илала гІяхІцад назмурти бучІантас дигестили ва илдала уркібазир далайван зайдикІули сари. Амма поэзияла галга вавали бирхъухІели ил шурулхъули сай прозала журализи. Илала цаибти хабурти «Гьалмагъдеш» журналла бяхІяназир дурадулхъули сари. ДиштІати хабуртачивад вехІихъили, ХІябиб ГІялиевла романна даражаличи адикибти произведениеби делкІун. ХІябиб ГІялиевла прозали учІанничи халаси асар бирули саби. «Ахир агар гъундури» бикІуси повесть касалли, хъунул адамла образуну имцІали гІямрулизир диэстигъунти сари. ГІямру дахъал шалубарти сари. Илдани адам сегъуна-дигара даражаличи виркахъу. Дигай ургали образуну сипатдарни ил халаси устадеш саби писательла. Повестъла бекІ геройти Маирара СягІидра сецад цалис ца дигахъули биалра илдала дигай гъардилзули ахІен. Сецад кІелра дигайличи лайикъли биалра гъарбилзули ахІен Маирарала юлдаш ГІяйшатлиса. Илала гІямрула гъуйчив кършиикибси Нариманни илала уркі разибирули ахІен. Илкъяйда хъунул адамла къисмат ирзнилизиб сегъуналра бархъагардеш агара. Сецад или биубли хъалли ГІяйшат гъамадли гІямрулизир гъуйчириркули сари. Илни кІинайс сунела дигай пешкешдирули сари ГІямарлис. Гъарли-марли илдала дигай мурадличи диули сари. Повестьличирад повестьличи ХІябиб ГІялиевла лукІнила даража ункъбикІули саби. Гъарбизурси повестьлизи бейгІес вирар «КІел дудешла ца рурси». Илавси герой Лагъманов Загъир, колхозла председателъ ца бархІи сунела рурсили, вецІну гехІра дус риубси СалихІятли сари Загъирла рурси хІериъниличила буриб. Загъирлис ил халаси бяхъ сабри. СенкІун илала гІур чилра аги СалихІят ахІенси.

СалихІятла образ сипатбирули, илала бархъли ахІенси баркъуди, мухІлила гъайличил адамла уркі бячни, сари вецІну гехІра дус арикъурси адамличи тудяхъни саби. ГІяжаибти сари гІямру! Илдала лугрира, катругунира чилилра белгидарес вирули ахІен.

Хъунул адамтала образунани имџаливан дунъяла ахІердеш, лаззат гъатІира џакъбирахъули саби. Ишаб сипатбирути хъунул адамтала образуни, илдала къисматуни гІядатла ахІен.

СалихІятла неш Хамис дергъла дусмала, къяркъти шуртІрала асарлиу рикибриалра, амма адамличи диги калахъес ил бажардирикиб. ГІяхІбаркъ хъумхІертуси, къиянтас мутІигІхІерикІуси хъунул адам сарри ил.

Дубурланхъунулаадамлажагадеш, илала адабла умудеш духІнадуцибси образ саби Жавгъарла. Колхозла председатель Загъир илала асарлиу викиб. Гъайгъайра, Жавгъарла жагадешли чумал дус гамъа Загъир иличи гъуџирули сай. Ил ахІен ишаб бекІлибиубси. Бузерилизир бурхІни дуркІуси Жавгъар бузерила мархъличир сипатрирули сари писательли. Загъирла уркІи битІикІули саби илини авлахъличир дучІути бузерила ва дигайла далуйта. Пагъмукар адамти саби Загъирра Жавгъарра. Ил багъандан саби илдас гъарбизурсира.

«Духъянти бархІи-дуги» бикІуси рагъамлизиб някълизир жузачил чаррулхъуси Рази-аба сипатрирули сари. Илкъяйдали лер ишар цархІилти абразунира. Маржанра Салиматра ихарулантазибад чебаахъести образуни сари. Илдала муйли Басир ва Залкип мурталра къаршикарти сабтиван чебиахъули саби. Иличи къаршили Маржанра Салиматра жагътили, бузери дигутили чебиахъули саби. Суал акІес асубирар: сегъунти юлдашдеш диэс дирара мура ари бихуси, яхІ-хІял умуси Маржанна ва вигнабазивад урши варкъибси Салиматла? Леб ишаб мешудеш ил гъаргбарни саби романна бегІлара ибкъси манзил. КІелра хъунул адамла мешудеш, урхІли чедиути лишантала, хасиятунала дурарад, илдала хІялалдеш саби.

Маржан хІялалси хъунул адам сари. Илала уркІилизиб сунела гІямрула юлдаш Басирла сипат саби.

Салиматла къисмат декІарси саби. Илис Залкипла хъунул ретаэс къадархІебиуб. Дергълизи арбякъунти веџІну кІира (ихарулантазибад) ил сай гъавухъунси ва къачагъиубси. Халаси балагъ саби Салиматличи бакІибси. УрхІла муйли дергълизибхІели, сунела качагъиубли ваџІализив сай. Илавад ил дигІяй хъайгІира вашули.

Мура убяхІдеш иргъули сари илини. Илди кахти пикрумала дахъдешли ил џахси баркъудиличи леркули сари. Илала гІямрулизив Самад вагъариуб, баягъи веџІну шура дус гъалав шаддикъ сай или дудешли сари хІередибси. Ил багъандан илдала хІинтІби џали дигубли туснакъварибси. Илизирад дурхІялис раиб, ва шантала гъала дурарухъес хІериранриуб. Бетаурси кахдеш балнили саби Салиматла образ илцад хІялалсили бетаруси.

Маржанатличил џугбуцибхІели илдала ургаб мешудеш баргахъес учІан гъирирули сай.

Илдала дигайла, гъалмагъдешла, умудеш бахълис гІибратли диэс дирар. Гъамадси ахІенри дубурлан хъунул адамтала образуни гъарра шайчирад сипатдарес. Амма ХІябиб ГІялиевли ил секІал бархъли аргъиб ва хІекъдешличи гъамли сипатбариб.

Буралаби

Гяйша
КЪУРБАНОВА



*Хядурдеш агархели,
Хязра гяхиси бетхерар.*

* * *

Ламусли ламус лебху, уркъбякъли – уркъбякъ.

* * *

Юлдаш хъумартни – чархла биркѝан чеббяхънигъуна саби.

* * *

Хулби къяпѝли гъуни хейхъид, дагъри агарли – гѝамру.

* * *

Пикрумазир хѝанчи дарес гъамадси саби, баркъудилизирван ахѝи.

* * *

Хѝанчи бехѝбирхъухели, илала ахирличила пикриикѝен.

* * *

Пикрихѝевхъи барибси хѝанчи сагали барес чевкъар.

* * *

Ши-шантала багъа булгъуси угъраш гъубзнала гъимили гъамадли ургу.

* * *

Дудеш агарти дурхѝна неш кѝинали ригахъу.

* * *

Бикъурхѝели кахѝебердибси цѝедеш берхѝили убяхѝбиркур.

* * *

Вегѝли къасбаралли, къисмат барсбарес вирар.

* * *

Вацна буркѹбси авлахѹра жижкІна дицІубти дяхІра цагѹнти дирар.

* * *

Цедешлира чула гье кѹмла духІнар дебѹали, дахѹ ахІерали дихІу.

* * *

Алавтанира вегІла хІурмат биру, вегІли ил бирахѹес балалли.

* * *

ХІячми агарли хІянзира хІебузар.

* * *

ЦІакѹ агар цІакѹсиличи гѹцІли вирар, урунж – хІеркІличи.

* * *

ГІяхІ барес дигуси улкѹайлавад ахІейцІур.

* * *

ВегІла даражаличи хІерѹили вирар гѹалмагѹ чевиркІуси.

* * *

Мурити гѹайли уркІи биргІябиргу, кани биалли – хІебиргу.

* * *

*ХІурматла вегІла гѹайличи, сецад духѹянти диалра, лебилра
лехІбилзан, хІурмат агарсила гѹайличи, сецад кѹантІти диалра,
чилра лехІхІелзан.*

* * *

Удиб цІа хІебикѹалли, чедиб шанг хІеруржар.

* * *

ВегІла дурхІя кѹаркѹуба ирталлира, вегІлалли кавлан.

* * *

*Вайси бетаурхІели, «Аллагѹла кѹадар» бикІар, гІяхІси бетаурхІели,
«Нушани сархира» бикІар.*

* * *

ГІяра бецІличил бяхІес хѹулхІебикІар.

* * *

Кѹукѹ-лямцІли заб диху, гѹай-мезли кѹавгѹа диху.



Хіурхыла ши.

ISSN 0235 - 0149

Индекс годовой 31176
Индекс полугодовой ПМ961

